

3

CA
OV.
HE

2

1 2 3 4 5 6 7 8 9 10 11 12 13 14 15 16 17 18 19 20 21 22 23 24

3

ICA
OV
WE

2


BIBLIOTECA
SEMINARIO V.
PORDENONE


A

B

AQU 2

m. Sh





P. 52 -

CONCILIVM PROVINCIALE AQVILEIENSE PRIMVM.

Celebratum Anno Domini 1596.



VTINI, Apud Io. Baptistam Natolinum. 1598.



CONCILIUM

PROVINCIALE

AQUILENSE

PRIMUM

CHRISTIANISSIMO





IN NOMINE
SANCTAE, ET INDIVIDVAE
TRINITATIS,
PATRIS, ET FILII,
ET SPIRITVS SANCTI. Amen.

*NOS FRANCISCVS BARBARVS
DEI, & Apostolicæ Sedis gratia Patriarcha Aquileiæ,
& Princeps. De consilio, & assensu Reuerendiss.
Coepiscoporum nostrorum in Provinciali Sy-
nodo prima Aquileiensi hæc statui-
mus, & sancimus.*

DE FIDE PROFITENDA.

EX IIS, quæ sacra Tridentina Synodus ad Pro-
uinciarum, ac Diocesium rectam gubernationem
instituit, & decreuit, ac Prælati superioribus
amussim exequenda præcepit, nihil fuit vel ipsa re sanctius,

A 2 vel

vel frequenti hostium incurfione opportunius, vel publica
utilitatis ratione optabilius, quàm ut sincera fidei nitor,
quam Ecclesia Catholica Spiritu Sancto edocta inconcussa ve-
ritate hactenus tenuit, ac tenet, in ipsa Ecclesia conseruaretur,
ut nihil irreperet, quod imbecilliorum animos concuteret; aut
per calumniam inficeret, quos sinceritas commendarat; aut
veri lucem offusis tenebris in dubium reuocaret. quod in pri-
mis ab illis professione eiusdem fidei conceptis verbis formata,
omninò faciendum decreuit, qui alijs vel prefectura ordine,
vel tituli Ecclesiastici ratione, vel discipline officio praeessent.

Vt autem à nobis captum, & à Reuerendissimis Suffra-
ganeis promptè impletum, quod fuerat de profitenda fide Con-
cilij Tridentini decreto sancitum, ita statuimus, quicumque in
posterum ad easdem Cathedralis Ecclesias promoti fuerint, seu
etià translati, vel electi, aut postulati, illos in prima Syno-
do Prouinciali post illorum promotionem, & consecrationem
futura ad professionem fidei emittendam teneri: aliter contra
illos ex praescripto eiusdem Concilij procedi debere, ac posse.

Prouisos de Canonicatibus, & dignitatibus in Ecclesijs
Cathedralibus non solum coram Episcopo, seu illius Officiali,
sed etià in Capitulo profitenda fidei obstrictos, & non par-
tes fructus suos non facere ex Tridentini Concilij Decreto de-
claramus: quam dispositionem ad illos etià Canonicos Ec-
clesiarum Cathedralium pertinere dicimus, qui à Capitulo ius
conferendi certis mensibus habente prouisi fuerint.

Qui de Ecclesijs Parochialibus, seu Curatis quibuscunque
prouisi fuerint, intra bimestre tempus fidei professionem in ma-
nibus

nibus Episcopi, vel, eo impedito, coram eius Vicario generali, quoties promissi fuerint, facere omnino teneantur.

Ceteri verò omnes siue in presenti, siue in futurum beneficia Ecclesiastica habituri, & qui in Synodo Diocesana conuenire debent, in eadem Synodo, quæ primo quoque tempore celebrabitur, fidei professionem faciant: aliàs secundum formam sacrorum Canonum puniantur.

Decernimus autem in Archiuijs Episcopalibus specialem asseruari librum, in quo professæ fidei documenta extent; cuius inspectione facile colligatur, quis muneri obsecundarit suo, quis partes suas deseruerit. Idem mandamus à Capitulis Ecclesiarum Cathedralium seruari: si negligentius egerint, excitari; omnino, ut faciant, prouideri.

Qui alios publicè in Vniuersitatibus, aut Academijs docendi munus susceptum habent; quamcunque profiteantur scientiæ facultatem; debent hi quidem attentè inspicere, ne speciei doctrinæ, & ficta inuestigatione veri discipulorum animos perturbent, & sincerum illum scientiæ liquorem, quo mens discipuli alitur, veneno inficiant, & cupidè haurientibus interitum afferant. ac debent hi quidem omnes fidei professionem, antequam ad munus suum exercendum admittantur, emittere.

Qui Philosophiam publicè, seu priuatim, aut Metaphysicam, & alias huiusmodi scientias docent, graui se promissi religionem obligent, si quid proponendo, supponendo, disceptando, declarando ex scientiarum principijs asseuerauerint, quod fidei Catholicæ repugnet, perfectâ disceptatione, quæ cum Orthodoxa

doxa Religione conueniunt, fideliter se, ac sincerè aperituros; ne quis minus sciens, aut animi imbecillioris homo periculosi erroris obiecta specie in deteriorem sensum declinet. quod in Lateranensi Concilio sub Leone Decimo prouisum, cautumq; est, Constitutione incipiente. In Apostolici regiminis. & imprimenda in fine harum Constitutionum pro faciliiori eius publicatione, cuius etiam sanctionem, ubi studia vigent generalia, decernimus singulis annis in principio studiorum promulgari.

Qui in Academijs publicis in quacunque scientia, & facultate, aut priuatim domi suæ, aut alienæ vel gratis, vel mercede constituta legunt: qui Grammaticen, etiam illius principia docent, Arithmeticen, Musicen, Geometriam, & alias literarias, & liberales artes, etiam in Seminarijs Clericorum præuia illorum de scientia, vita, & moribus cognitione, & approbatione fidem profiteri omninò in manibus Ordinarij debent. Quod ut maturè fiat, ac diligenter, statuimus Episcoporum Prouinciæ nostræ solertia prouideri aut proposito edicto publico, quo profitentes quascunque facultates, & liberales artes ad se euocent, aut præcepto Parochis locorum factò, ut ad se quid hoc de genere habeant intra fines suæ Parochiæ, quamprimum deferant; unde prouisionis facultas ducenda erit.

Prædicatores Verbi Dei, si seculares fuerint, vel Regulares, in Ecclesijs non suorum Ordinum prædicationes habituri, ab Episcopo licentiam obtinere, atque ad id munus obeundum approbati iuxta Concilij Tridentini Decretum debere remiscantur.

niscantur. Quod si Regulares in Ecclesiis suorum Ordinum sint prædicaturi, tunc eos personaliter se coram Episcopo præsentare, atque ab eo benedictionem petere ex eodem Tridentini Concilij Decreto satis fuerit. Verum tam ipsi seculares, quàm Regulares Prædicatores nullo pacto ad prædicationes admittantur, antequam seculares in manibus Episcopi, Regulares Verò in manibus suorum superiorum Regularium eandem fidei professionem emisserint.

Qui ad Magistrerij, aut Doctoratus insignia tam in sacra pagina, quàm in iure Canonico, et Civili, aut artibus aspirabit, non ante promoveatur, quàm in manibus Ordinarij eandem fidem profiteatur.

Quæ omnia summario processu, quatenus Episcopo sufficere videbitur, apud actuarios excepta cum testibus in Archivio Episcopali servanda erunt.

Si quis autem supradictorum quocunque prætextu, aut quæsito colore fidei professionem facere neglexerit, aut recusarit; nullo pacto ad munus suscipiendum, vel exercendum admittatur ab Episcopo; cuius etiam erit animadvertere, an ij, qui fidei professionem emittere neglexerint, vel recusaverint, tales sint; de quibus ad Sanctissimum Dominum ex Decreto Concilij Tridentini referendum esset. Si quis impedimento fuerit, quo minus dicta Constitutio executionem habeat, de eo decernendum severè, quod iuris fuerit, statuimus.

DE FIDE TVENDA.

DVO sunt, quibus præcipue Catholica fidei veritas sustinetur, ac munitur, quorum alterum ad veritatis sinceritatem, & doctrinam pertinet; ut prædicetur, doceatur, declaretur: alterum cautionem respicit, qua veri dignitas, & forma à malorum artibus integra conseruetur; ne dormiente patrefamilias inimicus homo zizania superseminet, & messem corrumpat: quo hætenus pestilentia genere maximas, & nobilissimas Prouincias laborare lacrymabili exitio apud omnes cognitum est.

Vt igitur celestis sacrorum librorum thesaurus, quem Spiritus sanctus summa liberalitate hominibus tradidit, in commune commodum eorum industria, & studio, quibus est dispensatio mysteriorum DEI commendata, impendatur, & veritatis appetentibus dissipariatur; Sacri Concilij Tridentini Decreta sequentes decernimus; Ut sacrae scripturae lectio instituatur in Ecclesijs Cathedralibus, & Collegiatis insignibus, quamuis nullius Diocesis; si Clerus ibi numerosus fuerit; Præbendam quomodocunque, præterquam ex causa resignationis, primò Vacaturam, cui aliud onus incompatible non sit adiunctum; si nulla ibidem Præbenda, præstimonium, aut stipendium ad munus huiusmodi deputatum sit; ad eum usum ipso facto constitutam, ac deputatam intelligi debere, Episcopi Decreto in Theologalem commodiore, qua poterit, ratione, erigendâ, & personis idoneis, quæ munus obire per se possint, conferendam: aliter verò factam promissionem nullâ esse, & inuolidam.

Quod

Quod si nulla in Ecclesijs sufficiens Præbenda sit, per assignationem fructuum alicuius simplicis beneficii, supportatis debitis oneribus, vel per contributionem beneficiatorum Ciuitatis, & Diæcesis decernimus ab Episcopo de Capituli consilio prouideri, ut ipsa sacra scriptura lectio omnino habeatur.

Præbenda vero huiusmodi non conferatur nisi Clerico seculari, & si videbitur Ordinario pro Ecclesiæ utilitate per concursum, ei, qui cæteris sufficientia, & doctrina excellat.

Si vero Clericus secularis idoneus non reperitur, cui Præbenda Theologalis conferri possit, statuimus, ne tantæ rei studium, & lectio intermittatur, aut longiore tempore intercedente frigescat; quod diligentia, & exercitatione flagrare debet; Præbendæ Theologalis prouentus integros; dilata collatione; alicuius Monasterij Regularium Priori, alij-ve superiori Regulari attribuendos esse; qui Regularem ex sua familia probatæ vitæ, ac doctrinæ seligat ad munus lectionis sacrae interim obeundum: lectori, quæ necessaria fuerint, attribuat: reliqua in Monasterij commodum impendat.

Locum Theologo, diem, horam, & lectionis argumentum, Episcopus præscribat, & definiat. à lectione vacare spatio trium mensium Iulij, Augusti, & Septembris permittat.

Quæ tamen de Theologo disposita sunt in præcedenti S. Cæteri, illa declaramus non comprehendere lectorem Regularem, qui in defectum Clerici secularis ad lectionem sacrae scripturae fuissectus est.

In Monasterijs quoque Monachorum, etiam Carthusianorum, ubi commodè fieri queat, item lectio sacrae scripturae ha-

B beatur:



beaturn: qua in re si Abbates negligentes fuerint, Episcopi locorum in hoc, ut Sedis Apostolicæ delegati, eos ad id opportunis remedijs compellant, quemadmodum Decreto Concilij prouidè statuitur. In Conuentibus Verò aliorum Regularium, in quibus studia commodè vigere possunt, sacræ scripturæ lectio similiter haberi ex Tridentini Concilij præscripto debet: quæ lectio à Capitulis generalibus, vel Prouincialibus assignetur dignioribus ministris. In Gymnasijs etiam publicis, si hætenus sacræ scripturæ lectio instituta non fuit, ad Catholicæ fidei conseruationem, propagationem, et defensionem quamprimum insitui, et si instituta foret, et negligetur, restitui ex Tridentini Concilij Decreto omnino debet; ne, si artium, et scientiarum principia, et documenta studiosè passim traduntur, ut nihil ad perfectam cognitionem desideretur; neglecta iaceant sacræ scripturæ studia, Euangelici uerbi pabulum, diuinorum eloquiorum maiestas, et promissorum caelestium amplitudo, quod est unicum præsentis uitæ subsidium, et futuri sæculi argumentum.

Ac ne specie pietatis disseminetur impietas, statuimus ad Lectionis officium tam publicè, quam priuatim obeundum non esse admittendum, qui prius ab Episcopo loci de uita, moribus, et scientia examinatus, et approbatus non fuerit.

Satis Verò non est, mentem innoxio cibo alere, et sanitatem tueri, nisi arceantur malarum artium præstigia, et pietatis importuna corruptio, unde non modo fluxit morum, et humana uitæ labes, et omnium impuritatum colluies, sed Catholicæ ueritatis perpetua oppugnatio: est autem hæresum ea vis, et natura,

natura, ut in omnes se partes, tanquam venenum, inferat, serpat longius, omnia inficiat, & corrumpat: si à morum ceptis impuritate, inuadit animos, & perdit: si animo semel ex-cepta, mentis fastigium occuparit, in omnem immanitatis spe-ciem erumpit, omnia vastatione vexat, & opprimit: quam-ut à Diocesi, & Prouincia Aquileiensi pestem DEO iuuan-te arceamus, nonnulla statuere decernimus diligentissimè ob-seruand.

Parochis igitur omnibus graui mandato per locorum Ordinario precipiendum statuimus, ut singulis saltem annis in principio anni Edictum de hæreticis denunciandis promulgent, ac sepe inculcent, quanto se piaculo obstringat, qui alieni scele-ris, quod in communem perniciem dimanat, conscius, nec mu-rum opponit, nec morbum cuniculis progredientem, cum dela-tione possit, oppressit.

De librorum Indice Sanctissimi Domini Nostri mandato proximis mensibus edito, ut exequutioni accurata demande-tur, suademus, percipimus, mandamus. Satis enim patet ex libris, tanquam ex venenatis fontibus, impurum fluere liquo-rem, quo animi vel nequiorum, vel imperitorum facile capi, & imbui ad perniciem possint.

Quia limites Parochiarum distinctis finibus terminantur, & potest quisque inter suos agnoscere, quid sit, & quale, quod tractatur: statuimus per vniuersam Prouinciam Parochis omnibus indicendum, ac seriò precipiendum, si quid in sua Parochia depræbenderint factò, dictò, scripto, pictura, sculptu-ra, etiam exercendi ingenij causa, quod sit contra certum Ec-

clesiæ Catholicæ sensum, aut suspensionem afferat rationabilem violatæ, seu infectæ Religionis, aut scandalum oleat, ad sanctum Officium deferant: Idem parochianos moneant suos, ut facere studeant. Quod si ab hæreticorum, præcipuè Theutorum Prouincijs, vel loci vicinitate, vel mercatorum frequentia in fines Parochiæ aliqui diuertere solent; moneant Parochi Hospites, ut cibos in mensa proponant, qui temporibus conueniunt: quod si compertum habuerint, ieiuniorum tempore carnes, & vetitos cibos in hospitio parari; curent, ut ad sanctum Officium, siue ab Ordinario tantum, siue ab Ordinario, & Inquisitore exerceatur, rem deferant. quod item facere non omittant: si nequam isti verba fecerint, & disputationem instituerint de hæresum, quas tenent, qualitate, aut libros hæreticos quacunque lingua conscriptos attulerint, & in hospitio alijs legerint, aut legendos tradiderint: de quo monendi erunt prius hospites; qui, si supina negligentia vel lucri cupiditate Catholicæ veritatis dignitatem post habuerint; & contumelijs intra suos parietes proscindi pertulerint, non effugient manum Domini, & grauissimè etiam tanquam scelere obstricti immani à sancto Officio Inquisitionis plebentur.

De ciborum communium usu; cum certorum dierum, ac temporum prohibitio non obstabit, moneant Parochi suæ Parochiæ hospites, ut nihil in gratiam vel Iudeorum, vel Infidelium separatim superstitiosè coquant, ne fiant sceleris participes, qui nomine, & pietatis studio se alienos profitentur.

Quia

Quia Verò nulla re subest periculum penè maius inter nos ,
quàm librorum hereticalium usu , nec alia magis parte hereti-
ci obesse student , quàm librorum corruptorum suppositione ,
quos aptè per dolum inter probatos etiam colligare student , ut
emptionem eludant , & emptorem in fraudem inducant : sta-
tuimus , Bibliopolis omnibus in tota Prouincia graui precepto
inhibendum , ne in posterum libros aliunde adductos tam colli-
gatos , quàm solutos venales proponant , nisi auctores illorum
inventario integro comprehensos Ordinario , seu Patri Inquisi-
tori loci exhibuerint ; atque ille subscriptione , ut vendi pos-
sint , concesserit . contrasacientes seueriori animaduersione pro
modo culpæ decernimus plectendos .

Qui libros prohibitos scienter tenuerint , contra illos pro li-
brorum qualitate procedendum statuimus , iuxta Indicem nu-
per editum .

Magistratus autem seculares enixè in Domino rogamus ,
ut , si quid opus illorum auctoritate , & subsidio ad fidem Ca-
tholicam tuendam fuerit , piè , promptè exhibeant , & officij di-
gnitatem celestibus cumulare meritis non omittant .

Ut autem contra hæresum pestem omnia medicamenta tam
necessaria , quàm opportuna adhibeamus in tota Prouincia
termino mensis post præfatorum Decretorum confirmationem
statuimus , publicandam esse Constitutionem Pauli Papæ IIII.
contra negantes Trinitatem , aut Diuinitatem IESV
CHRISTI ; & alteram Constitutionem Pij Quinti con-
tra offendentes statum , res , & personas Officij Inquisitionis
heretica prauitatis .

Pueros

Pueros etate imbecilla diuersari inter haereticos summè periculofum; nifi debitis, ac neceffarijs praefidijs pietatis muniantur. Idcirco praecipimus in tota Prouincia Aquileienfi ab Episcopis diligenter feruandum, moneant, vt patres, qui filios, aut alios quofcunque ad partes haereticorum mercimonij, vel addifcendae linguae caufa mittere deliberarint, prius ad fe adeant, & filios, feu confanguineos, aut alios quofcunque illò mittendos fecum adducant, vt Epifcoporum monitis atas illa falutaribus munita, & confirmata facilius irrepentis morbi peftem declinet, aut auertat, & reijciat.

Mercatores autem, & artifices, qui lucri caufa peregrinantur in longinquas regiones, quas haeretici frequentant, artificio etiam circumlato, curent Epifcopi, ne difcedant benedictione Epifcopali non petita: quae maxima erit contra Demonis artes, & fallacias medicina: fi Pafchali tempore, aut illi proximo ad nundinas proficiſcantur, indicant, vt vel ante difceſſum, vel ſtatim poſt reditum confeſſionem peccatorum faciant, & ſacram communionem percipiant. Si quid fuerit hoc de genere proſpiciendum, hoc proſpiciant, & curent.

DE PRAEDICATIONE VERBI DEI.

APOSTOLIS praecepit Dominus, vt euntes in mundum vniuerſum praedicarent Euangelium omni creaturae, atque hoc praecipui muneris officium, quod Apoſtoliſ commendauit; nobis, qui in Apoſtolicum miniſterium DEI prouidentia diſponente ſuffecti ſumus, intima-
uit:

uit: ac, ut provida pastoralis cura debet prospicere, ut sit, qui petentibus panem frangat paruulis; ita, si legitimum non obset impedimentum, prædicationis onus subire nos ipsi Episcopi debemus: ac interim urgere cæteros, qui officij obligatione tenentur, ut idem faciant, & pabulum salutis populo præbeant: nisi enim hoc præstiterimus, quod fuit in omni temporum varietate primum in Ecclesia, & singulare fidei firmamentum; ultionem apud DEVM, & homines, quam sacri Tridentini Concilij sanctio præscripsit, & intimavit, non effugiemus. ut autem reliquis officio, dignitate, potestate antequam, ita exemplo, & muneris exequutione præluce debemus. si legitimo Episcopi laborant impedimento, idoneos eligant, qui vices illorum subire, ac sustinere, & populos celesti alimento pascere queant; ne desit gregi pabulum; quo vitæ spiritualis conseruatur; nec pastor, qui pabulum suppeditet, & vitæ gregis consulat.

Curent Episcopi, ut Archipresbyteri, Plebani, & quicumque Parochiales, vel alias curam animarum personarum secularium habentes Ecclesias quocunque modo obtinent, idem per se ipsos, vel per idoneos substitutos, si legitime impediti fuerint, diebus saltem Dominicis, & festis solemnibus munus obire studeant, ut Plebes sibi commissas pro sua, & illarum capacitate pascant salutaribus verbis: quæ omnibus necessarium est scire ad salutem, doceant; vitia, quæ declinent; virtutes, quas sectari oporteat, ostendant, & declarent. atque id non modo in Ecclesijs, quæ sunt in Diœcesi, quo vis modo exemptis, etiam alicui Monasterio, quod sit extra Diœcesim, unitis,

tis, seu annexis; sed in personas, quæ ab Episcopi iurisdictione se quauis ratione prætendunt exemptas, exequi, & efficere omnino studeant.

Ac ut vix in hoc genere fieri potest, in quo non videatur aliqua adhuc diligentia desiderari, si publica respiciatur utilitas, & vel excitanda, vel conseruanda deuotionis ratio perpendatur, ita præter Quadragesimæ, & Aduentus dies, omnibus etiam Dominicis, & festis anni vehementer cupimus prædicationem Verbi DEI in Ecclesijs Cathedralibus, & Collegiatis insignibus fieri, ut ex sacræ scripturæ fontibus ad spiritualem populorum adificationem hauriatur, quod ad vitæ Christianæ disciplinam, ad boni studium, & contrariorum declinationem deriuari aptè possit.

Sapientibus, & insipientibus debitores sumus, nec personam hominis respicit DEV S, sed cor intuetur, & cui voluerit, dat gratiam: at verò ad pastorem sollicitudinem pertinet rationem illorum, qui in saltibus degunt, & sylvas colunt, & in vallibus habitant, haberi, ne animo syluescant, ut habitudine corporis, vestium asperitate, & locorum situ; sed in ijs, quæ ad principia fidei pertinent, qua possunt via capere, instituantur, & pietate aliqua imbuantur: idcirco statuimus ab Episcopis diligenter providendum, ut vel Diæcesana Synodo, vel modo alio, qui opportunior videbitur, adhibito Clero, ac de illius consilio rationem ineant, qua viros probatos, & ad obeundam prædicationem idoneos statis temporibus emittere in prædicta loca possint, ut populos agrestes opportune congregatos paternis monitis, ac pietatis aliqua eruditione instruant,

struant, ne Episcopi apud DEVM negligentia arguantur, si populorum salus periclitetur.

Regulares cuiuscunque ordinis, si à suis superioribus de vita, moribus, & scientia examinati, & approbati fuerint, cum illorum licentia, etiam si in Ecclesijs suorum Ordinum predicare affectent, coram Episcopis personaliter se presentent, & ab eis benedictionem petant, antequam predicare incipiant. In Ecclesijs tamen, quæ suorum Ordinum non sunt, ultra licentiam superiorum suorum etiam Episcopi licentiam ultra examen, si Episcopo videbitur, habere teneantur, sine qua in ipsis Ecclesijs nullo modo predicare permittantur. licentiam verò in scriptis debent Episcopi gratis concedere.

Inoleuit abusus, ut Prædicatores Regulares obedientias suas per internuncios Episcopis mittant pro licentia, seu benedictione respectuè obtinenda, accedere ipsi personaliter omittant: quem abusum tollentes decernimus, non esse omnino permittendum in tota Prouincia, ut ad suggestum predicationis causa ascendant, qui in adscripta obedientijs licentia, seu benedictione non ostenderint, personaliter illos ab Episcopo licentiam, siue benedictionem obtinuisse.

De predicationis argumento, & Prædicatoris munere; cum ad ostentationem, & inanem aurium oblectationem, & curiositatem trahi ceperit Verbi Dei predicationis; moneri Prædicatores seriò volumus. quia tamen locus iste non patitur, ut rem enucleatè tractare possimus Reuerendiss. Coepiscopos Suffraganeos nostros enixè rogamus, ut singuli post actam Synodū aliquid de hoc genere conficere studeant, quo Prædicatorum
C monitiones,

monitiones, & observationes comprehendant; pro fine cuique proponatur gloria Dei, & salus animarum: pro medio non curiosiores quaestiones, & oblectamenta verborum auribus pruriētia: quod facile assequemur, si pro argumento fuerit, CHRISTVM prædicare Crucifixum, DEI virtutem, & DEI sapientiam. à sacratissimis enim Crucifixi CHRISTI vulneribus, Cruce, & morte diuinæ virtutis supereminentiam, & voluntariæ passionis, quam pro redemptione mundi subiit homo factus, acerbiter, & charitatis excellentiam cognoscimus, & prædicamus, unde ad populorum institutionem duci potest, & penè sub oculos poni conditoris Maestas, Redemptoris benignitas, Patris misericordia, iudicis seueritas, æternæ vitæ per diuinorum præceptorum obedientiam felicitas, & sempiternæ damnationis propter præuaricationem confusio. quæ docentur in Academijs, & disceptantur in scholis, & inter scholasticos agitantur, sint inter illos, qui ingenia exercent, & animos acuiunt: In prædicatione instituuntur fidelium mentes, & studio pietatis vocentur ad mandatorum diuinorum observationem, ut virtutes Christianas colant, vitia declinent, & ad futura vitæ præmia implorato DEI auxilio contentis studijs aspirent.

Quæ si Prædicatores neglexerint, & moniti obseruare contempserint, Episcoporum diligentia, & sollicitudo curabit, ut populorum pie instructioni, & animarum saluti omnibus modis consulatur.

DE DIVINIS OFFICIIS.

DIVINA officia veterē Sanctorum Patrum instituto, ordine, & horarum numero ad omnipotentis DEI nomen colendum, & inuocandum disposita, quorum celebritate, & frequentia in militanti Ecclesia Triumphantis figura, tanquam exemplaris imitatione exprimitur; ita decet tractari, ut cordis mundities adsit, moderatus, & penē Ecclesiasticus corporis cultus, index plerunque illorum, quæ sunt in animo, non desideretur: deuotio autem, & quædam compositio actionum sacrarum non absit.

Eminet autem inter omnia, quæ sacris habentur mysterijs, & actionibus, Missæ sacrificium, & rei dignitate, & Sacerdotis præstantia, & fructus excellentia: Dominus enim noster IESVS CHRISTVS Unigenitus Patris, candor æternæ lucis, & figura substantiæ illius, portans omnia verbo virtutis suæ, tanquam Sacerdos constitutus à DEO secundum ordinem Melchisedech in æternum, cum ingrederetur in Sancta Sanctorum per sanguinem suum, semel se ipsum in Ara Crucis morte intercedente DEO Patri obtulit in redemptionem earum præuaricationum, quæ erant sub priori testamento, ut repromissionem accipiant, qui Vocati sunt, æternæ hereditatis. hoc verò sacrificium, quod semel cruentè oblatum est, & memoria, ac representatione in Ecclesia frequentatur, & usque in finem sæculi permanebit, cuius salutaris virtus in remissionem eorum, quæ à nobis quotidie committuntur, applicatur, quanta deceat spiritus innocentia, reuerentia,

metu, humilitate tractare, res ipsa indicat, ipsa loquitur, & contestatur.

Episcopus autem, qui ceteris antecellunt dignitate, & officio, toti anteire Clero decet mysterij huius frequentatione, ac Missæ celebratione; ut enim statis solemnitatibus Episcopus Pontificales Missas agere conuenit, diebus præsertim, quibus præstantiora in Ecclesia mysteria DEI celebrantur, nec omittere, quod ab officio exquiritur, & Episcopali dignitati certa Ecclesiæ obseruatione impositum est; ita optandum, ut reliquis festis anni, & feriatis etiam diebus frequenter, & publicè, legitimo non obstante impedimento, Missæ sacrum faciant: inde fluent fructus admirabiles ad suscipientium mentes, ad inferiorum exemplum, ad populorum subsidia spiritualia.

Qui Ecclesias curatas obtinent, debent hi quidem festis omnibus diebus, & reliquis tam frequenter, ut muneri suo satisfaciant, Missas celebrare: in quo si defecerint, statuimus Episcoporum vigilantia, ac studio penes etiam propositis; ac, si necesse fuerit, infligendis urgeri; ut, quò fuerint negligentiores, opportunis eò remedijs accuratiores fiant.

Qui ad Sacerdotium promoti sunt, & impedimento non laborant legitimo, quominus Missam celebrare valeant, decernimus Episcopi diligentia curari, ut diebus saltem Dominicis, & festis solemnibus celebrent; multo verò diligentius, si beneficium etiam simplex habeant, cuius causa sacrum facere teneantur.

In celebratione Missæ, etiam edicto, & penes propositis,
Episcopi

Episcopi caueant, ne Sacerdotes alijs, quàm debitis, horis celebrent, ne ueritus alios, aut alias caerimonias, & preces in Missarum celebratione adhibeant prater eas, quæ ab Ecclesia probatæ, & frequenti, ac laudabili usu receptæ sunt. quadrundam Missarum, & candelarum certum numerum, qui magis superstitioso cultu, quàm uera Religione inuentus est, omnino ab Ecclesia remoueant.

Auaritiam, quæ est idolorum seruitus; irreuerentiam, quæ ab impietate non abest; superstitionem, falsam pietatis imitationem, ab Ecclesia agro radicitus euelli conuenit: tractentur sacra interiori cordis mundicie, & puritate; & exteriori deuotionis, ac pietatis studio: pestis uerò illa, quæ diuturna rerum corruptione usque ad tremendam Domini mensam peruenit, & sancta penè inuasit; erit sedulitatis Episcopalis curare, ut longissimè abigatur.

Debent uerò, ne dispar appareat, & incompressa celebrationum actio, diligenter Episcopi prospicere, ut quamprimum in Ciuitate per præfectos caerimoniarum; extra Ciuitatem per Archidiaconos, seu Vicarios Foraneos reuideantur, & examinentur Sacerdotes super modo, & actione celebrandæ Missæ; & quæ fuerint corrigenda, corrigant: ut redigatur omnium, & singulorum celebratio in eam formam, in qua nihil dissimile, nihil difforme appareat: & una sit inter omnes celebrationis ratio, ut est una Missalis, & Rubricarum ad sacrum faciendum præceptio. contumaces, & inobedientes pena coercendos esse debita declaramus.

Ac in primis decernimus in Sacerdotum consecratione animad-

animaduertendum, ut illi ad Missam celebrandam accedere minime permittantur, antequam à præfecto carimoniarum de tota actione examinati, & probati fuerint. In Missis autem novis, quod ad auaritiæ labem pertinet, importunas, & illiberales eleemosynarum exactiones, potius quàm postulationes, aliaq; huiusmodi, quæ à simoniaca labe, vel certe à turpi quaestu non longè absunt, omninò ex Tridentini Concilij Decreto prohibemus, & per Episcopos prohiberi mandamus.

Priuatim in domibus, atque omninò extra Ecclesiam, & ad diuinum tantum cultum dedicata Oratoria ab Ordinarijs designanda, & approbanda, nec non altaribus, quæ sub dio, aut porticu Ecclesiæ sunt, & in Missali non edito à Pio Quinto celebrari Missas nec suadet ratio, nec pietas patitur. ita Episcopi faciant, & exequantur.

Ut autem Missas, quæ in Ecclesijs Cathedralibus, & Collegiatis celebrantur, decet hora conuenienti, & statuto ordine ad publicum Ciuitatum, & locorum commodum celebrari seruato rotulo, quod in omnibus omnium Ecclesiarum Sacristijs conseruari debet; ita in Parochialibus opportuno tempore, non ad aliquorum instantiam, sed communem piorum consolationem celebrandæ erunt. In omnibus Cathedralibus, & Collegiatis insignibus Ecclesijs, decernimus, ubi non est punctator ad Missarum defectus notandos, quamprimum Episcoporum diligentia constitui, cuius munus sit, diem, & defectum notare, & ex parte penarum, quæ exiguntur, Missarum defectus supplere, reliqua in Sacristiæ, vel Ecclesiæ ornamenta impendere. De Parochorum defectu inuestigent diligenter Archidiaconi,

coni, seu Vicarij Foranei intra fines attributa regionis; & si corrigi facile poterunt, corrigent; si minus, ad Episcopos deferant, ut adhibeatur medicina, quæ sanare morbum possit.

Peregrinos, seu alienæ Diœcesis Sacerdotes in Prouinciam Aquileiensem, nec ad Missam celebrandam sine commendatijs proprij Ordinarij ex Tridentini Concilij Decreto non esse admittendos decernimus.

De Missa Conuentuali, quæ celebratur in Ecclesijs Cathedralibus, seu Collegiatis, quia multa sunt, quæ distinctionibus, & declarationibus, ut apte decernatur: agendum putamus primum de quibusdam, quæ ad Collegia, seu Capitula Ecclesiarum spectant; ac de Chori disciplina, & ordine; postremò etiam de Missa Conuentuali, ut ex hoc capite aliquid ducatur, quod ad Ecclesiasticam disciplinam conformandam pertinere potest.

Ecclesiasticas Vniuersitates, seu Capitula Ecclesiarum tam Cathedralium, quàm Collegiatarum; quæ tanquam corpus membris aptè compactum, & coagmentatum motu agi, & tanquam spiritu vigere necesse est; sine ordine, quæ illarum vita est; & legibus, quarum vi aluntur, & conseruantur; stare nemo posse affirmabit: est tamen in ipso statu defectus, & inclinatio quædam rerum; dum, quæ ante constituta fuerant, pro temporum qualitate, & varietate mutationem desiderant; & quæ seculis præteritis opportuna habebantur, nunc perniciosæ sunt, & novarum Constitutionum dispositione tolluntur. Hanc ob causam statuimus singulorum Capitulorum tam Ecclesiarum Cathedralium, quàm Collegiatarum statuta, constitutiones,

tutiones, & consuetudines, quæ tamen à Sede Apostolica non fuerint confirmatæ, quamprimum ab Episcopis proprijs examinari accuratè debere, ut ex statutis, & constitutionibus, seu etiam Decretis Capitularibus illa, quæ desuetudine obsoleuerunt, decerpant; quæ præsentis temporis vsu perseverant, unum in corpus redigi curent: ista verò etiam, quæ retinentur, reuideant, & perpendant, ne sint contra iuris ordinem, aut sacri Concilij Tridentini Decreta, aut Pontificiarum constitutionum statuta, & ita corrigant, ut varia quadam similitudine conueniant; & si quid aut ultra ius commune sit, aut præter, aptè consentiat, & quasi concentum, qui ex diuersis numeris, & modis constat, efficiat.

Consuetudines etiam scripto exceptas perpendi decernimus, an rationabiles, & honestæ sint; si qua declinarit à ratione, & contra iuris ordinem emerferit, & abusu confirmata iniustam legis speciem usurparit; tolli de medio præcipimus. quod erit proprium Episcoporum munus, ut in suis Ecclesijs curare studeant: satis enim constat abusu, quo inueteratior est, eò facilius adulterina specie honesta omnia corrumpi.

His positis fundamentis Episcopi partes erunt, cauere, ne quid in Capitulorum congregationibus aut proponatur, aut recipiatur, quod sit contra ius expressum, aut sacri Concilij Tridentini statuta, aut Constitutiones Pontificias, proposita pæna proponentibus, præter penam nullitatis quorumcunq; actorum. Quod in sua Diœcesi quisque pro opportunitate, ac etiam necessitate locorum, & rerum particularium inspectione præstare, & efficere commodè poterit, ac debebit.

In humanis, ut bene omnia consentiant, si ratio quædam constans desideratur; qua particularia metiri, & moderari possimus; multo quidem iustius in sacris, & diuinis debet esse certa quædam agendorum norma, illaq; non arbitrio subiecta, sed lege constanti comprehensa; ut sit certa unitate potius, quam similitudine conformata, quam sequantur omnes. Quamuis autem Pij Quinti Constitutione de Romano Breuiario edita cautum sit, ut, qui supra 200. annos proprium habent officium, uti eo possint, nec debeant compelli, ut horas Canonicas de Breuiario Romano recitent; tamen ratio peragenda sacræ rei, & illa, quæ tantopere DEO placet, consensio uniformi ritu recepta, maxime suadet; ut in Aquileiensi Prouincia statuatur unica laudes DEO canendi, & sacra obeundi officia forma. In nostra Metropolitana Ecclesia Aquileiæ de proprio Breuiario caneantur superioribus annis Canonice horæ; & erat proprium etiam Missale; atque alibi proprii adhibebantur in Diœcesi nostra quidam ritus antiquissimo usu recepti: at vetera, quæ non omnino sincera comperita sunt, & penè desuetudine collapsa, recesserunt, & iam noua sunt omnia. Sanctam Romanam Ecclesiam magistram, & matrem agnoscimus: hanc, ut reliquis, etiam ritu, & ministerijs Ecclesiasticis modò sequimur: vix enim sit, in huiusmodi particularibus Ecclesiarum, aut locorum officijs, quin aut Apocriphum aliquid, aut erroneum deprehendatur. Decernimus igitur, ut in tota Aquileiensi Prouincia, in Ecclesijs Cathedralibus, Collegiatis, Parochialibus, & alijs quibuscunque tam publicè, quàm priuatim in posterum horæ Canonice ex Bre-

D mario

uiario Romano sub Pio Quinto edito recitentur; ac declaramus recitantes obligationi recitandi horas minime satisfacere, nisi de Breuiario Romano illas recitarint: quod item decernimus in Missali, Rituali Sacramentorum, & alijs obseruandum. De Sanctis, qui apud certos populos in veneratione sunt, declaramus intelligi, ut festos dies Sanctorum Patronorum, tam Prouinciæ, quàm Ciuitatum, & titularium Ecclesiarum celebrare solemini etiã ritu liceat.

Qui Illyricam oram colunt, Episcopi, in qua Breuiarium, & Missale lingua Illyrica in vſu habentur; curent, ut illa diligenter adhibitis doctis, & pijs viris, qui linguam illam callent, reuideantur, & emendentur. Optandum tamen esset, ut Episcoporum Illyricorum diligentia sensim Romani Breuiarij vſus cum Missali item Romano, & Rituali Sacramentorum induceretur: quod efficere pro eorum pietate, ac prudentia non erit summopere difficile, si iuniores Clericos, & ex Seminarij scholis scelectos, qui studio, & ingenio magis proficiunt, exercere sensim ceperint, & ad opus hoc pium studiose promouerint. hæc in optatis. exequutio præscribi non potest: præscribet autem prudentia illorum, & singularis in DEVM pietas. Satis erit, si sibi persuaſerint, quod passim experimar in librorum Latinorum, & Italicorum lectione, illos libros mendis scatere, multo verò plures probabili coniectura errores esse in illis, quàm in nostris, quos quamplurimi legunt, & ijdem emendant: illos autem pauci, & illiterati, qui corrigenda dijudicare non norunt.

Quæ autem de Breuiario, Missali, & Rituali Sacramentorum

rum statuimus, in eam volumus partem accipi, ut non comprehendant Catechismum Romanum in Illyricam linguam Gregorij XIII. iussu (quod est ad nos per certos homines allatum) conuersum: quem cupimus à Clero Illyrico frequenter tractari, & legi; ut sit hic materna lingua Sacerdotibus Illyriae in promptu ad populos docendos, quæ ad salutem necessaria sunt. Curent tamen Episcopi, ut exemplar aliquod eiusdem Catechismi emendatissimum in Archiuio Episcopali reponatur, ad cuius præscriptum emendatio recognosci, & approbari in futurum tempus possit, cum illa, quæ Catechismo comprehenduntur; ubi de articulis fidei, ac de Sacramentis tractatur; periculose alterius linguæ ignorance, seu impressorum vitio pateant; periculosius Verò nequitia hæreticorum, quorum corruptio, nisi ab Episcopis, qui Prouinciæ illius linguam non norunt, parato remedio conuinci possit, longius dimanabit.

Ut autem Illyricis populis prospiciendum est, ut Verbi Dei pabulum, quod ex prædicto Catechismo Curati haurient, habere possint; ita etiam curandum, ut caput primum de reformatione Matrimonij ex Concilio Tridentino cum impedimentis Matrimonij, & declaratione temporum, quibus nuptiæ prohibentur, habeant in linguam Illyricam conuersum: idemq; semel in mense promulgare, & declarare populo Dominicis diebus post prædicationem Verbi DEI Parochi curent. Idem de Doctrina Christiana illis gentibus tradenda omnino statuimus: quod Episcoporum vigilantia, & religioni serio committimus, & commendamus.

Non est in Ecclesia DEI, in qua perficienda naturæ per
D 2 gratiam

gratiam DEI viget ratio, non est vacuum, si in puris natura terminis non est: nec est dignitatum, aut officiorum institutio otiosa, ut species ostendet, quod actus non efficit: nec residere, aut interesse iuxta sinceram, & rectam Canonum intelligentiam censentur, qui interessendo nihil eorum, quæ ad suum pertinent officium, exequuntur. proinde cum dignitatum, & Canonicatum institutio ad ministeria Ecclesiastica, & sacra facta sit, ut obtinentes obire illa debeant non modo in psalmodia, ut in Choro ad psallendum instituto hymnis, & canticis DEI nomen reuerenter, distinctè, ac deuotè laudent; sed etiam in alijs: diuina verò per se, & non per substitutos officia subeant: decernimus per Episcopos in tota Provincia diligenter curandum, ut pietate, ac diligentia urgeant, quo ista aliquando promptè exhibeantur: inobedientes, ac pertinaces distinctè cohibeant, & emendent.

Sicubi tam in Cathedralibus Ecclesijs, quàm in Collegiatis insignibus Præbendæ Canonicales hætenus per attributos ordines distinctæ non fuerunt, præcipimus Episcoporum diligentia, licet ex quotidianis tantum distributionibus constent, quamprimum adhibito Capituli consilio distingui, ut in Cathedralibus dimidia saltem pars Presbyteri sint; ceteri verò Diaconi, & Subdiaconi; in cuius distinctionis partitione æquum est seruari, ut Præbendis ijs, quæ uberores habent redditus, maiores etiam ordines attribuantur. In Ecclesijs verò, ubi est consuetudo, ut Præbendæ omnes Sacerdotales sint, hoc idē conseruetur.

Ordinibus autem distinctis præter hebdomadæ ordinariæ obligationem feriatis diebus per idoneos substitutos obeundam, festis

festis maioribus celebrante in Pontificalibus Præfato Canonici Diaconi, & Subdiaconi seruato ordine Præbendæ suæ onus per se ipsi sustineant. Decani Verò, & qui priores in Ecclesia dignitates post Pontificalem obtinent, solemnioribus diebus Præfato absente, siue impedito Conuentualem Missam celebrent. In nocte autem, & in Aurora Natiuitatis Domini non permittatur, ut alius celebret Missam Conuentualem, qui non sit Canonicus.

Ad Episcopos autem decernimus pertinere ordinem, ubi iam non est, certis quibusdam regulis instituire pro prædictis tam festis maioribus, Dominicis, & alijs per annum, quàm in unaquaque hebdomada obseruandis; pœnam etiam adijcere, & fabricæ, seu pio alicui loco applicare.

Ex duobus, quæ pertinent ad cultum diuinum sustinendum, quorum alterum respicit absentias illorum, qui residere in Cathedralibus, & Collegiatis tenentur; alterum pertinet ad diuinorum officiorum celebrationem: primum satis certum, exploratumq; proponimus, ut obtinentes in Cathedralibus Ecclesijs, aut Collegiatis dignitates, Canonicatus, Præbendas, aut portiones cuiuslibet statuti, aut consuetudinis vigore nullo modo ultra tres menses ab eisdem Ecclesijs quolibet anno absint, saluis ipsarum Ecclesiarum Constitutionibus, quæ longius seruitij tempus requirunt, sub penis à sacro Tridentino Concilio præscriptis. De secundo, quod ad debitum in diuinis officijs regimen spectat, de congrua canendi, & modulandi ratione; de certa lege in Chorum conueniendi, & permanendi, simulq; de omnibus Ecclesiæ ministris, ac tota Chori disciplina, cum arduum sit
 particulatim

particulatim decernere, quod ad vniuersam aptè possit prouin-
ciam accommodari propter varios diuersarum Diœcesium ri-
tus, & Statuta: singulorum Reuerendissimorum Episcoporum
Suffraganeorum nostrorum diligentiam excitamus, ut quisque
ex suarum Ecclesiarum obseruationibus meditetur, & spatio
sex mensium à die dimissi præsentis Concilij numerandorum,
aliquid conficiat, quod putet præcipue disponi posse ad cultum
diuinum conseruandum, & augendum, & omnes totius Pro-
uincie Ecclesias communi disciplina conformandum; quod sin-
guli effecerint, id cum singulis Diœcesibus, & Ecclesijs confe-
retur, ac DEO fauente demum confiet aliquid, ex quo pos-
sit elici vniuersæ Prouincie communis diuinorum habendo-
rum norma.

His, quæ studiosè collegerint, adiçiant remedia, quæ vel
usu fuerint recepta, vel ad usum accommodanda.

In Cathedralibus, & insignibus Collegiatis Ecclesijs ut
numero, & ordine ministrorum, augusta quædam rerum series,
qua mirifice assistentium animi capiuntur, proponitur; quæ nisi
præceptione regatur, & certa lege moueatur, incompressa spe-
cie, & summa deordinatione confusum aliquid efficit, quo ni-
hil sit videndi turpius, aut molestius; ita curandum, ut sa-
cra, & diuina certo ordine præfecto aliquo cærimonijs Eccle-
siasticis constituto peragentur. quod ut in omnibus Prouincie
Cathedralibus, & Collegiatis insignibus Ecclesijs in promptu
habeatur, decernimus ex Mansionarijs, vel Capellanijs, quæ
onus residendi in eisdem addictum habent, primo quoque tem-
pore vacantem in præfecturam cærimoniarum Ecclesiastica-

rum

rum institui, & de ea perpetuis temporibus provideri aliquem, qui in huiusmodi studio versatus sit, & actorum Ecclesiasticorum directionem, & sacrarum dispositionem suslinere pro dignitate intelligat.

Pœnitentiarios in Ecclesijs Cathedralibus, & insignibus Collegiatis ad piorum consolationem, & lapsorum spirituale subsidium in promptu esse decet: idcirco Episcopi Pœnitentiarium cum unione præbendæ proximè vacaturæ ad præscriptum Concilij quamprimum instituunt.

Qui in Ecclesiam ad laudes DEO persolvendas ex Clero conveniunt, quo ceteris officio, vel dignitate præsumt, eò debent accuratius exequi, quæ sibi sunt ratione officij adiecta. ipsi verò diligenter intendant, & intelligant, se Chori interessentia adstrictos, ut salua non possint conscientia temporale, quod ex distributionibus percipitur, commodum assequi, nisi Divinis ritè servierint, & ministrarint. Si quis igitur, dum diuina peraguntur officia, in Choro Canonicus, seu Mansionarius, aut aliquis alius quocunque censeatur nomine Clericus, quacunque sit præditus dignitate, cum superpellico, aut etiam sine per Ecclesiam diuagari, colloqui, literas legere, aut alia tractare non omiserit, eum decernimus, (licet postea in Chorum ascenderit) omnino absentem reputari pro matutino, vel horis diurnis, vel vespertinis, quibus prædicto modo deliquerit: punctatori verò districtè precipiant Episcopi sub pena suspensionis, ut ex officio tales punctent, ac toto illarum horarum lucro privatū in libro suo notent. quod idem ad alios extēdi decernimus, qui stallo nō suo permanserint in Choro, dū diuina celebrantur.

Quia

Quia verò licentia, & abusu factum, ut serò in Chorum accedant, qui tempestiuè interesse deberent, ac nisi certa aliqua regula præstituat, inconuenientia in dies augeri singulos dubitandum: decernimus eos, qui in matutinis in Chorum ascenderint post finitum primum hymnum; in horis diurnis item post hymnum: in Missa post confessionem: in Vesperis post completum psalmum, pro interessentibus non esse habendos, sed lucris, & distributionibus dierum, & horarum prædictarum, quibus in Chorum tempestiuè non ascenderint, omnino multandos. in quo Episcoporum diligentiam excitamus, ut serio agant, & pœnis punctatores suarum Ecclesiarum ad præfati decreti executionem omnino adigant. quod declaramus non obtinere locum, cum Episcopus in Chorum ad diuina officia ascenderit: hoc enim casu decernimus quoscunque seruitio Chori adstrictos cuiuscunque dignitatis, & officij sint, in principio diuinorum officiorum interesse debere. Qui postquam Episcopus iam confederit, in Chorum venerit, cum declaramus illarum horarum lucro omnino damnum.

Quæ verò diuino cultu peraguntur, quia loco indigent apto, & commodo, ut etiam cum dignitate peragantur, præcipimus omnibus, & singulis Episcopis, diligenter curent, & omnino intendant, ut Chori Ecclesiarum præcipuè Cathedralium, aut etiam Collegiatarum insignium (ubi non sunt) ita extruantur, seu reparentur, vel etiam aptentur, ut res fieri sacra disposita commoditate, & cum dignitate possit. ad quæ perficienda excubabunt Episcopi, & quos necesse erit, etiam opportunis remedijs contento studio compellent.

Ut

Ut absurdo, quod alicubi viget, occurratur Episcopali vigilantia; decernimus, eos, qui ratione vel Mansionariae, vel Capellaniae perpetuo Chori seruitio in Ecclesia Cathedrali, seu Collegiata sunt addicti, & solemnibus diebus, aut etiam festis, quibus Episcopus in Ecclesia diuinis interest officijs, ad alias Ecclesias se conferunt lucri causa, negligentes, quod minus est, ut maius acquirant, cum dedecore ordinis, & Ecclesie, cui sunt adscripti, iniuria, irremissibiliter lucro totius distributionis illius hebdomada, in qua deliquerunt, plectendos esse: quod si saepe idē in hebdomada commiserint, statuimus per Episcopum ita prouideri debere, ut corrigatur omnino peruicacia, clericalis modestia reformetur, & Ecclesie seruitium debitum conseruetur.

DE RESIDENTIA EPISCOPORVM.

ECCELESIASTICI summa gubernij est gloria DEI, & salus animarum: utrunq; diligenter tractandum, cum negligentia in re tanta maledicti piaculo subiiciatur. Ut autem diligentia in agendis rebus etymo quodam vocis dilectionem, & charitatis notam primis litteris inscriptam habet; ita, quae flocci facimus, etiam negligimus: ac exhibitio operis probatio est dilectionis. Episcopos autem, quos in specula Dominus constituit, ut gladium venientem prospicientes tuba canerent, & populos mōnerent, ne sanguis per-euntium de manibus illorum exquiratur; si gregem amant Dominicum, probare dilectionem opere decet: si vigilantia, & custodia solitudine laborant, hoc putent, quod socordia
E perdiderint,

perdiderint, se districta ratione reddituros. Duo tamen requiruntur in Pastore gregem custodiente; ut interdiu ante gregem incedat, ipse vnus ad pascua educens, cuius vocem agnoscunt oues, quæ alienam non nouerunt: nocte vigilias agat, cui dicitur custos quid de nocte? ac ne repente in gregem irrumpan lupi, canes ad custodiam adhibeant, illos quidem non mutos, sed qui latrare valent; quod quidem ad Episcopalis oneris officium pertinere nemo non videt. Idcirco sacra Tridentina Synodus Episcoporum apud Ecclesias suas residentium præsentiam quanti referat pernoscingens, illos monuit, ut sibi attenderent, & vniuerso gregi, in quo Spiritus sanctus illos posuit regere Ecclesiam DEI, quam acquisiuit sanguine suo, & diuinorum præceptorum memores facti forma gregis in iudicio, & veritate pascere, ac regere; in eos verò, qui ab Ecclesia, & residentia discesserint, quadam sanxit, quæ pertinaciores coercerent, vel alieniores ad officij sui studium reuocarent. Existimamus autem de Reuerendissimorum Episcoporum nostræ Prouinciæ pietate non esse dubitandum, immo credendum, illos, qui hætenus voluntate in sua Ecclesia, & Diocesi resederunt, & muneri Episcopali promptam operam, & fidele ministerium præstiterunt, in posterum diligentius idem facturos; ut, quæ de contumaciter absentibus à residentia sua eodem Concilio sancita sunt, aliò potius, quàm in Prouinciā nostrā, deriuari conueniat.

Quod verò de Episcoporum residentia à sacro Tridentino Concilio, & summorum Pontificum constitutionibus cautum est; hoc non est intelligendum, ut præsentia assideant, nihil præterea

præterea agant : cum ex sacris Canonibus residentia sit accipienda in eum sensum , ut sit laboriosa , non otiosa : id quod duobus præsertim Tridentina Synodi verbis egregiè exprimitur , ut pascant , & regant : quorum primum ad vitæ innocentiam , ad salutaris verbi prædicationem , ad sacramentorum administrationem , & bonorum operum exemplum pertinet : secundum ad disciplinam restituendam , ad mores purgandos , & iuris Ecclesiastici ditionem , ad bonorum laudem , & vindictam malorum sustinendam spectat . Utrunque si præstiterint Episcopi , satis illa , quæ sunt Episcopalis muneris , videbuntur præstitisse , & implessè .

Debent autem ab Episcopali domo , (ut à capite reformatio incipiat) initia correctionis duci , ut illi , qui vel ad ministerium gubernij adsciti sunt , vel Episcopo serviunt , vel ad quæcunque domus , & familiæ commoda pertinent , suo quisque gradu modestiam illam vitæ , moribus , habitu , pietate , conversatione præ se ferant , quæ bene Præpositum familiæ decent , ut à familia Episcopali sumant cæteri exemplum domesticæ rei bene , & laudabiliter tractandæ .

Qui ex eadem familia sunt , & clericalem habitum deferunt , ex quibus pars maior Episcopalis familiæ constare debet , præluceant reliquis virtute , & integritatis ornamento : quod sæpe Episcopi reuideant , recognoscant , emendent : putent verò maximum sibi fore ex hac parte ad reformationem impedimentum : si , quod in alijs animaduerterint , & corrigere voluerint , familiæ suæ , quam prius informare disciplina debuerant , obijci verè possit .

Ac, ut frequenter sacrum facere debent Episcopi, nisi impedimento rationabili teneantur; ita Dominicis, ac festis diebus ad Veterum Canonum præscriptum Ecclesiæ Cathedrali, quoad fieri potest, deesse non debent, ut populus Prælati benedictione, & exemplo animatus, quam præscripserit Prælatus pietatis, & deuotionis regulam, & exemplo confirmarit, eam piè arripere, & solitè sequi studeat. ac dum in Choro diuinis Episcopus interest, curet, ut disposito rerum ordine nihil sit vel confusione turbatum, vel deordinatione inuersum.

Quod ad ministros Ecclesiasticos, & Ecclesiarum ornatum pertinet, curent Episcopi, ut in Clero suo ex habitu Ecclesiastico pietas, ex conuersatione sinceritas, & innocentia colligatur, ut CHRISTI bonus odor ita benè oleat, ut nihil omninò malè oleat. sit in unoquoque gradu quadam conditionis proportio; illa quidem par gradus, forma non dissimilis, ut qui totam inspexerint Prouinciam, unicam omnino videantur familiam videre officiorum, & studiorum varietate distinctam; at vero uni patrifamilias subditam, & eisdem legibus conformatam.

Ut verbi DEI prædicatio, quod est vitæ spiritualis pabulum, fidei principium, bonorum operum fundamentum, præsentia Episcoporum incrementum accipiat, & uberiores in singulos dies pœnitentiæ fructus in fideli populo ferat; statuimus per Episcopos omninò (ubi fortasse non est) sedile in Ecclesia suggestui Prædicatoris è regione respiciens altiore aliquo gradu constitui: ubi Episcopus cum suis Canonicis superpelliceo indutis
ad

ad prædicationem audiendam sedeat. Prædicationi Episcopus, si legitime impeditus non fuerit, quotidie intersit, & exemplum præbeat pietatis, ac deuotionis. Quia tamen ad clericalem statum pertinet, omnibus pietatis officijs cæteris antecellere, & prædicationi interesse: ac, si seculares sua sedilia pro prædicatione audienda, vel communia, ut Magistratus, vel propria, ut priuata personæ in Ecclesia habent, Ecclesiasticos homines loco, & sede carere in Ecclesia etiam extra Chorum cum non deceat, Episcoporum diligentia proponimus, & suademus, ut prope sedile proprium, quatenus fieri poterit, alterum apte constructum accommodent ad Clerum recipiendum: ex quo duo consequentur apud omnes magni æstimanda: primum erit, ut Episcopo notum sit ex sola loci inspectione, an Clerus ad prædicationem conueniat; ut, si defecerit, opportunè etiam prospiciat: secundum erit, ut populus, qui Clerum prædicationes declinantem aliquando perspiciebat scandalum offensionem passus est, ipsius Cleri emendatione, & frequentia acrius ad imitationem incendatur.

Atque hoc ipsum, ne suo fraudetur euentu, diligentia Episcopi sustinendum decernimus; ut ante prædicationes Clerum moneat, tardiores excitet, omnes, qui iusto carent impedimento, ad prædicationes adducat, pertinaciter inobedientes, ut resipiscant aliquando, etiam coërceat. graue enim videri iure posset, dum reliqui ad verbum DEI audiendum sollicitè confluent, si Clericos videamus per vicos, & plateas errare, & secularibus rebus operam dare, ac nullius prouisione, & decreto ad meliorem mentem reuocari.

Idem

*I*dem curandum monemus, cum festis diebus diuina celebrantur officia, ut omnes Cleri Ciuitatum (exceptis Reſtoribus Parochiarum, quibus eſt animarum perpetua cura impoſita: & ijs, qui obligatione alicuius Eccleſiæ tunc temporis obſtricti ſunt) niſi fuerint ex ipsis aliqui legitimo impedimento detenti, in Eccleſiam Cathedralẽ, ſeu Collegiatam reſpectiue tam ad horas diurnas, & Miſſam Conuentualem, quàm ad Veſperas conueniant: nihil enim poteſt videri abſurdius, ſi ſeculares diuinorum officiorum tempore Eccleſiam frequentent, Clerici refugiant: illi DEVM vel tacitis vocibus in Eccleſia laudent; iſti in vijs, & publicis locis tempus vaniloquijs terant, & boni auerſione ſcandalum prabeant.

Quod ut executione facili perficiatur, hortamur Episcopos, ut illam rationem, quæ ad rem fuerit accommodatior, ineant.

Non omittant Episcopi Seminaria inuiſere, ac diſciplinæ, morum, & pietatis documenta, quibus puerilis ætas informatur, recognoscere, & adhibito Canonicorum conſilio, quos ad gubernij partem adſciuerunt, proſpicere, ut fructus, qui à Seminariorum erectione, & conſeruatione percipitur, omnino non pereat. Seminarij Clericos ad Cathedralium Eccleſiarum, aut etiam Collegiatarum ſeruitium feſtis diebus adſcitos non permittant officium deſerere; aut, occasione accedendi, & recedendi, per Ciuitatem diuagari: ſed modeſtiæ, & Eccleſiaſti- cæ diſciplinæ lege moderentur, & contineant.

Doctrinæ Chriſtianæ ſocietates, & exercitationes aliquando viſitari ab Episcopis decet, ut vel auoſtritate, vel præſentia rem tantam, quæ alicubi difficultatem patitur propter
patrum

patrum negligentiam, & petulantiam puerorum, omnibus pro-
uehere studijs contendant. quod si fuerint impediti, Vicarios
generales, aut etiam foraneos ad hanc visitationem dimittant,
ut, quod est Christianæ fidei, ac disciplinæ fundamentum; &
certa ad omnem vitam cum virtute traducendam ratio, vi-
gilantia, & solitudine Episcoporum conseruetur, & certis
præfidijs muniatur.

Congregationes casuum conscientie singulis coram se mensi-
bus haberi præcipiant, ad quas omnes Curatos, & Clerum Ci-
uitatis aduocabunt, & renuentes compellent iuris medijs, atque
pro his proponi casus tempestiuè, & Clero per schedas denuncia-
ri curent, ac decisiones à Theologo, quem adsciuerint, super eo-
rum singulis ferri mandabunt.

Aegrotantium visitationes, eorum præsertim, qui Prælati
præsentiam, aut benedictionem in extremo vitæ statu expo-
scunt, aut aliqua ratione possunt vel iniuriarum dimissione,
vel rei alienæ restitutione, vel erratorum atrociorum absolu-
tione ad bonum adduci, libenter Episcopi suscipiant, & ex cha-
ritate obeant. Ad quod munus accedere æquum erit parato ad
cobortandum, monendum, corripiendum studio, ut animas
Domino lucrifaciant; ne diuertant sermone ad humanas tri-
cas, nisi necessitas compellat: orationis scopus in unum Deum,
& animarum salutem intento sermone dirigatur, & subsidia
proponantur spiritualia, ut corporis ægritudo toleranter per-
feratur, quo DEI gloriæ seruire, & peccatorum maculas ab-
stergere valeant; in quo abundet Episcoporum charitas, &
Christiana solertia.

Pauperum,

Pauperum, & miserabilium personarum curam paternam gerant Episcopi, ne destituta ab eo, qui communis debet esse pater, custodia, & charitate; quæ sunt propria Prælati munera; in mala varia, & duras incidant calamitates, nec sit, qui in volutabro miseriarum iacentibus manum admoueat; si Episcopus non admouerit, & beneficentiæ Christianæ exemplum dederit.

Ea est rerum humanarum inconstantia, & imbecillitas, ut nihil sit inter homines ita firmum, & munitum consensu, lege, natura, quod veritati, & casui non subiiciatur, nec potest cuiquam permanendi status præscribi, quin repentinæ insistent, & exoriantur causæ, eaq; cum ratione consentientes, ut discedere oporteat, & expediat. Idcirco licet Episcopis residendi apud suas Ecclesias, & in Diœcesi Concilij Tridentini Decreto, & grauissimo Pontificiarum Constitutionum præcepto necessitas imposita sit; cum tamen Christiana charitas, vrgens necessitas, debita obedientia, ac euident Ecclesiæ, vel Reipublicæ utilitas suaserit, ut Episcopi ab Ecclesia, & Diœcesi abesse cogantur, non illam ob causam contumaciæ redarguendi, si causas absentiae probatas attulerint ad excusationem, quas, quia incertis à rebus pendent, definire vel superuacaneum, vel incertum, & indefinibile putamus.

Quod ad causas absentiae pertinet, id fiat, quod Tridentino Concilio sancitum, & declaratum est, cuius dispositionem in omnibus declaramus seruandam, & exequendam.

Qui in scitia laborant, & ambitiosa nobilium potentia nituntur, cum vel ad ordines, vel ad beneficia aspirant, commendatitias

mendatitias literas undique collectas ad praesidium incitiae suae adsciscunt. Duo vero, quibus est occurrendum, efficere conantur, ut imperitiam his suam fulciant adminiculis, aut Praelato liberam disponendi facultatem adimant, vel eundem in difficultates adducant. Idcirco statuimus, & declaramus omnes, & singulos commendatitiarum literarum perquisitores, & presentatores, siue ad ordines, siue ad beneficia aspirant, quandoque pro praedictis commendatitiis praesentarint, tunc temporis ad eadem, quae tum petunt, quamvis alia idonei essent, non promoveantur.

Capellae, & Altaria de iure patronatus laicorum incompta, & inculta, decet omni ratione ornari. Patronos autem Episcopi iuris medijs compellant, ut quae debent, omnino à parte sua impleant.

Præterea vigilijs Sanctorum, & festorum dierum, quibus ieiunatur, præcedente Vespere signo campanae intimetur populis ieiunii futuri observatio, ut ignorantiae prætextus excludatur. Quod Episcopi Parochis indicent omnino exequendum.

DE RESIDENTIA CVRATORVM.

QVI curam animarum officio susceptam habent, rei debent, quam sustinent, quae singulis periclitatur momentis, presentem operam dare, atque hi quidem ut corporali insistant residentia, ita pijs debent conatibus urgere, ne quid propter illorum incuriam, aut nequitiam pereat, & reddendae rationis obligatione malum custodem
F obstringat.

obstringat. Debent Curati meminisse, datos populis mediatores inter DEVM, & homines, ut sacra frequenter facere pro Ecclesia sancta DEI, & populo sibi commisso non omitant; ut verbum DEI, cuius dispensatores facti sunt, inculcare in animis fidelium non desinant, ut sacramenta petentibus vel ministrare, vel proponere, & suadere maxima diligentia studeant, ut vitæ integritatem in exemplum alijs præstent, & quasi lucernis ardentibus viam demonstrent, qua per diuinorum mandatorum obseruantiam in cælum ascenditur.

Sacra festis diebus facere Curati non omittant: reliquis verò tam sæpe, ut muneri suo satisfaciant. Sacramenta omnia ex Romano Rituali ministrent, ut in Breuiario, Missali, Sacerdotali, Rituali, & alijs sanctam Apostolicam Romanam Ecclesiam magistram, quæ non fallitur, & matrem, quæ materna dilectione filios non amare, & salutaribus non pascere alimentis non potest, omnino sequantur.

Duo sunt fines in humana fragilitate; ingressus in vitam, & exitus: his tanquam curriculi huius finibus vita præsens terminatur; utrobique Curatorum vigilantia, & Christiana charitas requiritur. Cum enim ingredimur in hanc vitam, ærumnis, & periculis refertam, iræ filij, spei salutaris expectes, & renouationem regenerationis expectamus, præstò debet esse, qui Baptismi sacramento originalis peccati maculam abstergat, & in filiationem DEI, qua iuste primi parentis culpa damnati fueramus, restituat. Discessus ex hac vita, qui graui premitur erratorum pondere, & perpetui naufragij metu,

tu, nisi opportunè spiritualis medici pharmaco muniatur, & confirmetur, iure quidem postulat, ut dispensator, cui fuerat ministerij ratio commissa, dampni poena damnetur. Ad Patri-natum in baptismo non admittant Curati eos, qui saltem me-moriter non teneant orationem Dominicam, salutationem An-gelicam, & symbolum Apostolorum.

Sint igitur Curati diligentia, & fideli ministerio commen-dabiles; ut opus, quod tenent, diligenter sustineant, DEI, & Episcopi sui animadversionem subituri, si negligenter se ges-serint. Ac hi quidem extra Parochiae fines habitare non prae-su-mant; sed inter suum gregem diuerticulum habeant, ut in om-nes partes custodiae, & charitatis suae affectio commodè dima-net. In libro descripta habeant distinctè nomina Parochiano-rum per domos, & familias; confessioni, & communioni Pas-chatis Resurrectionis Dominica intendant; inter illos omnia obseruent, omnia circumspiciant, ut patres familias bene fa-miliae praepositi: si quem praesenserint corpore agrotare, pru-denter adeant, consolentur; ac ut medicus corpori subuenire medicamento properat, salutis monita prudenti, & maturo sermone, ac spirituales medicinas proponant, suadeant, mini-strent; nec ouem CHRISTI sanguine redemptam patian-tur inedia, & fame spirituali perire. Praeter libros, in qui-bus scribantur nomina baptizatorum, & confirmatorum, ha-beant Curati librum matrimoniorum, atque item mortuorum: usus enim iam docuit huiusmodi scriptiones ad multas, easq; maximas, etiam summè periculosas controuersias, tollendas pertinere.

De Ecclesijs, Sacristijs, Ecclesiastica supelleetili, & decenti illorum omnium cultu, ita curent, qui Parochialibus præsunt Ecclesijs; Ut nihil appareat sordidum, aut minus, quàm decet, nitidum.

A ceterijs vineas, & fructuosas arbores amoveant; nec intra solum sacrum venale quidquam proponi sinant: Ut re appareat, quod iam norunt per doctrinam omnes, esse domum orationis, non autem negotiationis.

Miserabilium personarum Parochia sua curam gerant paternam, præsertim verò ubi iuniores puellæ, aut viduæ sunt, quarum egestas graue periculum ostendit: atque in hoc ipso ita contendant, ut omnem etiam lapidem moueant; quò casui, qui videtur instare, summa charitate occurrant.

Domus Parochiales ordine, ac disciplina sint reliquis exemplum. Curati omnino ad quodcunque vel vile ministerium fœminas non adsciscant sibi in familiam, quæ aliquando infames corpore fuerint, vel infamibus domestico ministerio inseruierint, aut propter ætatem, & alia suspecta esse possint; matres etiam illos minimè recipiant, qui publici blasphemæ sint, aut scelerosi, aut saltem in Paschate confessi, & Eucharistiati non fuerint. De fœminis in Ciuitatibus præcipimus à Vicarijs generalibus Episcoporum huiusmodi ministras, præuia aliqua cognitione probari: in Oppidis, pagis, & Villis ab Archidiaconis, seu Vicarijs foraneis regionum.

Discessus Curatorum à Parochijs ut propter animarum curam, quæ singulis obijcitur momentis alicui periculo, est inhibendus; ita indulgendum necessitati, & temporum qualitati.

Itaque

Itaque sciant Episcopi, eorumq; Vicarij licentiam discedendi in scriptis, gratisq; non ultra bimestre tempus, nisi ex gravi causa, esse concedendam, sicut Decreto Concilij Tridentini statutum fuit. Ut autem in Ciuitatibus licentiam huiusmodi edicimus à Vicarijs generalibus in scriptis esse petendam; ita in Oppidis, pagis, & Villis petendam decernimus à proprijs Vicarijs foraneis pro facultate illis ab Episcopo limitatè concedenda. Si qua Verò fuerit legitima causa, quo minus Curatus aliquis apud Ecclesiam suam residere possit, erit illa quidem legitime coram Episcopo, aut eius Vicario generali probanda: & si fuerit ex illis, quæ iusta videri, & reputari possit, licentiam scripto authentico comprehensam dare licebit; quarum licentiarum vel longi temporis à residentia excusantium, vel breuioris ex causa momentanea, mandamus librum, seu regestum, quamprimum fieri, ut quandocunque licentie huiusmodi videri, ac revideri possint.

DE RESIDENTIA CANONICORVM,
& beneficiatorum, qui residendi obligatio-
ne tenentur.

MONEMVS omnes in Domino absentiam iure
permittente ex causis rationabilibus indulgeri, ut
humanis sit necessitatibus consultum; non ut Ca-
nonici ad luxum, & venationes, & illa, quæ modestiam cleri-
calem non decent, per occasionem indultæ absentie diffuant:
quod illos meditari apud se, & perpendere aequū est. Absentiam
ab

ab Ecclesia monemus omnino non suscipi Dominici Aduentus tempore, Quadragesimæ, Natiuitatis, Resurrectionis, Pentecostes, itemq; Corporis CHRISTI, atque ita dimitti, ut dimidia saltem pars Canonorum; saluo illorum iure, qui super his priuilegio fruerentur, Viridi obseruantia stabilito; in Ecclesia remaneat.

Si qua extra ordinem causa grauior, & longioris absentia necessitas, ex priuato etiam incommodo emerferit, illam decernimus ab Episcopo seruatis seruandis cognosci; interim ad perceptionem distributionum quotidianarum absentem nõ admitti.

Ac ut distinctè, quid hoc in genere vitandum, quid sequendum cognosci, ac decerni possit, statuimus, Canonicis, seu beneficiis sine cura obtinentibus, quæ residentiam personalem requirunt, si ætate maiores triginta annis fuerint, licentiam, ut proficiantur ad studia in gymnasiis publicis obeunda dene-gandam, nisi studia iam capta perficere continuato cursu perscuerarent: huiusmodi autem licentia non ultra quinquennium concedatur: studia verò debent esse sacræ Theologiæ, aut sacrorum Canonum. In quo monemus animaduertendum esse, ut beneficiorum onera interim per substitutum idoneum obeantur, & sustineantur. Obtinentes Ecclesias Parochiales decernimus omnino à licentia huiusmodi proficiscendi ad publica gymnasia esse repellendos; qui enim collationis tempore per concursum examinatus, & Canonicè promotus fuit, & publico examinatorum Synodali testimonio ad animarum curam exercendam idoneus habitus, dimittendus non est, ut discat, cum ad docendos alios prouectus fuerit.

Quia

Quia solent Capitula interdum Canonicis in longum absentiae tempus, annos etiam commentitijs causis, aut veris, sed non legitimis concedere, eisdem inhibemus, ne quid in posterum tale conari, aut tentare audeant. aliàs decernimus irritum, & inane, quidquid super praemissis actum, gestum, decretumve fuerit.

Quia verò interesse diuinis corporalem tantum praesentiam non requirit, ut quis actum praesentiae exhibeat, nihil praeterea agat, aut curet; praesenti constitutione edicimus; illos dici verè, & propriè residentes, qui ad Diuina in Ecclesiam conuenientes laudes persoluunt ex instituto Ecclesiae DEO; munera obeunt vel communia, vel propria; diuinis animo, ore, toto corpore intendunt. De quo superius capite de Diuinis officijs satis actum est.

DE EPISCOPIS.

IN DOMINI domo nihil praeposterum, aut inordinatum esse debet: ordo autem, & ratio dicat, ut quae in membris proportio, & symmetria desideratur, ea in capite praecipuè eluceat, & emineat, ne monstrum simile sit; turpe imponi caput bene composito corpori, quo membra, licet per se satis apta, dignitatem, & pulchritudinem amittant. Idcirco si res postulet, ut in Ecclesia electiva (ut vocant) agatur de electione Episcopi, quaedam constituenda duximus, ut tantae rei agenda, quantum licet, consulatur.

Sit igitur eligentium scopus, ut ad Cathedralis Ecclesiae regimen

gimen cum eligant, qui sit legitimo matrimonio natus, etate matura, grauitate morum, litterarumq; scientia iuxta Constitutionem Alexandri III. quæ incipit: Cum in cunctis. in Concilio Lateranensi promulgatam. Debet autem antea in vniuersitate studiorum magister, siue doctor, aut licentiatius in sacra Theologia, vel iure Canonico esse promotus, aut publico alicuius Academiæ testimonio idoneus ad alios docendos habitus. Si Regularis fuerit, à superioribus suæ Religionis similem habeat fidem. Saltem verò sex mensium spatio ante in sacro ordine constitutus. Promoti autem ad Ecclesias Cathedralles post receptam electionis confirmationem, ut munera Episcopalia obire, & gregis incolumitati consulere valeant, debent ipsi quidem munus consecrationis intra tres menses suscipere, nec differre ultra tres alios menses, ne vel fructus restituere in primo casu compellantur, vel in secundo priuationis pænæ subiiciantur. Consecratio verò si extra Curiam Romanam fiat, in Ecclesia, ad quam promoti fuerint, aut in Prouincia; si commodè fieri poterit; celebretur.

Ad electionem, qui ius eligendi habent, non procedant, nisi mortuo Episcopo, & vocatis omnibus, qui sunt in Prouincia, ut electioni Episcopi, quæ tanti refert, intersint omnes, qui ius habent, & ferre suffragium valent, & maiori, ac saniori parte Episcopi electio sustineatur.

Processum, & inquisitionem fieri de prædictis qualitatibus eligendorum sacra Tridentina Synodus disiricte præcipit, ad Sanctissimum D. N. cum fidei professione transmittendam, & ab eodem approbandam. Quod non modo ut fiat, sed, ut
bene

bene fiat imprimis curandum. Tota autem instructio à probatis viris, testibus omni exceptione maioribus sumenda, qui vitæ, morum, integritatis, pietatis, ac sedulitatis Christianæ certum testimonium reddant. Sit attestatio iureiurandi religione munita; sit ex officio recepta, & à personis ab officio assumendis, non à parte nominandis, & in publicum instrumentum redacta. Qui verò ex Capitulo examini, & inquisitioni præficientur, ab ipsomet Capitulo eligantur, delato eis iuramento facturos in examine obeundo, quæ iuxta veritatem, & iustitiam sunt, posthabito odij, amoris, affinitatis, & aliorum omnium respectu, ac nihil se ex ijs, quæ inquisitione perceperint, cuiquam præter ipsum Capitulum manifestum facturos. Ad postulationes confugere, & ineligibilem per carnem, & sanguinem exposcere, & iuris ordinem pervertere non expedit. Statuimus, in Ecclesijs electiuis ordinem iuris sequendum esse, ac tum demum ad postulationes Canonicas declinandum, cum electiones idoneorum præficiendorum defecerint.

In primis autem cum Ecclesia vacauerit, supplicationes, & preces publicè, priuatimq; habendas præcipimus à Capitulo per Civitatem, & Diocesim indicendas, quibus Clerus, & populus bonum valeat à DEO pastorem impetrare, quod est gubernij Ecclesiastici, & Christianæ discipline, & pietatis certissimum cum DEI gratia fundamentum.

Ac ut ea, quæ in membris est naturalis quedam consensio, ut inuicem seruiant, inuicem obsequantur; in corpore Prouin-

cia nostra charitas inter Episcopos vigeat, quæ DEO placeat, & populorum ædificationi consulat, decernimus, si quando diuina disponente prouidentia Metropolitanus, aut aliquis ex Episcopis Suffraganeis decubuerit, & in viam vniuersæ carnis declinare ceperit, ut ex iisdem Suffraganeis, qui proximior ægrotanti est, seu eo impedito, aut absente alius, qui minori spatio abest, Capitulo ægroti Episcopi significante, solícite accedat, ut Sacramenta, & spiritualia obsequia prudenter exhibeat, & præsens præsentem charitate consoletur Episcopali. Si æger Episcopus obierit, curabit idem, ut per æconomos, aut alios ex Capitulo tota sacra supellex, ornamenta Ecclesiastica, paramenta, vasa, missalia, atque huiusmodi alia, licet ex auro, seu argento confecta ad diuinum cultum etiam in priuatis ædibus, Capellis, Oratorijs destinata, quæ tempore obitus eius extabunt, Ecclesijs, de quorum fructibus facta fuerint, eo ipso applicentur, & incorporentur, sublata de eisdem testandi, seu disponendi facultate: Id quod Pij V. constitutione decretum est, & grauiter omnibus, ad quos pertinet, pro executione iniunctum.

De censibus, & redditibus dictarum Ecclesiarum non exactis, siue dies soluendi cesserit, siue non cesserit, modo exacti non fuerint, etiam si illorum fuerit exactio, in iudicio iam propo- sita, quod Iulij III. constitutione iam decretum est, hoc idem seruandum statuimus, ut scilicet ad successores Episcopos perti- neant. De fructibus verò non exactis legato, aut donationis titulo relictis decernimus, quod in declarationibus eiusdem Bullæ adiectis decisum, ac definitum est.

Defuncto

Defuncto Metropolitano, ab Episcopo, qui spiritualia illi obsequia prestat, dies obitus totius Prouinciæ Episcopis significetur, & in tota Prouincia dies illius depositionis magna celebritate sacrorum, & Cleri agatur. Si ex Episcopis aliquis decesserit, qui charitatem exhibuerit defuncto, ille idem Episcopus rem Metropolitano significet, qui toti Prouinciæ idem officium indicat. Ac ut Metropolitani postremo tempore defuncti anniuersarium in tota Prouincia quotannis fieri precipimus, & mandamus; ita in singulis Cathedralibus Ecclesijs de proprii Episcopi proximè defuncti anniuersario repetitum, ac dispositum intelligi debere dicimus, declaramus, & statuimus. æquum enim est, ut eos, qui nos dilectione paterna, & pastoralis affectione fouerunt, & ad omne bonum adducere perpetuis laboribus, & vigilijs conati sunt, grati animi memoria, & pijs obsequijs prosequamur.

Quod de anniuersario Metropolitani, & Episcoporum singulis annis celebrando decreuimus; hoc item de Metropolitani, & Episcoporum Suffraganeorum uincentium solemnium consecrationis die quotannis habendum, & celebrandum decernimus; ut preces publicæ, & supplicationes ipso consecrationis solemnium die habeantur; ac diuinæ clementiæ bonitas exortetur, ut gratiæ suæ munere gubernij Ecclesiastici ordo, institutio, & progressio procedat.

Dies verò tam anniuersarij Metropolitani, quàm Episcoporum, itemq; consecrationis eorundem in Calendarijs particularibus Episcoporum indicantur.

DE PAROCHIS.

PAROCHORVM ea est muneris, & obligatio-
nis ratio, quæ curam animarum vniuersam com-
plectitur, ut hoc ipso capite statuere de Parochis ali-
quid optimo iure decreuerimus. At verò cum ad reliquorum
custodiam Parochorum sollicitudo vocetur, debent hi quidem
non gregatim adscisci, aut inconsulto prouehi, sed Canonicè, id-
est maturè, & seruatis seruandis. Cum igitur quomodocunque
vacauerit Ecclesia aliqua Parochialis, quocunque censeatur
nomine curata, etiam si sit Vicaria vel temporalis, vel perpe-
tua, curam habens animarum annexam, siue sit libera collatio-
nis Ordinarij, siue de iure patronatus, decernimus, statim habi-
ta vacationis notitia, Episcopi partes esse, idoneum in ea Vica-
rium cum congrua eius arbitrio fructuum portionis assignatio-
ne constituere, qui onera ipsius Ecclesiæ sustineat, donec ei de
Rectore prouideatur. Quod si cui Collegio, aut Capitulo à san-
cta Sede indultum sit, ut casibus repentinis occurrente vaca-
tione alicuius Ecclesiæ Curatæ, ipsum met possit Capitulum de
corpore Cleri Ciuitatis aliquem ad curam in vacante Ecclesia
suscipiendam dimittere, donec Episcopus moneatur de huius-
modi vacatione; sciant cuncti id indultum extra casum
suum non esse intelligendum.

Cum ad notitiam Episcopi vacatio Parochialis Ecclesiæ per-
uenerit, edicta decernimus publicè esse proponenda, quibus vo-
centur ad futurum examen die constituta perficiendum, qui ad
concursum accedere volent. Ex ijs verò, qui ab examinato-
ribus

ribus Synodalibus idonei renunciati fuerint atate, moribus, doctrina, prudentia, & alijs rebus ad Vacantem Ecclesiam gubernandam opportunis, ab Episcopo eligatur, quem idem Episcopus magis idoneum iudicauerit, ut ad Vacantem Ecclesiam promoueatur. Collationem autem Ecclesiarum Parochialium, seu Curatarum factam sine examine commissio ab examinatribus Synodalibus, & non obseruata lege concursus, nullam declaramus; irritam, atque nullius esse valoris pronunciamus, ac taliter prouiso nullum etiam coloratum ius, aut titulum quesitum esse: dictas verò Parochiales Ecclesias, siue Curatas, ut ante, vacare, ac de eisdem prouideri debere. Quod si obseruata sit quidem forma concursus, sed minus idoneus magis idoneo fuerit ab Episcopo in electione prepositus, liceat ei uti appellationis remedio aduersus Episcopi eligentis irrationabile iudicium: quemadmodum cauetur Constitutione sanctæ memoriæ Pij Quinti hac de re edita.

Quod si carnis, & sanguinis affectione, posthabito eo, qui magis idoneus in examine fuerit, conferatur Ecclesia minus idoneo, & appellarit ad hanc Sedem Metropolitanam ille, qui sibi factam fuisse iniuriam probare, ac ius tueri suum velit; officij necessitate cogemur iustitiæ subsequi implementum, quod grauissima Constitutio Pij Quinti indixit, & Ecclesiastica ratio postulat.

In huiusmodi Ecclesijs, quæ sunt de iure patronatus Ecclesiastici, seruetur, quod sacrum Concilium Tridentinum disposuit; si institutio ad Episcopum, & non ad alium pertineat: ut is, quem patronus digniorem inter probatos ab examinatribus

natoribus iudicabit, Episcopo presentetur, ut ab eodem instituantur: cum verò institutio ab alio, quàm ab Episcopo erit facienda, tunc Episcopus solus ex dignis eligat digniorem, quem patronus ei presentet, ad quem spectat institutio. In Ecclesijs autem, quæ sunt iuris patronatus non Ecclesiastici, seruetur, quod iure statutum est, ut tamen presentati ab examinatribus Synodalibus prauo examine probentur; & non, nisi idonei reperti fuerint, admittantur.

Deputationes Vicariorum tam perpetuorum, quàm temporalium, in Ecclesijs Curatis ad mensam Capitularem spectantibus, & ab ea dependentibus, seu dictorum Vicariatuum collationes omnes, & quasunque prouisiones in futurum ab executione suspendimus, & suspensas post duos menses declaramus, quamdiu deputati, seu prouisi professionem fidei in manibus nostris, aut Vicarij nostri, quoad Diocesim Aquileiensem, vel in manibus Episcopi Ordinarij, aut eius Vicarij generalis quo ad Prouinciam, emiserint: ut sit initium executionis ministerij professio, & fundamentum, à quo recta ministerij ratio pendere debet: in contrafacientes autem quoscunque iuris medijs animaduertendum pro criminis qualitate decernimus.

Locationes, & conductiones ultra triennium Ecclesiarum Parochialium cum redditibus earum sub quibuscunque conditionibus, tenoribus, ac formis imitas, ut alicubi fieri comperitum est, nullas, & irritas declaramus, & quatenus opus sit, etiam irritamus, & abolemus: easdem verò Ecclesias, quæ mensis vel Episcopalibus, vel Capitularibus unitæ sunt, in Vicariatus perpetuos erigimus, & in posterum per Vicarios perpetuos

perpetuos in ijsdem Ecclesijs instituendos, animarum cura inseruiendum decernimus.

Qui ad Parochiales Ecclesias, vel Curatas assumuntur, præter ea, quæ sustinendi muneris causa requiruntur, viginti-quinque annos saltem attingere debent: prouisionem, seu col-lationem, aut etiam deputationem de minore factam viribus carere decernimus.

Illiteratos Curatarum Ecclesiarum Rectores; qui superioribus fortasse temporibus in Ecclesias irrepserunt, quibus propter imperitiam minus certe inseruiunt, quàm res postulat; nec ferre possumus cum damno Ecclesiæ, & Ecclesiastici ministerij iactura in officio diuersari; & ab Ecclesia remoueri charitas non patitur: eam verò rationem, quam præscripsit Concilium Tridentinum, adhiberi volentes, declaramus, his; modò Vi-Tridentinum, adhiberi volentes, declaramus, his; modò Vi-tæ honestæ sint; Coadiutores, aut Vicarios idoneos pro tempo-re parte fructuum competenti assignata adiungendos, ac depu-tandos à locorum Episcopis, tanquam Sedis Apostolicæ delega-tis: Ut Coadiutorum, seu Vicariorum diligentia DEI opus egregiè perficiatur.

Quod si apud Ecclesias Parochiales, siue baptismales popu-lus ita numerosus sit, ut unus Ecclesiasticis Sacramentis mi-nistrandis, & cultu sacro peragendo sufficere non possit, Epi-scoporum tanquam Sedis Apostolicæ delegatorum partes erunt, Rectores, seu alios, ad quos pertinet compellere, ut tot pro mi-sterio Sacerdotes adiungant, quot satis esse ad munus paro-chiale sustinendum putarint.

Inoleuit miserabili exemplo quibusdam etiam in locis, qui-
bus

bus populus numero, & qualitate satis pollet, abusus; ut beneficia Ecclesiastica, quæ curam animarum ex primæua eorum institutione habuerunt, in simplicia beneficia assignata Vicarijs congrua portione conuersa fuerint, nulla intercedente sanctæ Sedis gratia conuersionis, aut commutationis, sed impetrantium assertionem, & abusu; quasi superiorum temporum Rectores, qui residere apud Ecclesias Curatas debuerunt, cum non resederint, & per Vicarios in dictis Ecclesijs ministrarint, naturam Ecclesiarum Parochialium culpa sua, quæ iniustum affectauit commodum, & correctionem effugit, immutarint. Cui malo occurrentes ea, quæ nos decet, vigilantia, & solitudine, statuimus de præfatis Ecclesijs, quæ tamen verè consisterint à primæua erectione fuisse Curatas, ut, licet effectum videantur, sine tamen ulla sanctæ Sedis gratia, consecuta, per totam Prouinciã provideatur, ut cum primum quocunque modo dictæ Ecclesiæ aliter, quàm per resignationem obtinentium vacauerint, ad primæui status conditionem ipso facto rediisse censeantur; & fiat de illis prouisio, ut de verè Parochialibus Ecclesijs sacrorum Canonum dispositione statutum est: quod ut contra omnes impetrantium incursiones certo præsidio tandem aliquando muniatur; statuimus totius Prouinciæ nomine Sanctissimo D. N. supplicandum; præfatum Decretum Apostolica auctoritate confirmare, & munire dignetur, ne quod nostra solitudine paratum est remedium, subreptionis impulsu pereat.

Debent ijs, qui à Parochialibus Ecclesijs longe absunt, vel extra Ciuitatem sunt, cum tamen à Parochia Ciuitatis pen-
deant,

deant, & ab eadem gubernentur; Episcopi opportune prospicere, ut ministeria spiritualia in promptu necessitate exigente habere possint, praesertim si aquarum diuortijs, & montium difficultatibus, & pontium nocturno transitu, ac pluuiarum, seu niuium tempore, vel intercluso portarum Ciuitatis exitu, difficilis Reſtori sit, ac periculosus, interdum etiam impossibilis in eam partem accessus. quo casu iuxta felicitis recordationis in Alexandri III. Constitutionem, & Tridentini Concilij de Acreto, nouas Episcopi Parochias constituere poterunt, ut animarum curae consultum sit. ijs uero, qui nouis Parochijs praeficiendi erunt ex fructibus ad matricem Ecclesiam quomodoque pertinentibus assignandam portionem ex decreto Concilij declaramus, quae si minus competens, ac minus congrua fuerit, erunt partes Episcopi, etiam populum ad ea, quae nouo Reſtori necessaria fuerint, praestanda compellere, ut inde hauriant victus necessarij commoda, ubi ministerij, & laboris assiduam diligentiam impendunt.

Decedente Parocho, ea, quæ ad sacrum cultum, Vasa, libros, paramenta, missalia, ornamenta, & alia sacra licet ex argento, siue auro confecta viuens ex fructibus beneficij etiam in Capella, seu priuato Oratorio adhibenda confecit, nomine Ecclesiæ, apud quam resedit, seu quam obtinuit, vendicanda, & in illius Vsum adsciscenda decernimus, & mandamus, & in illius Vsum adsciscenda decernimus, & mandamus iuxta Constitutionem Pij Quinti. quod Vicariorum foraneorum diligentia expediendum erit, ut proprio illorum capite declarabimus.

H DE

DE DIGNITATIBVS,
Canonicatibus, & beneficijs simplicibus.

DIGNITATVM, & Canonicatum, qui nomen à Regula, & ordine duxerunt, electionem, & probationem Episcopis indicimus faciendam cognitione, & iudicio, ut idoneos; quos caro, & sanguis non reuelauit; eligant spectatæ probitatis, morum, etiam probatæ doctrinæ, ut meritò Senatus Ecclesiæ dici possit: in quo sibi persuadeant fore ad Ecclesiasticum gubernium dirigendum benè incitatæ voluntati maximum, & perpetuum adiumentum. pertinent enim, qui dignitates obtinent Ecclesiasticas, & Canonici ad caput, qui est Episcopus, tanquam nobiliora membra: pertinent verò ratione ministerij, & dignitatis, itemq; loci propinquitate, & ordine Ecclesiæ, ut nihil in horum altero sit, quod ad alterum non pertineat. Hanc ob causam de Dignitatibus, & Canonicatibus à Tridentina Synodo statutum est, ut in Ecclesijs Cathedralibus, & Collegiatis insignibus dignitates omnes, & saltem dimidia pars Canonicatum, ubi id commodè fieri potest, tantum Magistris, & Doctoribus, aut etiam licentiatis in Theologia, vel iure Canonico conferantur. Quod si Dignitates curam animarum annexam habeant, ex decreto Concilij declaramus nulli esse conferendas, qui saltem vigesimum quintum ætatis suæ annum non attigerit, & in clericali ordine versatus, doctrina ad munus suum exequendum necessaria, & morum integritate non commendetur.

Alia

Aliæ dignitates, & personatus, quibus nulla subest animarum cura, Clericis idoneis non minoribus annis viginti duobus iuxta idem Concilij decretum conferantur.

In Archidiaconos, qui oculi sunt Episcoporum in omnibus Ecclesijs prouehantur, ubi fieri potest, qui magistri sunt in Theologia, seu Doctores, aut licentiati in iure Canonico: neque enim munus; sicubi iurisdictionem habent; aut dignitas, quæ principalis est post Episcopalem; aut temporum ratio, quæ vigilantiam, integritatem, & doctrinæ donum requirit, omnino patitur, ut segnes, & illiterati adsciscantur, qui imperitia, & sordibus euertere persuerent, quæ stare videntur.

Aetas promouendorum ad Canonicatus ea saltem debet esse, quæ sacro ordini Præbendæ conueniat, ut infra tempus à iure, & sancta Tridentina Synodo constitutum, promoueri possint: ea sit præterea in litteris scientia, & in Ecclesiasticis doctrina, ut ordinem assequi Præbendæ valeant: nisi enim idonei in examine ad ordinem Præbendæ, quæ confertur, extiterint, inhabiles ad Canonicatum pronunciamus, collationem verò, aut quamcunque promotionem de illis ad Canonicatum irritam, & cassam declaramus.

In Ecclesijs tam Cathedralibus, quàm Collegiatis, & Parochialibus ex earum constitutionibus, aut ex praua consuetudine obseruatur, ut in electione præsentatione, nominatione, institutione, confirmatione, collatione, vel alia prouisione, siue admissione ad possessionem alicuius Cathedralis Ecclesiæ, vel beneficij, Canonicatum, aut præbendarum, vel partem prouentuum, seu ad distributiones quotidianas certæ conditiones,

seu deductiones ex fructibus, solutiones, promissiones, compensationesue illicitæ, aut etiã quæ in aliquibus Ecclesiis dicuntur Turnorum lucra, interponantur: hæc examinent, & diligenter Episcopi perpendant, Ut, quæ in usus pios conuertuntur, permittant, alia, quæ sordidam auaritiæ labem, & simoniacam suspensionem olent, evertant, ac omnino tollant. Quod verò spectat ad primi post adeptam possessionem anni fructus, decernimus exequendam omnino Constitutionem Pij V. Ut si hi fructus, & distributiones in pia opera statuto, aut vetere consuetudine insumantur, dimidium ad Canonicum, dimidium alterum ad ipsorum operum executionem pertineat; si verò inter Canonicos distribuantur, aut aliter insumantur, quàm in pios usus, tum decernimus dictos fructus, & distributiones primo etiam anno post adeptam possessionem integros ad Canonicum pertinere, & eidem sine diminutione assignandos esse.

Beneficiorum etiam simplicium sub eodem tecto obtinendorum prohibitionem iure communi latam omnibus Episcopis seruandam, & exequendam omnino proponimus, & intimamus.

Ferendum nullo pacto dicimus, & declaramus, Ut ad beneficia simplicia vel liberæ collationis, vel iuris patronatus Sacerdotij ordinem, & ministerium annexum habentia prouehantur pueri etiam impuberes, qui litteras, & penè se ipsos ignorant, ne dum munus exequuntur beneficijs annexum, aut exequi possunt: quem abusum corrigere volentes, declaramus illos, qui aetatem non habent, Ut saltem infra annum promoueri ad ordinem tituli beneficalis possint, inhabiles ad huiusmodi beneficia, quæ Sacerdotij ordinem, & ministerium annexum habent;

habent: electionem verò, praesentationemq; & institutionem de huiusmodi persona nullam, & irritam esse, aut etiam irritandam, & annullandam declaramus.

Ac, ut in collatione beneficiorum Ecclesiasticorum, quae ministerium habent, & aliquam muneris executionem, in primis attenditur, & curatur, ut qui prouehitur, idoneus sit, ita in beneficijs quibuscunque simplicibus conferendis quamuis de iure patronatus accurate seruandum praecipimus, & mandamus, ut prius examinetur promouendus in ijs, quae ad beneficij onus pertinent, quàm promoueatur: si fuerit idoneus, ut fiat, quod iure fieri potest, ac debet; aliter factam collationem ex decreto Concilij declaramus irritandam: ipsi verò collatores poenam sibi isto casu aliàs indictam, & in Concilio Tridentino receptam, & innouatam declinare studeant.

DE VITA, ET HONESTATE Clericorum.

CLERICORVM vitam habitu, studijs, conuersatione decet esse integram; ut qui alijs ordine praesunt, etiam exemplo, & laudabili morum, & studiorum institutione praeluceant. Quia verò hoc ipsum actu constat, & habitu, singillatim de utroque statuere aliquid decreuimus, ut etiam successione temporum, quod institutum, captum ue fuerit, expolitione aliqua perficere valeamus.

Insigne Clerici tonsura est, ac vestis talaris: Qui igitur in clericalem militiam adscitus est, norit à se hoc primum requiri,

ut

ut habitum, & tonsuram deferat. qui non detulerit, sciat se
penis iuris subiacere.

Cum autem complures sint, qui tonsuram habent, atque
etiam ordines minores, quorum aliqui in Ecclesiasticis ministe-
rijs in habitu, & tonsura aliquando seruiuerunt; postea respi-
cientes retro, tanquam regno DEI minus apti, clericalem
militiam deseruerunt, & ad vitam laicalem, & communem
reuersi sunt: alij nec habitum, nec tonsuram unquam gesta-
runt, nec in Ecclesia Clericorum instituto, & more versati
sunt; sed laicorum habitu, delatione armorum, toto corporis
cultu omnia alia potius, quàm Clericos se ostenderunt; neque
Clerici unquam cōmuni hominum opinione habiti sunt: Utri-
que verò vitam secularem degentes si quando aliquò impin-
gunt, & iustitiæ temporalis præcepto propter crimen obiectum
in aliquam difficultatem trudentur, tum ordinationis litteras
ostendunt, & fori Ecclesiastici subsidium implorant: abusibus
occurrentes varijs, & grauius sacri Concilij Tridentini de-
cretis inherentes statuimus, & declaramus indignos illos esse,
quos fori Ecclesiastici fauor complectatur, qui eiusdem fori di-
gnitatem, & obedientiam contempserunt. Nullus igitur fori
præuilegio ex decreto Concilij gaudeat, nisi beneficium Ecclesia-
sticum habeat, aut clericalem habitum, & tonsuram deferens
alicui Ecclesiæ ex mandato Episcopi inseruiat; vel in Semina-
rio Clericorum, aut in aliqua schola, vel vniuersitate de li-
centia Episcopi, quasi in via ad maiores ordines suscipiendos
versetur.

Illis autem, qui beneficium Ecclesiasticum quodcunq; etiam
quomo-

quomodocunque simplex possident, vel *Canonicatum*, aut *Capellaniam*, siue etiam pensionem ultra ducatos sexaginta, tonsuram verò, & habitum clericalem deferre contemnunt, amantes lucrum, insigne verò suæ professionis abhorrentes, *Constitutiones Sixti Quinti* datas, alteram quinto Idus Ianuarij. M. D. LXXXVIII. alteram pridie Calendas Februarij eodem anno intimandas intra mensem decernimus, & mandamus: futuris autem temporibus in *Diœcesanis Synodis* easdem promulgari precipimus.

Lateranensis Concilij sanctione grauissima decretum est, ut qui beneficia Ecclesiastica tam curata, quàm non curata obtinent, nisi post certum tempus horas *Canonicas* recitarint, fructus beneficiorum amittant, qui ex tunc fabricis locorum piorum, seu eleemosynis applicati fuerunt. Quod ut Clericis apertius innotescat, sæpius eisdem inculcandum decernimus, ac statuimus *Pij Quinti Constitutionem* de hac re ipsa latam xij. Cal. Octobris. M. D. LXXI. in *Diœcesanis Synodis* quotannis publicandam: qua amissiones fructuum beneficiorum pro horarum omissione quantæ sint, declarantur; inde enim omnes colligent, quod male perceptum est, qua fuerit ratione, & cui restituendum.

Non tamen existiment, qui ad *Subdiaconatus ordinem*, & superiores prouecti sunt, si beneficio Ecclesiastico careant, horis *Canonicis* ex *Breuiario Romano* recitandis obstrictos non esse; omnino verò intelligant, quemadmodum qui beneficium habent Ecclesiasticum, horas *Canonicas* non recitantes, ultra peccati mortalis reatum, amissione fructuum plectuntur: ita illos

illos omittendo horas Canonicas mortaliter peccare, nec se prae-
textu beneficii non adepti excusare posse. Norint Verò sacri
ordinis susceptione, se in sortem Domini, cui in humilitate ser-
uire debent, adscriptos esse, ut à sua ipsius religiosa dedicati-
one, & sacris ministerijs discedere non valeant, sed obligatos
ita esse, ut ascendere possint, ad seculum descendere non pos-
sint. Qui muneris sui partes neglexerit, & convinci aliquo
modo poterit, vel non recitare, vel ordinem recitandi non in-
telligere, pœnis debitis etiam in foro exteriori, ultra peccati
reatum, plectendum, & suae correctionis beneficio, & aliorum
exemplo decernimus.

De Clericali habitu, & tonsura ne dubitari contingat, qua-
lis esse debeat, tonsuram, seu clericam edicimus eam esse, quam
pro maiorum, & minorum ordinum gradu minorem, & ma-
iorem praesenti pagina praescripsimus, ut vel inscriptione cle-
ricae inscriptum sit cuique suae ordinationis signum. Barbae in-
comptioris formam, & longiores pilos à superiore labro dimis-
sos, qui oris officium impediunt, omnino damnamus, & à cle-
ricali modestia rejici mandamus. Habitum Verò clericalem
in Ciuitatibus, Terris, & Oppidis dicimus esse vestem talarem
collo constrictam cum pallio superiore longo: collaria camisia-
rum quocunque modo crispata, seu laetucata damnamus, rejici-
mus, & personis clericalibus minime convenire pronuncia-
mus. Colorem nigrum modestiae clericali aptum, convenien-
temq; dicimus: colores alios quoscunque, etiam in manicis, &
fibulis caligarum damnamus, & prohibemus. pileos laneos,
sive sericos opere crispato, vel punctorum frequenti ordine
quasi

quasi pictos, seu cinguli variegati corona exornatos, ad laicos, & non ad clericos pertinere declaramus: Volumen velorum circa pileum ex arte compositum ut personas Ecclesiasticas non decet, ita minus quidem decet illas, quæ inter ceteros loco, & dignitate eminent.

Omnibus, & singulis quacunque sint dignitate, officio, ac beneficio præditi, quibus Diuinis in Choro interessendi munus est adiunctum, sub pena suspensionis à Diuinis interdiciamus, & inhibemus; ne in Chorum ad Diuinorum interessentiam ascendant sine veste coloris nigri usque ad talos demissa, & ad collum constricta, & superpelliceo decenti: Vestem breuiorem coloris non nigri, aut collo non constrictam, quocunque prætextu sumptam, à Choro, & ab Ecclesia longius abesse volumus; ac sub eisdem pænis inhibemus, ne quis pileos cuiuscunque materia, aut formæ in Chorum deferat: si enim locis omnibus Clerus decenter ornatus esse debet, multò sanè magis in loco sacro, & in Choro; ubi laudes DEO persoluuntur, gratiæ aguntur, postulationes fiunt, esse debet, in quo vestimentum induens candidum, & officium Angelorum obiens ab omnibus abstinere, quæ vel inania sunt, vel secularia, vel à re aliena diligentissime debet: atque id assidue meditari, & contemplari animo pie decebit. Quod autem debeat in Choro esse silentium, quæ mentis eleuatio, qui cultus, attentio, & deuotio superius titulo de diuinis officiis aliquid decreuimus: reliqua per Reuerendiss. Patres in communi Prouinciæ cōmodum meditanda, & cōpilanda proposuimus. Ne autem quis dubitet, quæ sit habitus itinerantium forma; ut quæcunque se ad loca Clerici contulerint, vite, & morū in-

gne deferant; ex ipso verò clericali habitu obstrictos se obligatione modestiæ, & temperantiæ cognoscant: statuimus vestem clericalem itinerantium eam esse, quæ saltem usque ad genu longitudine producta, genu Clerici stantis operiat; hæc autem coloris nigri esse debet, & clericaliter ad collum formata: habitum verò clericalem declaramus eum esse, qui veste vel talari, vel breuiore in itinere, ut paulo ante dispositum est, ac tonsura constat. Si ex duobus alterum desit, habitum clericalem dimidiatum declaramus, ac dicimus, ut Constitutionibus de habitu clericali deferendo disponentibus satisfactum non sit: quod Episcopi animaduertere diligentissime, & curare debebunt, ut si minus edicta, & monita, ac præcepta profuerint, pœna ingruant, & iuuante DEO prosint.

Arma Clericorum sunt lachrymæ, & orationes, non enses, aut alterius formæ, vel materiæ arma. Per Ciuitates, & loca, in quibus habitant, si quis Clericorum extra itineris facienda necessitatem insolenter arma cuiuscunque generis detulerit, eum damnandum statuimus quarta parte fructuum suorum beneficiorum, quam ex nunc, prout ex tunc, & è contra, Sacristiæ Ecclesiæ, cui fuerit titulo beneficali adscriptus, applicamus Episcopi proprii mandato exigendam, & in prædictum usum insumendam: crescente contumacia grauiora etiam remedia decernimus adhibenda. Contra Clericos non beneficalitos carcere, banno, suspensione, vel aliter procedendum erit, ut aliquando resipiscant, qui vel errore, vel improbitate animi à disciplina, & obedientia descinuerunt, ac DEO gratias agant, qui pereuntes vitæ restituit.

Pensionarios

Pensionarios seriò monitos esse volumus, eos ad officium Beate MARIAE Virginis quotidie recitandum teneri; præter peccatum mortale, quod committunt, si omiserint, restitutionis onere obstrictos declaramus. at verò ne putent Ecclesiasticum panem, qui temporaliter inter ministros distribuitur, ad luxum, ad inania studia, ad venationes esse conuertendum; cum sit patrimonium CHRISTI, alimenta Sacerdotum, qui vere Sacerdotes, & verè Ecclesiastici sunt, ministrorum stipendium, ut in Ecclesia, vel extra DEO laudes persoluant, & ipsi DEO obediant.

Dicit Canon: Esau Venator erat, quoniam peccator erat: quàm verò sit modestia clericali indignum, qui paulo ante Breuiarium manibus tractabat, & sacra lectionis studio intendebat, eum publicè Accipitrem deferre, & sua in eo studia profiteri: quiq; cum Angelis in Ecclesia gratiarum actiones, & laudes DEO persoluebat; eum inter canum latratus, & multitudinem versari, & incomptis obstrepere vocibus, sacri Canones declarant; omnes verò facile intelligunt. Consequitur autem, ut panis, qui miserorum pauperum victui sufficeret, panis, inquam, de redditibus Ecclesiasticis collectus, quod est patrimonium CHRISTI, ad bestiarum cibum indigne transferatur: cuius criminis ratio districtè in die Domini reddetur. Quod ut longe à Clericorum vita, & honestate removeamus, omnibus Clericis cuiuscunque conditionis, & gradus sint, Venatorium studium interdicimus, & districtè prohibemus, ac in eos grauius per illorum Ordinarios procedendum statuimus; ac si contumacia fuerit obstinator, & inhibitionis

mollioris ratio contemptui esse caperit, grauiori etiam animaduersione prospiciendum mandamus.

De tabernis, quod ad Clericorum modestiam pertinet, statuimus nulla ratione tolerandum, ut extra itineris necessitatem in tabernas, diuertant. quia verò locis quibusdam viget consuetudo; quæ, si Clericorum spectetur conditio, corruptela, & abusus dicendus est; ut si conuiuij amicis, & conciuibus parandi voluntas ex honesta etiam causa, vel hospitium aduenarum repentino aduentu inciderit, non domi, sed in publico diuersorio paretur conuiuium; & eò conueniant, & ibidem reficiantur, licet hospitibus confluentibus diuersorium totum pateat. quod omninò Clericis cuiuscunque ordinis, status, & conditionis sint in tota Prouincia honestatis, & modestiæ causa inhibendum pœnis etiam propositis decernimus; ac Episcopos Decreti presentis vigore, ut seriò inhibeant, excitamus.

Alearum, & taxillorum usum, quo tempus misera incunditate teritur, Clericis omnibus inhibemus: multo verò grauius, si non modò luserint ipsi, sed alijs ludendi potestatem fecerint parato loco, & domestico diuerticulo. Episcoporum verò vigilantia, & prudentia edictis, ac pœnis propositis opportunum erit remedium adhibendum, ut, pestis auertatur, qua miserorum facultates suauimorbo exhauriuntur, blasphemiae, & rerum desperationes excitantur, cupiditatum intemperatorum, & fraudum oblectamenta aluntur, denique ipsa DEI clementia assiduè offenditur: qui tanto periculosior morbus est, quanto ardentius interdum animos Clericorum occupat, & Ecclesiasticas opes peruadit.

Conuiuia,

Conuiuia, & nimiam Laicorum familiaritatem multarum
offensionum, & scandalorum originem debent Clerici in quo-
cunque gradu constituti declinare, ac fugere; honestatem, quæ
inter Clericos tutius seruatur, amare, contraria diligentissime
uitare: meminisse verò debent, non aliunde clericalis ordinis
dignitatem grauius fuisse offensam, quàm à nimia Laicorum fa-
miliaritate; illi enim, ut honestè de ijs, quæ honesti speciem præ-
se ferunt sentire solent; ita si honestum illud, quod opinione com-
prehenderunt, assidua tractatione non reperiunt, parumpendere,
& quos imperfectiores norunt, contemnere omnino solent.

Mulierum suspectarum contubernium, & familiaritatem
declinent, & fugiant Clerici: de Episcopis enim fas non est su-
spicari: ne vel mali suspectione laborent, vel periculosa rei tra-
ctatione tabescant: qui sordium, & intemperantiae studio impli-
citi fuerint, ita corrigantur, ut vel monitis resipiscant, vel
pænæ intimatione, aut (si pertinaciores fuerint) etiam inflictio-
ne disciplinam recognoscant, ut etiam; si desperetur correctio;
beneficiorum priuatione plectantur. Quod verò superius sta-
tutum est titulo de Residentia Curatorum circa fœminas ad mi-
nisterium domesticum Clericorum admittendas, & approban-
das, hoc diligenter seruetur.

Clericum, qui à seculo discessit in sortem Domini adscitus,
seculi adhuc negocia appetere non decet. negotiationes enim,
mercaturas, alienæ rei procuraciones, alienorum tutelas,
aduocationes, & fideiussiones cum secularibus, & de re
seculari, & alia huiusmodi cum Clericorum vitæ, &
studijs consentire nemo affirmarit. dent igitur operam
Episcopi,

Episcopi, ut Clerum Ecclesiasticis exercitationibus, sacrarum litterarum studio, & charitatis operibus instituant, & ad perfectæ vitæ bonum per Christianas virtutes adducant.

Ad spectacula Comediarum, siue ad bancos Circulatorum, & buffonum in plateis, qui alijs exemplum esse debent maturitatis, & prudentiæ, accedere, & assistere Clericos non decet: à chorearum spectatione item Clerici abstineant; saltationem verò priuatam, & publicam; quod est intemperatissima temeritatis genus; nulla ratione committant, nisi grauioris correctionis virgam experiri affectent. Personatum incedere Clericum turpe, vanum, periculosum, non ferendum: non enim ad bonum habitus clericalis depositio; sapissime ad malum vel inchoandum, vel consumandum. Nocte se Clerici domi contineant, nisi ad charitatis Christianæ officia sit exeundum: militum, aleatorum, infamium personarum conuersationem declinent: compotationes fugiant, & omnia, quæ Ecclesiasticam personam minus decent, & sacrorum Canonum statutis interdicta sunt Clericis, à se putent aliena: quæ verò ad omnem charitatis, & pietatis exercitationem pertinent, ea amplectantur, & nunquam dimittant.

Clericalis militiæ propagines aptari, & in futura quasi sobolis spem ali suadet pietas, & Christiana prudentia ratio. ac, ut rite fiat, & ijs obseruatis, quæ obseruatione dignissima sunt, de ordinationibus Clericorum summatim quadam statuimus; alia etiam DEO fauente addituri, ut ex his quasi fundamentis maiora aliquando excitemus.

Qui ad ordines gradatim minores, & maiores promouendi sunt,

sunt, quædam habere, quibusdam carere debent: ac ut diligenter prospiciendum, ut quæ ad ordines suscipiendos, & exercendos attinent, ne desiderentur; ita animaduertendum diligentissime, ut quæ ascensum, & promotionem impediunt, dispiciantur, & ab Ecclesia excludantur, atque ita Decretis Concilij Tridentini inhaerentes statuimus ut prima tonsura non initientur, qui Sacramentum Confirmationis non susceperint, & fidei rudimenta edocti non fuerint; quiq; legere, & scribere nesciant; & de quibus probabilis coniectura non sit, eos non secularis iudicij fugiendi fraude, sed ut DEO fidelem cultum præsent, hoc vitæ genus elegisse.

Ad minores ordines promouendi bonum à Parocho, & Magistro scholæ, in qua educantur, testimonium habeant, & saltem latinam linguam intelligant, in quibus seruanda interstitia decernimus; nisi aliud Episcopo expedire videbitur: ac, ut interstitiorum ratio videtur ea esse, ut minorum ordinum functiones Apostolorum temporibus in Ecclesia laudabiliter receptæ, & pluribus in locis aliquandiu intermissæ, in usum reuocentur, ita Episcoporum solertia curandum decernimus, ut minorum ordinum ministeria restituantur: fiet autem satis commode, si, quos Episcopus ordinarit, eos ad ministeria Ecclesiarum Cathedralium, & Collegiatarum destinari: ijs verò competenti numero instructis, per Ecclesias Parochiales Clericos eosdem disposuerit, & in illis ad eadem ministeria obeunda destinari.

Ad ascensum inter minores non admittantur, qui priorum ministerio, morum, & studiorum testimonio non commendentur:

tur: hoc autem ipsum testimonium (si Parochiam Clericus, & Magistrum scholæ mutarit) recipiatur saltem à Parocho, & Magistro, in cuius vel disciplina, vel Parochia sex menses ante ordinationem fuerit.

Qui ad singulos maiores ordines erunt assumendi, per mensem, aut aliàs, ut Edicto Episcopali præstituetur, ante ordinationem Episcopum adeant, qui Vicario generali, aut Vicarijs foraneis locorum, siue Archidiaconis, aut cui magis expedire videbitur, committat, ut nominibus, & desiderio eorum, qui promoueri volunt, publicè in Ecclesia propositis, de ipsorum ordinandorum natalibus, ætate, moribus, & vita à fide dignis diligenter inquirant, & litteras testimoniales ipsam inquisitionem factam continentes ad Episcopum quamprimum transmittant.

Qui ad sacrum Subdiaconatus ordinem sunt prouecti, si per annum saltem in eo versati non sint, ad altiore gradum non permittantur ascendere, nisi aliud Episcopo videatur, qui vel necessitati, vel utilitati publicæ consultum debet velle, non cupiditati, aut commentitijs priuatorum causis satisfactum. Quò autem propius Subdiaconi ad sacra accedunt; eò magis decet, ut diebus saltem Dominicis, ac solemnibus, cum Altari ministrauerint in Ecclesijs, quibus adscripti fuerint, sacram communionem percipiant.

Duo præcipue in ordinatione Subdiaconi exquirenda, quorum primum, ut tales adsciscantur, qui sperent DEO auctore se continere posse, cum sit impuritas vel ab hoc gradu arcenda, vel in hoc ipso diligentissime comprimenda. Secundum, ut
nullus

nullus admittatur, qui recitare horas Canonicas ex Breviario Romano nescierit: qui, si reliqua nouerit omnia, unum hoc ignorarit, repellendus erit.

Non decet eos, qui diuino ministerio adscripti sunt, cum ordinis dedecore mendicare, aut minus honestam questus rationem exercere, ut victum decentem habeant. Idcirco sacri Concilij Tridentini Decreto inhaerentes statuimus, accuratè obseruandum, ut nemo ad ordinem Subdiaconatus admittatur, nisi legitimè constet, eum Ecclesiasticum beneficium, quod sibi ad victum honestè sufficiat, pacificè possidere. ad titulum patrimonij, vel pensionis non ordinentur, nisi illi, quos Episcopus iudicauerit assumendos pro necessitate, aut commoditate Ecclesiarum. attentè verò perspiciat, an patrimonium, seu pensio ab eisdem verè possideatur, ac talia sint, ut ad vitam sustentandam idonea sint. quæ deinceps; donec Ecclesiasticum beneficium, quod sufficiat ad victum, obtinuerint; sine licentia Episcopi alienari, aut extinguui, vel remitti nullatenus possint.

Episcopus familiarem suum non subditum, si per triennium commoratus secum fuerit, ordinare ex Concilio Tridentino non potest, nisi ei beneficium quacunque fraude cessante statim re ipsa conferat.

Clericos alienos cum legitimis dimissorijs recipere, si fuerint impediti illorum Episcopi, et examinatos dimiserint; laudabile, & honestum: hoc tamen monemus, ad Episcopos recipientes ad suam ordinationem subditos alienos non pertinere vel super interstitijs ex causa non seruandis cognoscere, aut decernere; vel titulos, ad quos ordinantur, qui fuerint

K à proprio

à proprio Episcopo, seu generali eius Vicario approbati, aut reprobati, iudicare: hæc enim ad Episcopum dimittentem pertinent.

Qui pie, & fideliter in ministerijs antea actis se gesserint, & ad Presbyteratus ordinem assumuntur, bonum habeant testimonium; & hi sint, qui non modo in Diaconatu ad minus annum integrum, nisi ob Ecclesiæ utilitatem, & necessitatem aliud Episcopo videatur, ministrauerint; sed etiam ad populum docendum ea, quæ scire omnibus ad salutem necessaria sunt, ac ad ministranda sacramenta diligenti examine præcedente idonei comprobentur: atque ita pietate, & castis moribus conspicui, ut præclarum bonorum operum exemplum, & vitæ monita ab eis possint expectari.

DE SEMINARIO Clericorum.

SEMINARIORVM institutionem, conservationem, & promotionem in Ecclesia DEI summè fructuosam, quo clericalis militiæ propagatur ordo, & progressio, tantopere necessariam, ut stare Ecclesiastica disciplina sine illorum subsidio, & adminiculo vix possit; in Prouincia Aquileiensis Ciuitatibus audiuius, & incredibili animi iucunditate etiam vidimus: dolumus autem Metropolitanam Ecclesiam nostram propter maximas difficultates hætenus Seminario caruisse, quo tamen modò letamur nunc ita carere, ut habere penè dici possit, ita enim comparata, ac penè instituta

instituta sunt, quæ ad ipsius corpus informandum, & instruendum prima, & necessaria sunt, ut parum desit, quo actu perfici aliquando tandem, & breui quidem temporis spatio valeat.

Qui Episcopi Seminarium nondum habent, & nihil hætenus pararunt, ut aliquando haberent, monemus illos, quamprimum cogitent de Seminario in sua Diœcesi erigendo, & sex mensium spatio nobis, quid hoc de genere cogitarint, pararint, effecerint, omnino significant. Si enim vel propter Diœcesis paupertatem, vel angustiam erigere Seminarium proprium non valeant, erit, quod cogitent, qua possint ratione, si non longe à Seminario Aquileiensi absint, dimidiam Decimam suæ Diœcesis in illud conferre, ut in idem Clerici pro quantitate Decimæ, & suæ Diœcesis commodo, & necessitate inferantur, & cum reliquis Clericis, qui fuerint ex Diœcesi Aquileiensi, alantur, & doceantur.

Quod si plures sint Episcopi, qui Seminarij erigendi difficultatem patiantur, ac sit in causa paupertas Ecclesiarum, decernimus ex plurium Episcoporum collatione debere commune Seminarium quamprimum erigi, & confici, ut quod singuli non possunt, vniuersi faciant; quod valeat ad singulorum utilitatem aliquando derivari: in quo habendam rationem decernimus fructuum, & Decimæ attribuendæ singulorum Episcoporum Clericis, & numeri Clericorum, ne prægrauetur Seminarium, sed partitione quadam iusta oneris, & honoris sustentetur. Si negligentes, (quod opinari non debemus) fuerint, & necessario operi erigendo defuerint; erunt partes nostræ urgere, & quæ à sacra Tridentina Synodo sanctè,

pieq; instituta de hoc genere fuerunt, omnino exequi, & actu perficere.

Locus Seminarij si apud Ecclesiam Cathedralem fieri possit, non alibi optandum, ut fiat; quò enim propius absunt Clerici, eò facilius, & minore temporis dispendio in Ecclesiam se conferunt; nec diuagatione spatium, nec longinquitatis spatio studiorum, ac disciplinae iacturam facere coguntur. Quod si locus apud Ecclesiam non pateat, ad Episcopum pertinebit, locum idoneum eligere, & in eo Seminarij domum aptare, & erigere.

Duo sunt in Seminario Clericorum perpetua exercitatione retinenda, ut Clerici discant, & ministrent. Ex ijs, quae addiscere debent, item duo proponuntur; alterum ad pietatis, religionis, & deuotionis documenta; quod est omnium rerum certissimum fundamentum; pertinet, ut Christianae fidei rudimenta in primis inter se iuniores addiscant, & recitent: qui prouectiores sunt, doceant, & exerceant: quod singulis Dominicis, & festis diebus curandum, & faciendum omnino praecipimus. Curabunt item Episcopi, ut singulis diebus ijdem Clerici Missae sacrificio intersint, & saltem singulis mensibus consteantur peccata, & iuxta Confessoris iudicium sumant Corpus Domini nostri IESU CHRISTI. Alterum pertinet ad studia: Grammatices autem, cantus, computi Ecclesiastici, aliarumq; bonarum artium scientiam addiscant. Item cum primò capere animo, & intelligentia possint, sacram scripturam, libros Ecclesiasticos, homilias sanctorum, atq; sacramentorum tradendorum, maxime quae ad confessiones audiendas videbuntur opportuna,

portuna, & rituum, ac caerimoniarum formas. Pars altera ministeria respicit, quæ ab ijs, qui in Seminarijs degunt, Clericis diligenter obeunda. Sunt autem, quæ vel minorum, vel maiorum etiam ordinum executionem respiciunt, ut res uidebitur postulare, & prefectus caerimoniarum singulis, aut vniuersis in Ecclesia præscripserit. Hæc autem ut fiant ab illis expeditè, & aptè, institutione, ac exercitatione diligenti curandum erit, quod præsectorum, & magistrorum solertia effecerit.

Huiusmodi verò ministeria festis diebus, ac Dominicis tam in Ecclesia Cathedrali, quàm in alijs præstare debebunt; ut coram Episcopo, qui fuerint instructiores, seruiant; qui tardiores, alibi; quod ut accommodatè fieri aliquando valeat, in primis cupimus, Seminarium apud aliquam Ecclesiam construi, in qua Dominicis diebus, ac festis horas Canonicas psallere, ac Diuinis inservire Seminarij pueri valeant: hac enim exercitatione facilius ad rituum, & caerimoniarum cognitionem peruenierint. Ut autem in disciplina Ecclesiastica commodius instituantur, tonsura statim, atque habitu clericali utantur.

Præfetti, Magistri, ministriq; ad inserviendum Seminario, & domestica ministeria, etiam inferiora obeunda, adsciscantur probatæ vitæ, & spectatæ pietatis homines, qui non modo voluntate, & studio in rei conseruationem, & incrementum propendeant, sed idonei ad prouinciam sibi impositam iudicentur, in quo sit Episcoporum præcipua vigilantia, & diligens sollicitudo.

Ut autem minore impensa scholis Seminarij prouideatur, ad Episcopi munus spectat, Scholasterias obtinentes, & alios, quibus

quibus est lectionis, vel doctrinae munus annexum, ad docendum in ipsis scholis instituendos per se ipsos, si idonei fuerint, alioquin per idoneos substitutos ab eisdem Scholasticis eligendos, & ab Ordinarijs approbandos etiam per subtractionem fructuum cogant, & compellant: Quod si Episcopi iudicio digni non fuerint, alium, qui dignus sit, nominent omni appellatione remota: quod si neglexerint, Episcopus ipse deputet: Docebunt autem praedicti, quae videbuntur Episcopo expedire. Meminerint autem Episcopi, Concilium Tridentinum statuisse, ut officia, vel dignitates illae, quae Scholasteriae dicuntur, non nisi Doctoribus, & Magistris, aut licentiatis in sacra pagina, aut iure Canonico, & alijs personis idoneis, & qui per se ipsos id munus explere possint, conferantur, & aliter facta provisio nulla sit, & invalida. ideoq; id decretum diligenter observari Episcopi curent.

At verò ad Seminarij fabricam instituendam, & mercedem praceptoribus, & ministris soluendam, & ad alendam, & ad alios sumptus cum certi redditus sint necessarii ultra ea, quae ad instituendos, & alendos pueros sunt in aliquibus Ecclesijs, & locis destinata, quae eo ipso Seminario ex Concilio Tridentino applicata censenda sunt: debent ab Episcopo cum consilio eligendorum ad ipsius Concilij praescriptum ex fructibus integris mensae Episcopalis, & aliorum quorumcunque beneficiorum, quae sunt ab ipsomet Concilio Tridentino sigillatim expressa, & nominata, portiones, aut partes aliqua detrahi, quibus tota Seminarij impensa fulciatur, & sustineatur.

Ut autem aliquando tandem beneficia portionibus prædictis detrahendis leuentur, ac liberentur, sit Episcopalis charitatis, & sollicitudinis munus, beneficia aliquot simplicia, cuiuscunque qualitatis, ac dignitatis fuerint, vel etiam præstimonialia, vel præstimonialia portiones nuncupatas ante vacationem sine cultus diuini, & illa obtinentium præiudicio de consilio duorum de Capitulo, ac item duorum de Clero, Seminario applicare, & incorporare, etiam si beneficia sint reseruatæ, vel affecta. Succedente verò casu, quo per uniones effectum suum sortientes, vel aliter Seminarium ipsum in totum, vel in partem dotatum reperiatur; tunc portionem ex singulis beneficijs, ut supra, detractam, & incorporatam decernimus ab Episcopo, prout res exegerit, in totum, vel pro parte remittendam.

De Reuerendissimorum Coepiscoporum pietate, ac diligentia hoc nobis pollicemur, nunquam fore, ut portionem de mensa Episcopali detrahendam, & Seminario applicandam soluererecuserent; sed ipsi cæteris exemplo præcant Seminarij erigendi, & prouehendi, & suum præcipuè munus hac ipsa de re, prompte exequendi, cum sacro Tridentino Concilio cautum sit, ut detrectantes corripiantur, & compellantur.

Totum verò Seminarij opus, ut bene dirigatur, debet certorum hominum diligentia, pietate, prudentia, ac fide sustineri. Eligant igitur Episcopi singuli duos ex Canonicis senioribus, & grauioribus, prout Spiritus sanctus suggererit, quorum consilio ad Seminarium gubernandum, & prouehendum, quæ fuerint opportuna, & necessaria constituent, & exequenda

da mandabunt: discipulos, & incorrigibiles, malorum morum
seminatores acriter punient, eos etiā, si opus fuerit, expellendo.

Idem Episcopi cum consilio duorum de Capitulo, quorum al-
ter ab Episcopo, alter ab ipso Capitulo eligatur: itemq; duorum
de Clero Ciuitatis; quorum quidem alterius electio similiter ad
Episcopum; alterius ad Clerum pertineat, portiones de mensa
Episcopali, ac ex fructibus aliorum beneficiorum quorumcun-
que in Concilio Tridentino pro contributione ad Seminarium
instituendum, & conseruandum expressorum detrahent, &
Seminarium applicabunt, ut opus, cui sustinendo necessaria est
non mediocris impensa, ac praeterea plurimarum rerum circum-
specta promissio, Episcopali sedulitate, & adscitarum persona-
rum adiumento egregie pro D E I gloria muniatur, & su-
sineatur.

In primis verò si qua haëtenus beneficia, vel quia proxi-
mo tempore instituta, vel per incuriam (non enim putamus per
industriam) omissa decimali taxa, comprehensa non fuerunt,
illa curent Episcopi eadem, qua reliqua beneficia, dimensione
carpi, & pari decimationis lege limitari, & concludi.

Quae superscripta omnia, & singula pro regionis more, &
pro Ecclesiarum, & beneficiorum qualitate, etiam si opus fue-
rit, moderando, & augendo Episcopi ad felicem Seminarij
profectum necessaria, & opportuna decernere, ac prouideri
poterunt.

Leue est, quod puerili etati insitum est, ut vel minimo ne-
gocio deleatur, & extinguatur; idcirco summopere laboran-
dum; ut qui pueri in Seminarij disciplina educantur, & pie-
tatis

71
tatis studio, ac modestie lege adstricti sunt, ab ea non discedant, quandiu confirmationes fuerint: quod animaduertentes Episcopi acutè prospicient, ne pueri; dum in instituta Seminarij educatione viuunt; permittantur à disciplina discedere, & liberè diuagari sine Magistro, custode, & reliquorum puerorum communi victu, & exercitatione; ut aliquibi factum est. habeant post studia, & obedientiam recreationes liberiores ætati conuenientes, & professioni: ad laxiora ne dimittantur.

De Seminarijs, ubi Diœceses tenuitate laborant, Tridentino Concilio statutum est, ut ad plurimum Prælatorum commoditatem, & plurimum contributione commune aliquod Seminarium constituatur. Cuius Decreti auctoritatem sequentes, statuimus in tota Istria pro illius Regionis Episcopis unicum, ac illud quidem commune Seminarium institui pro communi Regionis commodo ad Cleri propagationem, & Ecclesiasticæ disciplinæ restitutionem.

DE VISITATIONE.

MAXIMA gubernij Ecclesiastici pars, & ratio viget, ut Episcopus Ecclesias, loca, & populos visitando perlustret, & quæ accessu, fide dignorum testimonio, ipsa inspectione cognouerit emendanda, & corrigenda, illa corrigat, & emendet: Idcirco sacra Tridentina Synodo cautum est in omnibus, quæ ad visitationem, ac morum correctionem subditorum spectant; ut Episcopi, quò aptius, quem
L regunt;

regunt; populum in officio, & obedientia contineant; ius, & potestatem habeant, etiam tanquam Sedis Apostolicæ delegati ea ordinandi, moderandi, & exequendi iuxta Canonum sanctiones, quæ illis ex prudentia sua pro subditorum emendatione, ac Diœcesis suæ utilitate necessaria videbuntur. Nec in his, ubi de visitatione, ac morum correctione agitur, exemptio, aut ulla inhibitio, appellatio, seu querela, etiam ad Sedem Apostolicam interposita, exequutionem eorum, quæ mandata, decreta, aut iudicata fuerint, quoquo modo impediatur, aut suspendatur.

Debent autem Episcopi suam Diœcesim per se ipsos, aut si legitime impediti fuerint, per suum Vicarium generalem, aut visitatorem, si quotannis totam propter eius latitudinem visitare non poterunt, saltem maiorem eius partem visitare; ita tamen, ut biennio per se, vel visitatores suos visitatio compleatur.

Sit autem visitationis scopus visitantibus propositus, ut sanam, orthodoxamque doctrinam expulsiis hæresibus inducant; bonos mores tueantur, prauos corrigant; populum cohortationibus, & admonitionibus ad religionem, pacem, innocentiamque accendant: in quo ad paternam Episcoporum charitatem, Christianumque zelum pertinebit; omnes amplexari, ut modesto etiam contenti equitatu, ac famulatu quam celerrimè, debita tamen cum diligentia, visitationem absoluant, omnia exquirant, cautè hauriant; non facile admittant, aut probent: ita tamen quæ afferuntur, recipiant, ut nec fidem habeant, nec fidem denegent: duce verò Christiana prudentia probent, quæ vera, quæ recta, ac sincera sunt: quæ commentitia, calumnijsque;

lumnijsq; infecta, aut dolo, dispiciant; ut, qui semel detulit, non iterum, ut deferat, spe commodi vlla ducatur.

Cum ad visitationem egredi Episcopus animum induxerit, parumper seipsum colligat, ac meditetur perfectionis sue causam: si enim cogitatione perspexerit, se aliorum vitam, mores, actiones examinandas suscipere, ut corrigat, emendet, restituat; certe ipse satis intelliget, à domo, & familia sua visitationem instituendam; cuius exemplo vel tacitus predicabit reliquis Christianas virtutes; ut, si domum, & familiam non bene compositam, otio, & leuitate diffluentem pro negligentia alijs præbuerit videndam; fructum vniuersæ visitationis perdiderit. quod licet videatur simplici quodam sermonis contextu propositum, ad duo tamen, quæ maxima sunt in hoc genere, pertinebunt. Primum est, ut talem se forma vitæ, famulatus, & familie modestia Episcopus præbeat, qualem habere populus exemplaris ad imitandum propositi loco possit: alterum pertinet ad ipsam visitationem. quid enim si Episcopus castitatem, modestiam, pietatem, omnes Christianas virtutes indicat, prædicet, inculcet; in domo vitia digeant, petulantia, lasciuia, temeritas? quod si suos correxerit, ac bene composuerit, omnes in DEI opere adiutores habebit.

Aequum est, ut visitatio, cuius vis est ad ordinem restituendum instituta, certam quandam methodum habeat, ac, ut scripsit Psalmographus: sicut unguentum in capite, quod descendit in barbam Aaron, & in oram vestimenti eius: à capite incipiat, & in membra constituta quadam norma progreditur, ac diffusetur.

Visitationis ordo sit, ut, cum fieri potest, primò Ciuitas visitetur, deinde Diœcesis: in Ciuitate verò Ecclesia Cathedralis, tum Collegiata, deinceps Parochiales omnes: ac, ut à matre pendent reliquæ Ecclesia forma, imitatione, ritu; ita ratio suadet, ut Clerus vniuersus, qui visitatione Ciuitatis comprehenditur, euocetur, & assistat, ac rationem addiscat reformationis. perfecta Ciuitatis visitatione in Oppida, castra, pagos, villas exeundum. item beneficia Ecclesiastica curata, quæ Cathedralibus, Collegiatis, seu alijs Ecclesijs, vel Monasterijs, beneficijs, seu Collegijs, aut pijs locis quibuscunq; perpetuò unita, & annexa reperiuntur; singulis annis visitentur, & solite provideatur, ut per idoneos Vicarios etiam perpetuos; nisi pro bono Ecclesiarum regimine aliter expedire videbitur, cum congrua fructuum assignatione super certa re assignanda, deputatos, seu deputandos animarum cura laudabiliter exerceatur.

Item ad Episcopos pertinet, Ecclesias quasq; quomodolibet exēptas auctoritate Apostolica singulis annis visitare, & opportunis iuris remedijs providere; ut, quæ reparatione indigēt, reparentur; & cura animarum, si qua illis immineat; alijsq; debitis obsequijs minime fraudentur appellationibus, priuilegijs, consuetudinibus etiam ab immemorabili tempore præscriptis, iudicum deputationibus, & illorum inhibitionibus non obstantibus: quæ omnia Concilij Tridentini Decreto explosa fuerunt. Præterea capellas quasq;, & ad diuinum cultum dedicata Oratoria, in quibus Missæ sacrum celebratur: item hospitalia, & pia loca visitare Episcopi non omittant; & in ijs emendanda, & restituenda restituant, & emendent.

Quia

Quia in Diœcesi quacunque ad DEI cultum spectant, ab Ordinario curari; atque ijs, quæ oportet, provideri æquum est: idcirco sacra Tridentina Synodo statutum est, ut Episcopi commendata Monasteria, etiam Abbatias, Prioratus, & Præposituras nuncupatas, in quibus non viget regularis observantia; nec non beneficia tam curata, quam non curata, secularia, & regularia qualitercunque cõmendata, etiã exempta, etiam tanquã Sedis Apostolicæ delegati annis singulis visitent; curentq; congruentibus remedijs, etiã per sequestrationem fructuũ, ut, quæ renouatione indigent, aut restauratione, reficiantur; & cura animarũ, si qua illis, vel eorum annexis immineat; aliaq; debita obsequia rectè exerceantur. quod si in eis regularis vigeret observantia, provideant Episcopi paternis admonitionibus, ut eorum Regularium superiores iuxta eorum regularia instituta, debitam viuendi rationem obseruent, & observari faciant, & sibi subditos in officio contineant, ac moderentur: quod si admoniti intra sex menses non visitauerint, vel correxerint, tunc Episcopi etiam ut Sedis Apostolicæ delegati eas visitent, & corrigant, prout ipsi superiores facere possent, ac deberent.

Ac ne Ecclesijs secularibus, quæ nullius Diœcesis appellantur, deesset ea, quæ interdum desideratur, provisio, & subsidiũ; sacra item Tridentina Synodo statutum fuit; id, quod Episcopi sollicitè perficere curabunt, ut ipsi, quorum Cathedralis Ecclesia proximior est, si id constet, tanquam Sedis Apostolicæ delegati dictas Ecclesias, quæ in nullius Diœcesi esse dicuntur, visitare non omittant: aut ille Episcopus, quem semel in Concilio Prouinciali Prælatus loci illius elegerit.

Ac

Ac ne quisquam Clericus cuiusvis alterius privilegij prætextu censeatur tutus, quo minus iuxta Canonicas sanctiones Visitari, puniri, & corrigi possit, eodem sacro Concilio Tridentino Episcopis, qui in suis Ecclesiis resederint, tributum est, ut qualitercunque exemptos, qui aliàs suæ iurisdictioni subessent, de illorum excessibus, criminibus, & delictis quoties, & quando opus fuerit, etiam extra Visitacionem tanquam ad hoc Sedis Apostolicæ delegati corrigendi, & castigandi facultatem habeant.

Quod Verò in munere pastoralis exequendo Patres, qui Tridentino Concilio interfuerunt, Episcopis præscripserunt, ut aliquid propositum haberent, quod intuerentur, & sequi in reformandis moribus possent; hoc nos in memoriam reuocatur, & omnino hæreat. Meminerint ergo Episcopi, qui subiectos regere, & in vitæ, ac morum honestate continere volunt, se pastores, non percussores esse, atque ita præesse subditis oportere, ut non eis dominantur, sed illos tanquam filios, & fratres diligant, elaborentq; ut hortando, & monendo ab illicitis deterreant, ne, ubi deliquerint, debitis eos pœnis coercere cogantur: quos tamen si quid propter humanam fragilitatem peccare contigerit, illa Apostoli est ab eis observanda præceptio, ut illos arguant, obsecrent, increpent in omni bonitate, & patientia: cum sæpe plus erga corrigendos agat benevolentia, quàm auctoritas; plus exhortatio, quàm comminatio; plus charitas, quàm potestas. sin autem ob delicti gravitatem virga opus fuerit, tunc cum mansuetudine rigor, cum misericordia iudicium,

iudicium, cum lenitate seueritas adhibenda est, ut sine asperitate disciplina populis salutaris, ac necessaria conseruetur; & qui correcti fuerint, emendentur; aut, si resipiscere noluerint, cæteri salubri in eos animaduersionis exemplo à vitij deterreantur, cum sit diligens, & pij simul pastoris officium morbis ouium leuia primum adhibere fomenta: post, ubi morbi grauitas ita postulet, ad acriora, & grauiora remedia descendere: sin autem nec ea quidem proficiant, illi submouendi, cæteras saltem oues contagionis periculo liberare.

Visitantis Episcopi munus est, prædicatione verbi DEI populos ad omnes virtutes Christianas animare, & incendere, sacramentum Confirmationis ministrare, Ecclesias, & Altaria, si qua fuerint vel consecranda, vel reconcilianda, consecrare, seu reconciliare; paramenta, corporalia, calices, & alia, quæ benedictione egent, & ad cultum sacrum destinata sunt, benedicere; Sacristijs, & Ecclesijs vel resarciendis, vel ornandis, vel etiam instruendis intendere; de cura animarum rectè sustinenda inuestigare, Ecclesiasticorum diligentiam excitare, & corripere; mores illorum opportunis remedijs emendare; omnia denique efficere, ut Sacramentorum ministerio, sacrorum frequentia, verbi DEI prædicatione, & salutaribus monitis, exemplo denique vitæ populus instituatur, & in viam celestium mandatorum prouebatur. Nec omittant Episcopi populi vitam inuestigare, deuotionem, & refrigescentem charitatem ad bonum reuocare; præceptorum diuinorum auctoritatem inculcare; Usurariorum, concubinariorum, sacrilegorum piacula, & vitia insectari, ut resipiscant

ſcant per gratiam DEI, & melioris vitæ rationem ineant. Quia verò particularia, quæ ijs, quæ vniuerſè prædiximus, continentur; quò enucleatius inſpicerentur, eò fortasſe fructuoſius Viſitatoriæ actioni prodeſſent, ſtatuiſmus libellum tanquam memorialem pro Viſitatione ſingularum Dioceſium Prouinciæ Aquileienſis edendum eſſe, quò particulatim omnia, quæ Viſitatione promouenda ſunt, tam neceſſaria, quàm opportuna contineantur: ad quem conſiciendum quia multa ſunt, & varia, & undiq; ex tota Prouincia colligenda; Reuerendiſſ. Coepiſcopos noſtros requirimus, ut ſinguli aliquid hoc de genere conſicere, & nobis, cum primum licuerit, mittere velint, ut inde communem quandam Viſitandæ Prouinciæ methodum habeamus, & in tota ſit Prouincia bene conſtitutum, quod ad ſingulas illius partes ſit accommodandum.

De Viſitatoribus inferioribus, aut Archidiaconis, aut deputatis à Capitulis ſeruetur, quod in Concilio Tridentino conſtitutum eſt, de ipſorum approbatione, Notarij aſſumptione, rationis eorum, quæ Viſitatio complexa eſt, redditione, depoſitionis teſtium, & omnium actorum exhibitione, ut inſpiciantur ea, quæ inferiores agunt, indicunt, præcipiunt, an cum ratione conueniant, & cum Episcopalis Viſitationis præſcripto, & Conſtitutionibus, quæ in Synodo editæ ſunt, conſentiant.

Pro Viſitatione Notarijs non permittendum quidquam vel ſponte oblatum accipiant; procurationem verò modeſtam exhiberi (ubi conſuevit) curent Episcopos; ne grauis, oneroſa veſit Viſitatio; quæ oneribus leuare, faſciculos impietatum ſolueri, expiare omnia debet. In ijs verò locis, ſeu Prouincijs,

ubi

43
ubi consuetudo est, ut nec *visibilia*, nec pecunia, nec quidquā aliud à *Visitatoribus* accipiatur, sed omnia gratis fiant; ibi id seruetur. Si quis autem contra sacri Concilij Tridentini præscriptum aliquid accipere præsumpserit, in eum erit iuxta eiusdem Concilij sanctionem grauter animaduertendum.

DE FESTORVM DIERV sanctificatione.

HESTOS dies in honorem DEI, & Sanctorum eius institutos ad gratias DEO agendas de beneficijs, quæ à liberalissima eius manu accepimus, veniam peccatorum petendam, & opem diuinam implorandam seruari decet, ut omnium seculorum memoria, etiam veteris testamenti pagina contestatum habemus: quò magis debemus seruare nos, qui in lucis veritate versamur, quàm ij, qui in umbra futurorum ante solis ortum sedebant. Tempus autem diei festi in audiendis concionibus, Missæ sacro, & diuinis officijs ponendum est; non in commensationibus; multo minus peracto prandio ad saltationes, & lusus declinandum; cum sit in Ecclesias ad horas vespertinas audiendas diuertendum, & nomen DEI concorditer, & deuote vel silentij meditatione, vel vocis exultatione laudandum. quod curabunt Episcopi Curatorum diligentia populis inculcari.

Cum verò festi dies, & alia Dominico die in Parochialibus Ecclesijs populo denuncianda sint, Parochis omnibus districte præcipiendum statumus, ut in Parochialibus Ecclesijs

M

omnibus

omnibus Dominicis diebus anni (non obstante quavis consuetudine contraria) Missam celebrent, & festos dies, vigiliis, & tempora ieiuniorum populo promulgent, eundemq; doceant, quæ seruanda, & quomodo seruanda sint: in eos autem, qui defecerint tam in Missa, quàm in alijs, pænis seuerioribus statuimus animaduertendum; populum verò monendum, & frequentius incitandum edicimus, ut Dominicis saltem, ac festis diebus ad Parochialem suam accedat, & ibi Missæ sacrum, & concionem audiat.

Abusu factum est, ut in pagis; sicubi festus dies venerit Dedicationis Ecclesiæ; qui solet idem in Dominicum, aut alium diem festum incidere; Curati, qui ab omni parte circumstant, ad festum dictæ dedicationis confluant, & populos sua profectione Missæ sacro diebus etiam solennibus fraudare non vereantur, quod aut auaritiæ labem præ se fert; aut certè vel ambitionis, vel conuiuij appetendi cupiditatem indignè olet. hoc corrigentes Episcopi omnino tollent, in eam formam redigentes vniuersam hanc rationem, ut seriò præcipiant Curatis omnibus, ne ab Ecclesia sua discedant in casu suprascripto, nisi prius sacrum fecerint, & populi piæ expectationi indulserint, & officium suum executione, & actu impleuerint; alieniores, qui sunt, debitis pænis coercentes.

Inoleuit abusus, ille quidem à memoria, ne dum à consuetudine fidelium tollendus, ut solennioribus quibusdam diebus vel dedicationis Ecclesiæ, vel die Natalis Sancti Titularis, vel Patroni, cum frequens populus ad Ecclesiam solennitatis, ac deuotionis causa venit, ut veniam à DEO peccatorum precetur,

precetur, votaꝫ sua humiliter offerat, eiusꝫ misericordiam
in suam tutelam, & subsidium imploret, non sine DEI of-
fensione, & scandalo bonorum choreas ducat, & gentilitijs
quibusdam se ritibus totum dedat: unde committendorum
peccatorum occasio non levis; deinde blasphemiae, ebrietates,
& periculosa interdum rixae, & homicidia subsequuntur: &
festi praesertim dies praepotentis DEI laudibus destinati, ip-
sius summi DEI gravi cum iniuria traducuntur, ipsis pene
Ecclesiarum foribus profanatis. Idcirco statuimus per Epi-
scopos singulis Ecclesiarum Parochis, Curatis, & Vicarijs praeci-
piendum districtè, & sub interminatione diuini iudicij man-
dandum, ut, quantum possunt, tantum nitantur, quò abusus,
& corruptela huiusmodi tollatur: semel autem singulis mensi-
bus primo Dominico die mensis Decretum hoc populo promul-
gent, & intimare studeant: ipsi autem pro viribus curent,
ut populum, Parochianos in primis suos ab huiusmodi corru-
ptione auertant, & pro virili abducant, cum dies festos ad glo-
riam DEI institutos sine scandalo, & peccato ducere oporteat.
Magistratus autem, & Dominos quoscumque iusdicentes
temporales per misericordiam DEI obsecramus, ne praetextu
iurisdictionis tuendae; quae si timore DEI, & reue-
rentia sacrorum non nitatur, incerto nutare statu, & concide-
re facillimè solet; graue hoc piaculum defendere, & auctori-
zare conentur: illis enim omnibus, & singulis edicimus, &
obtestamur coram DEO, & Angelis, & hominibus, omnia
scelera, & peccata, quae praemissorum occasione patrari conti-
gerit; illis inquam, qui diem sanctum, & locum sacrum, vel

sacro herentem violarint, ac temerarint, seu causam deliberatè dederint, ut violari, seu temerari posset, tributum iri. Capitulis verò, Collegijs, & vniuersitatibus Ecclesiasticis tam virorum, quàm mulierum, qui iurisdictionem habent temporalem in loco, sub pœna interdicti ingressus Ecclesiæ; officialibus autem dictarum vniuersitatum, siue Collegiorum, aut Capitulorum, si Ecclesiasticæ personæ sint, sub excommunicationis pœna prohibendum decernimus, ne talia permittant, cum impediendi potestatem habeant; ne zelo timoris DEI, & salutis animarum studio ad maiora sit remedia confugiendum.

Indulgentias, quæ festis quibusdam diebus, aut etiam non festis proponuntur, & vnum, vel plura habent sigilla, si clausula sit interiecta: Porrigendi manus adiutrices: ut erat superiorum temporum frequens consuetudo; sublatas per Constitutionem Pij Quinti fuisse declaramus, & per consequens ab Ecclesijs, & locis sacris tolli omnino iubemus.

Expedi; ubi hætenus solertia Episcoporum prouisum non fuit; ut festi dies in Synodo Diœcesana promulgentur, & Curatis graui præcepto mandetur, ut ad illius promulgationis præscriptum populo indicant festos dies per annum currentes, quibus à secularibus operis cessari debet, ita tamen, ut; quod quietis corporalis rationem habet, ut vacari DEO animis attentioribus possit; ne diuersè pro arbitrio irreligioso traducatur, immo toti illi dies pietate, & diuinorum interessentia, & sacris precibus, & officijs agantur. Instituaturs autem populus Curatorum diligentia, quid illis diebus fieri, quid non fieri oporteat; & culpam reatus, & reuerentiã dierum Sanctorum, & mandatorum

datorum obedientiam inculcent. Nos autem existimantes; si particulares Sancti Diocesum, & Ciuitatum Patroni solenni ubique ritu celebrantur; equum esse, ut etiam vniuersalium Patronorum ratio habeatur, quæ tantæ Prouinciæ pietate, ac deuotione dignissima est: præsentî Decreto vniuersæ Prouinciæ Aquileienfî festum diem indicimus Natalem gloriosissimorum Martyrum Sanctorum Hermacora, & Fortunati Ecclesiæ, & Prouinciæ Aquileienfis Patronorum, quotannis die duodecima Iulij duplici officio celebrandum; ut, qui clarissimo fidei testimonio, & triumphali sanguine Ecclesiæ Aquileienfis initia dedicarunt, eorundem gloriosa merita pijs supplicationibus prosequamur, & Patronos gratis animis agnoscamus, quorum certissimo patrocinio muniti sumus.

Episcoporum pietatem, & prudentiam compellamus, & prodierum festorum solennitate obseruanda studiosè excitamus, ut apud Magistratus temporales Ciuitatum attentè agant, eorum subsidium, & auctoritatem implorent, ut in ipsis Ciuitatibus, Oppidis, castris, & villis festorum dierum obseruatio omnino vigeat, & populorum deuotio, & religio conseruetur: qui verò peruicaciores fuerint, & irreligiosi etiam plectantur, ut resipiscant ipsi; alij, quid deceat, addiscant.

Quod de genere prohibitorum non est, & profanis locis exerceri potest, hoc idem sacris exerceri non debet. Monemus igitur Episcopos, & illorum pietatem, ac religionem requirimus, ut nullo quocunque prætextu, solennitate, actione, etiam alicuius Sacramenti ministerio permittant in solo sacro; quâ confluentis est populi aditus, aut alibi; quidquam
venale

venale cuiuscunq; conditionis, aut naturæ, constitui, aut vendi; sed indulgentiæ, aut stationis, aut alterius solennitatis Ecclesiasticæ tempore, vel alio quo vis populorum concursu ab Ecclesiæ vestibulo, ac toto ambitu venalia cuiuscunque generis omnia, & singula, licet sint minimi pretij, amoveant, & opportunis remedijs etiam inuocato brachio seculari deducant, & auertant: multò verò magis in Ecclesiæ vestibulo quocunque pietatis, & religionis colore mercenarios actus exerceri prohibeant: hac verò à pietate Christiana, & locorum sacrorum reuerentia aliena longè arceri etiam ab Ecclesia mandamus; ne strepitu populi diuina, & sacra perturbentur. Duo verò in primis debent Episcopi apud se perpendere; tempus diei festi, quo ad mercimonia, & humanorum contractuum anfractus diuertere non decet, ac periculo non vacat; locum, in quo DEI bonitas cum placari supplicantium votis deberet, fraudibus tamen, & mendacijs, quæ frequenter in mercatura negotio contingunt, offenditur, & irritatur. Agant verò, ut laudetur DEV S, & ministerio Pastoralis abusus, qui latè dimanarunt, ratione aliqua tollantur.

DE RELIQUIIS SANCTORVM.

SANCTORVM Reliquias in cælo regnantium, quæ viua fuerunt membra CHRISTI Domini, & Spiritus sancti templum, in honore haberi pietas præcipit, Christiana ratio suadet. Quia verò deferendi honoris est norma tradenda, ut disposita quadam ratione honor,

nor, qui defertur, eluceat; præcipimus Episcopis, si qui partem istam nondum expolitam habent, ut in Ecclesijs, in quibus est Reliquiarum celebriorum quantitas, illas omnes distincto quodam ordine in Reliquiarium arte dispositum, & expolitum inferant, christallo singulis thecis superadieceto, ut videri reuerenter possint. sit tamen Reliquiario adiecetum operimentum ex tabula picta, qua imagines illorum Sanctorum exprimantur, vel aliquid aliud, quo gloria, qua illi fruuntur in calis, aptè significetur. Reliquiarij locus in parte nobiliore Ecclesie selecto aliquo Sacello, aut intra Chori septa, aut alibi decenter constitui debet, cui lampas perpetuò incendatur, si per Ecclesie facultates fieri possit. quod si Reliquiæ ex fragmentis minutioribus constent, obuoluantur Reliquiæ serico aliquo tenui, in quo sit color Sancto conueniens, ex ijs, quos illorum Sanctorum die adhibere Ecclesia solet: obuolutæ in Reliquiario cum scheda nominis inserto supra christallo conseruentur. Quia verò inter Reliquias aliquæ sunt certæ, & separatim habitæ; aliquæ sunt certæ, sed ex pluribus mistæ: aliquæ vel mistæ, vel separatim incertæ, ab antiquitate approbatæ, sed schedarum, & nominum vel abolitione, vel consumptione incertæ: de singulis aliquid statuere oportet, ut varietate quadam inscriptionum nec reuerentia desit, nec certa ubi licet, cognitio desideretur.

Certis igitur Reliquijs, & separatim conseruatis, siue extra sericum, quia insignes, siue intra sericum, quia minutiores, statuimus esse per schedulam formatis characteribus inscribendum Sancti proprium nomen: ijs autem, quæ ex pluribus mistæ sunt,

ſe ſunt, inſcribatur; ſacræ Reliquiæ Sanctorum. N. N. N.
Si verò ignorantur nomina Sanctorum, inſcriptio ſit: Sacræ
Reliquiæ Sanctorum, quorum nomina ignorantur.

Inter iſta Epiſcopos monemus de Reliquiis inſignioribus,
quales ſunt, caput integrum, brachium, aut tibia, vel ſimiles;
poſſe illas decentius in vasis proprijs, quæ aptè manu artificis
expolita ſunt, honeſto loco aſſervari, ut etiam in proceſſionibus
publicis; præcipuè ſi Sanctorum Patronorum ſunt; efferantur,
& publicæ venerationis honore, ſacrisq; obſequiis in patroci-
nium, & ſubſidium apud DEVM vocentur: quod tamen
animaduertendum erit, ne unquam in proceſſione, qua San-
ctiſſimum effertur Eucharistiæ Sacramentum, exportentur.

Reliquias Sanctorum, qui ſurgent ſicut Sol, & tanquam
ſcintillæ in arundinetis diſcurrunt, oſtendi populo luminibus ac-
cenſis conuenit, ac decet: ut enim, quod debetur Sanctorum
gloriæ, obſequia religioſo præſtatur; ita etiam ſit, ut piorum
excitetur deuotio, & eorundem ſupplicationes in Sanctorum
inuocationem ad humanarum imbecillitatum ſubſidia arden-
tius intendantur.

Sacrarum Reliquiarum publicam propoſitionem aliquo ſo-
lenni die fieri religioſum, & optabile; modo abſit ſuperſtitio,
& auaritia, ac turpis eliminetur quaëſtus: idcirco ſtatui-
mus Epiſcoporum diligentia faciendum, ut, cum publicæ venerationi
in Eccleſia ſacræ Reliquiæ proponuntur, ne permittant ca-
pſulas apponi ad eleemoſynam colligendam; quæ alibi colligi po-
teſt; ibi non debet; quaſi ad quaëſtum, & lucri commodum, non
ad pietatem, & deuotionem proponantur.

Corpora

Corpora Sanctorum transferri quidem non possunt sine Sedis Apostolicæ licentia. Reliquiæ insignes de loco ad locum transferri ita demum poterunt, si Episcopus decretum in Archiuo Episcopali, & libro particulari seruandum ad rei gesta perpetuam memoriam fecerit, cur id fieri permiserit. translationem verò solennem institui, cum res ita tulerit, precipimus. de loco nobiliore ad ignobiliorem, ut de Ciuitate in pagum, transferri prohibemus: nec Episcopi ferre debent, ne dum concedere, ut fiat. ipsis autem solennioribus diebus, quibus Reliquiarum sacrarum vel publica propositio fiet, vel translatio, vel visitatio, curent Episcopi, ut moneatur populus, ne commensationibus, & ebrietati se dedat: qui enim Sanctorum festiua gaudia celebrant, Sanctorum debent vestigia sequi, non suffragijs, & patrocinio se illorum indignos præbere.

Reliquiarum nouarum exhibitionem, & publicam propositionem, itemq; nouorum miraculorum receptionem, etiam in Ecclesijs Regularium sacri Tridentini Concilij decreto interdictâ, & prohibitam esse omnes nouerint, nisi prius ab Episcopo loci recognita, & approbata fuerint: qui, simulatq; de ijs comperitum habuerit, adhibitis in consilium Theologis, & alijs pijs viris, ea faciet, quæ veritati, ac pietati consentanea iudicauerit. Quod si aliquis dubius, aut difficilis abusus extirpandus sit, uel omnino aliqua de ijs rebus grauior quæstio incidat, Episcopus antequam controuersiam dirimat, Metropolitanis, & Comprovincialium Episcoporum in Concilio Prouinciali sententiam expectet: cū nihil in consilio Sanctiss. Romano Pontifice nouum, aut in Ecclesia hætenus inusitatum vel admitti, uel decerni liceat.

Reliquiarum integrum inuentarium, quæ in Ciuitate, & Diœcesi sunt, in Episcopalibus Archiujs conseruari cupimus, & mandamus.

DE ECCLESIIS, ET PIO IN EIS
versandi modo, Altaribus, & Sa-
cristijs.

DOMVS DEI; quam decet sanctitudo; domus orationis, & sanctitatis munditie excellere debet; ut fiant in ea rite diuina, & sacra; postulationes etiam, preces, & vota DEO soluantur. hanc tanquam sponsam Episcopi sartam, tectam conseruari, & non solum rebus ad sacra peragenda necessarijs, & opportunis institui mandent, & precipiant; sed ijs etiam, quæ locum decent, ornari. solum benè stratum sit; parietes purgati; cultus uniuersus honestissimus. Altaria non constituantur noua; non fiant Iconæ picturæ, vel sculpturæ cuiuscunque Ecclesiasticæ historiæ Episcopis inconsultis; & dum consuluntur, proponatur integra, plenaque intentio extruere volentium: à sacris enim imaginibus debet omnis picturæ lasciuiæ abesse, ne procaci venustate pingantur, aut curiosius ornentur: debet historiæ veritas exprimi, pietas excitari. Intra scabellum, siue basim Iconæ, vel intra thecam Iconæ, vel post Iconam nihil omnino seruetur: sint munda, sint expedita omnia. A cornu Euangelij; sicubi fuit olim in pariete custodia sanctissimæ Eucharistiæ, & adhuc fenestellæ pictam habent, aut insculptam imaginem

ginem CHRISTI Domini, aut inscriptionem, ex qua colligi posset, ibi esse Sacramentum Corporis CHRISTI; tollantur imagines, et signa huiusmodi, ne in re maxima errandi occasio praebeatur. In dictis fenestellis bene munitis seruentur olea sacra in Vasculis argenteis sub sera firma, & clauis. Altaria sint solida circumcirca, ut nihil sit à parte posteriore diuerticuli vacui propter sordes auertendas. Ipsa Custodia Sanctissimæ Eucharistiæ vestiatur intus panno serico, seu villuto rubei coloris. in supposito corporali pixis locetur. in pixide supponatur corporale, in quo particula Sacramenti resideant: si tamen pixis interius sit benè lenis, & splendida, atque inaurata, ut nihil asperum, aut inaequale appareat, in ea poterit sine corporali Sacramentum reponi: ad pixidem contegendam adhibeatur velum sericum aureis, siue argenteis lineis distinctum, aut alia ratione splendidum, & conueniens, quo à summo ad imum tota pixis operiatur: Vas, et operculum pixidis sit ex argento: si pes pixidis propter Ecclesiae paupertatem fieri argenteus non potest, fiat ex ære; tota verò pixis inauretur.

Custodia in Altari bene firmetur, ne moueri loco possit: pro ipsa verò custodia conopea comparentur colorum Ecclesiasticorum, quæ Plebani, et Curati, siue Sacristani pro temporum, & solennitatum varietate ad custodiam contegendam adhibebunt. Clavis Custodiæ firma sit, sit etiam pulchra, & inaurata, ubi potest; si minus potest, saltem sit lucida, & cordula sericæ rubeæ inserta cum flocco filis sericis, et aureis conferto, quæ à Plebanis, & Curatis diligenter seruetur.

uetur. Intra Custodiam nihil omninò sit præter pixidem, & Sacramentum.

Fornix, tectum, pauimentum munditie, & cultu splendeat: parietes omnes scriptiõibus quibuscunque mudentur. Vasa lapidea pro seruando oleo ab Ecclesijs assortentur. frustra imaginum Sanctorum, ipsaque imagines, quæ vetustate consumptæ sunt, & alia Ecclesiastica lacera, seu fracta quæcunque combustibilia incendantur, & mittantur cineres in piscinam Sacrarij.

Sepulchra, quæ fiunt in Ecclesijs, præcipimus opere presso extrui, ut nihil emineat, quod incedentibus impedimento sit. Ecclesiæ pauimentum seruetur integrum, nec rum-patur nisi ob sepulchrum muro, & fornice construendum. Cruces, calices, nomen venerabile DEI, imagines DEI, & Sanctorum insculptæ, siue inscriptæ sepulchris, vel in solo Ecclesiæ, quamprimum omnino tollantur; nec lignea Cruces mortuorum tumulis in cæmeterijs figantur; ne sacerorum signorum conculcatione irreuerentiæ culpa committatur.

Fenestræ Ecclesiarum, quibus à priuatorum domibus in Ecclesiam introspicitur, vitris, & clatris ferreis muniantur, nec aperiantur.

Sumptus omnes, qui ad ornanda Altaria necessarij sunt, fiant ab ijs, à quibus ante fieri consueuerant.

Missalia non tolerantur, quæ non sint post Concilium Tridentinum correctæ, & à Pio Quinto editæ.

Quod fuerat antiquis temporibus piè, & laudabiliter institutum,

stitutum, posteriorum temporum iniquitate à recto sui ordine instituti deflexit; vigilantibus enim populis apud Ecclesias, & memorias Sanctorum nocturno etiam tempore frequentantibus, nihil fuerat olim, vel petulantia corruptum, vel sacrilega temeritate sedatum: quod posteriorum temporum nequitia, & grauiorum malorum commissione obsoleuit. Auditum verò est, adhuc quibusdam locis mulieres vigilijs Sanctorum in Ecclesijs pernoctare: quod ne fiat, neve prætectu pietatis aliquid grauius contingat, statuimus, prædictum agendi vigilias ritum omnino tollendum esse, ac modis omnibus ab Episcopis delendum, ne; quod est summè periculosum; vel conuientia, vel negligentia perscueret.

Ecclesiam, in qua fiunt sacra, & cultus diuinus ex ordine peragitur, externis vacare impedimentis conuenit: idcirco decernimus concursationes pauperum quorumcunque etiam miserabilium, qui celebrantibus, & orantibus in Ecclesia impedimento sunt, ab omnibus Ecclesijs, cum sacra fiunt, arcendas esse: permittantur autem pauperes in Ecclesiæ foribus elemosynæ petendæ causa consistere; modò ne vocibus obstrepant, ut exaudiantur, & diuina perturbent.

In Ecclesia, quæ domus est sanctæ conuersationis, & pietatis, diuersari honestissimè æquum est, ut etiam Apostoli dicto monemur, qui præcepit mulieres velari propter Angelos DEI. Curandum est igitur per Episcopos, ut in Ecclesijs, dum sacra celebrantur, mares distincto ordine à fæminis maneant; & fæminæ non nisi velato capite in Ecclesiam ingrediantur.

ingrediantur. quod ubique seruari etiam iuxta doctrinam Apostolicam æquum esset.

Deambulationes, excursationes, pernicacem curiosorum petulantiam longè ab Ecclesia arcendam decernimus; ita acta iudicialia, tractatus seculares, instrumentorum, & contractuum quamcunque speciem; item repositiones mercium, tabularum, & quorumcunque profanorum in Ecclesijs omnino fieri prohibemus. quod Regulares etiam in suis Ecclesijs diligenter seruabunt.

Quibusdam locis abusu inductum, quotidianaq; consuetudine receptum est, ut humili orti loco homines, & coniugati; licet non desint Clerici, qui munus huiusmodi obire possent; nec habitudine animi, nec decenti corporis cultu apti ministeria in Ecclesijs exerceant, quæ Clericorum propria sunt, celebrantibus ministrantes, Altarium ornatui, & Ecclesiæ totius cultui seruietes; cum tamen ista omninò ignorent, & à re sacra, & sacris hærente tractanda, & custodienda alieniores habeantur, & appareant. Idcirco sacrorum Canonum Constitutionibus inherentes, quibus cauetur, ut in pagis, & in villis; ne dum in Ciuitatibus, & Oppidis, Curati Clericum apud se habeant, qui minorum ordinum officia exerceat; curent Episcopi omnibus, quibus fieri potest, locis, in omnibus Ecclesijs Curatis tam Ciuitatum, quàm Oppidorum, pagorum, & Villarum, stipendium ei solutum assignari; qui, cum secularis sit, & coniugatus, ac ineptus, totius Ecclesiæ curam hætenus gessit; deinceps attribuitur Clerico, qui Sacerdoti celebranti cum superpelliceo ministret, cum psallente cantet, lectiones in
Ecclesia

*Ecclesia legat, Ecclesiam, & Altaria curet; doctrinam Christianam doceat; toti Ecclesiae munera minorum ordinum ob-
eundo praestet, & sub sui Sacerdotis obedientia, & discipli-
na uiuat.*

*Hic autem Clericus aetatis eius sit, ut hoc obire officium
possit, natalibus habilis, grammatices non ignarus, ad di-
sciplinam, & peritiam litterarum non ineptus, volun-
tate, & Sacramentorum frequentia à pietate non alie-
nus, in habitu, ac tonsura clericali assiduus, ut spes sit;
illum aliquando gradatim ad Sacerdotium peruenire
posse.*

DE BONIS, ET IVRIBVS Ecclesiarum tuendis.

V*T ECCLESiarVM bona, & iura inte-
gra conseruentur, ne vel temporum iniuria,
vel usurpantium cupiditate; quorum insidijs
undique circumueniuntur; pereant, mandamus omnibus,
& singulis Episcopis, ut, cum primum facere potuerint,
curent librum confici, in quem referantur Episcopalis men-
sae census, redditus, bona, praedia, iura, & iurisdictio-
nes, & feuda cum finibus attinentijs, & pertinentijs il-
lorum, & in illorum singulis notis exprimantur priuile-
gia, tituli, seu concessiones, & legata ita clarè, &
specificè, ut primo liceat intuitu recognoscere res ipsas, &
vniuersa Ecclesiae, seu mensae Episcopalis integra iura:
quod*

quod sit perpetuum Episcopaliū iurium monumentum.

Curent præterea Episcopi, ut fiat item liber, in quem referantur clara, & distincta descriptione Dignitates, Præbendæ, Ecclesiæ Parochiales, Curatæ, & quæcunque beneficia tam simplicia, quàm vel residentia, vel curæ animarum obligationi obnoxia, cum privilegijs, iurisdictionibus, prædijs, redditibus, censibus, adiunctis finibus locorum, ac titulis eorum iurium præfatorum ad futurorum temporum memoriam, & Ecclesiasticorum iurium conseruationem: quod ipsum negotium licet prima specie laboriosum, & difficile videatur, non magno poterunt Episcopi negotio per Vicarios foraneos, seu alios ministros idoneos perficere; atque idem curent à Capitulis Cathedralium, & Collegiatarum Ecclesiarum fieri.

Cum verò ad rectam administrationem non minus pertineat possessa conseruare, quàm amissa, & usurpata recuperare, statuimus per Episcopos diligenter urgendum, ut à libris mensæ Episcopalis, Capitulorum, & quorumcunque beneficiorum partita, quæ non exiguntur, decerpantur, & in libellum particularem referantur: postremo procuratoribus iniungant, ut super earum singulis experiantur non minus scitè, quàm prudenter, ut amissa, vel usurpata iuris medijs recuperentur; recuperationes verò ad singulas partitas mandent adscribi, ut ipsæ etiam in earum, quæ exiguntur, numerum integrè referantur.

Locationes bonorum Ecclesiasticorum ultra triennium sine Apostolica concessione sub pœna à iure statuta fieri prohibemus: permutationes

permutationes bonorum Ecclesie sine concessione Apostolica, infeudationes, & emphyteuses contra sacrorum Canonum ordinationes, & iuris tramitem attentari non debere edicimus: attentata in contrarium cassa, & nulla declaramus, & quatenus opus sit, irritamus, cassamus, & annulamus, & qui contrafecerint, obnoxios pœnis iuris declaramus.

Ut autem sacrilega Usurpatorum cupiditas statum agnoscat suæ peruersitatis, & à malo desiscat: in omnibus Ecclesijs Curatis præcipimus, & mandamus, in tertia Dominica cuiusunque mensis intra Missarum solennia promulgari populo Decretum sacri Tridentini Concilij sess. 22. c. 11. de ref. in linguam Italicam conuersum: Confessores verò præcipimus omnes seriò moneri, ut pœnitentes super Usurpationibus præfatis confessionum tempore examinare studeant.

Episcopos autem per misericordiam DEI obsecramus, ut memores officij, & muneris sui intelligant Ecclesiarum, & CHRISTI patrimonij esse administratores, mysteriorum verò DEI dispensatores, ut in altero libera sit exhibitionis, & donationis commissa potestas: in altero verò facultas limitibus certis adstricta, quos transilire non liceat: neque verò carni, & sanguini de terris, ac bonis Ecclesie dandum, aut impertiendum, etiam ratione censuum, nouarum infeudationum, & nouæ emphyteuseos, ut terrarum, & prædiorum Ecclesiasticorum, & patrimonialium forma confundatur, & continuetur agrorum series, quam posteri non agnoscant, & in

O Ecclesijs

Ecclesijs successores non intelligant . meditentur Verò extremi diei rationem illam , quæ districto DEI iudicio subiicietur , ne sibi temporalis patrimonij incremento salutis , & aeternæ vitæ interitum comparent , & lucri specie perpetuam , & inevitabilem exitij perditionem subeant .

Avaritia ; quæ est Idolorum servitus ; aliena iniquius rapiente , & ad id ; quod suum non est ; cupiditatem , & manus extendente , ne dum proprium cupidius retinente , quàm Christianam decet charitatem , ferendum non est , ut cum iurium Ecclesiasticorum iactura , qui percrebuerant , abusus perseverent , & progrediantur . fit autem , ut administratores reddituum , & censuum Ecclesiasticorum multa ad suum commodum trahant ; & dum factis rationibus administrationis debitores apparent ; tum pro eo , quod debent , censum liuellarium super suis bonis Ecclesiæ constituent ; ac ut suæ peruersitatis solatium in promptu habent , ita facile adducuntur , ut plura in suos usus insumant , quàm in Ecclesiæ commodum : alterum sequitur , ut omnes certatim Ecclesiarum administrationes cupide potius , quàm ambiciosè , querant , cum tamen liuellationes huiusmodi à parte venditorum iniquæ , à parte emptorum minus licitæ appareant : quod ex Bulla Pij Quinti de censibus satis liquet . Idcirco opportuno remedio huiusmodi malo occurrentes , primò declaramus inhabiles omnes , & singulos cuiuscunque conditionis , nominis , ac tituli bonorum Ecclesiasticorum administratores , qui sunt debitores , & debita non solidarunt , ad eandem administrationem recipiendam , donec , quod debent , integrè persoluerint :

soluerint: eorundem uerò electionem tanquam non legitimam, & contra iuris ordinem, & rationem factam, cassam, & nullam declaramus, & quatenus opus sit, irritamus, & annulamus: secundo liuellationes quasunque per debitores Ecclesiarum, aut alios modo, quo præfertur, etiam ratione censuum non solutorum factas, nullas pronunciamus: tertio filios, & heredes debitorum iam defunctorum; donec integram summam defunctorum nomine debitam persoluerint; inhabiles ad Ecclesiarum administrationem, quibus aliquid eo nomine debent, dicimus, & declaramus.

DE VICARIIS foraneis.

DIOECESIVM latitudo efficit, ut cum Episcoporum oculi in particularia quædam locorum facta, & necessitates assidue intendi non possint, expediat ministros distributis in Dicecesi regionibus habere, quos ipsarum regionum portionibus Vicarios foraneos præficiant: horum Episcopi fideli, ac diligenti opera ad multa uti poterunt, in primisque ad executionem illorum, quæ Synodalibus Constitutionibus præscribuntur, ac mandantur ad continendos Ecclesiasticos officio, Ecclesias ornatu, populos pietatis lege, & ad ea, quæ paucis capitibus perstringemus, cum ex his aliquando quasi fundamentis maiorum possit progressionum materia excitari.

O 2

Vicariorum

Vicariorum foraneorum munus præcipuum est, quæcun-
que de Constitutionibus, reparationibus, instructionibus, ex-
ornationibus Ecclesiarum, Sacristiarum, Capellarum, Alta-
rium tam particulariter, quàm generaliter mandata sunt, cu-
rare, ut non modo executioni mandentur, sed ut bene
mandentur: præterea illa etiam, quæ de honestate in Ecclesijs
seruanda, de ordine, & celebratione Missarum, & alia
omnia, quæ Curatorum diligentia commissæ, & mandata
sunt tam respectu ministerij Sacramentorum, quàm aliorum
quomodocunque ad ipsorum Curatorum munera spectantium,
curare, & exequi debent. præterea vitam, mores, ha-
bitum, conuersationem, suspensiones rationabiles de vita,
& moribus Clericorum intra fines commissæ regionis vi-
deant, extra iudicialiter corrigant, emendare contendant.
Si quid tamen vel incorrigibilitate, vel rei natura grauius
inciderit, ad Episcopum diligentissime perferant: quæ au-
tem huius generis fecerint, aut curarint, ea scripto compræhen-
dant, ut quodcumque requisiti, rationem reddere admini-
strationis suæ valeant.

In re, & iuribus Ecclesiasticis seruandis, tuendis, & re-
cuperandis sollicitè particularium locorum Curatos urgeant,
ne quid vel negligentia pereat, vel potentiorum vi, & cupi-
ditate usurpetur. Si quid insolentius alicubi fiat, statim Epi-
scopo significetur.

In Camerariorum electione, reddituum Ecclesiarum dispen-
satione, rationum redditione, reliquorum solutione, curent ea
tolli, quæ vel impedimentum afferunt, vel damnum inferunt:

præterea

præterea consinia terrarum, & bonorum Ecclesiæ præcipiant Curatorum particularium sedulitate perfici; negligentes excitent, & ad bonum adducant.

De Congregatione casuum conscientie singulis mensibus habenda, Vicarij foranei præcipuè agant, ut nunquam prætermittatur: illam verò seruatò certo ordine vocent: mense ante futuram Congregationem exhibeant Clero suæ regionis duos, aut tres casus in congregatione excutiendos, & decidendos. In Congregationibus seruetur ordo, ut statuta die, quæ festâ esse non debet, summo mane omnes ad suum Vicarium conueniant, & factò ab omnibus sacro cum Missa de Spiritu sancto fiat Congregatio, in qua casus ante exhibiti decidantur. ad Congregationem euocentur omnes, qui sunt de regione Vicarij. contumaces pœna pecuniaria plectantur. mulctæ in expensas Congregationis, librorum emendationum, & cursorum discurrentium insumantur. liber penes Vicarium sit, successorì pro tempore tradendus, in quo scribantur Congregationes cum die, mense, & anno; ipsi etiam casus, & decisiones, præsentia Curatorum, qui Congregationi interfuerunt, absentium vel excusatio legitima, vel contumacia, itemque contumaciæ pœna. Si quis ter contumax fuerit, ad Episcopum deferatur, ut remedio grauiore contumaciam luere discat. Decisionum exemplum singulis mensibus ad Episcopum perferendum curet.

Tempore Congregationum frugalitas seruetur inter omnes, qui conuenient. dum corpus alitur, lectura aliqua sacræ scripturæ

pturæ condiatur mensa, alatur animus; ante, & post fiat benedictio, & gratiarum actio, inchoante Vicario, & prosequentibus reliquis.

Quæ de Curatorum identia præsentì Synodo decreta sunt, Vicarij, ut obseruentur, studiosè curent: super illorum recessu à cura ex causa rationabili seruandum curent, quod proprio de residentia Curatorum capite statutum est.

Præterea illorum munus sit, cum aliquis ex Curatis suæ regionis egrotare caperit, inuisere; si grauius se habuerit, curare diligentius, ut necessaria tam spiritualia, quàm temporalia illi ministrentur; si obierit, in suo libro scribant obitum cum die, mense, & anno, statimque Episcopum moneant: curabunt verò interim tam viuente Curato in ægritudine, quàm mortuo, ne cura animarum detrimentum patiatur. rerum, bonorum, quacunque in vita possederit, curam diligenter habeant, ne quid fraudis in præiudicium eorum, qui succedere de iure debebunt, committatur, inuocato etiam super his, si opus fuerit, brachio seculari: exceptis calicibus, Missalibus, & paramentis tam ex auro, quàm ex alia materia conflatis; quæ Constitutione Pij Quinti Ecclesijs, de quarum fructibus facta sunt, tradenda hoc casu, & incorporanda omnino curabunt.

Ex Sacerdotibus alienigenis si quis in regionem venerit, ne admittatur ad celebrationem Missæ, nisi licentiam à foro Episcopali obtentam in scriptis habuerit: illos autem, qui tanquam peregrini ad Missarum celebrationem admissi sunt, in curam
animarum

animarum intrudi non permittant. Cooperatores, seu Capellanos quoscunque non permittant. Confessiones audire, & Sacramenta ministrare, nisi licentiam in scriptis obtentam ostenderit: eos, qui contra præmissa ire præsumpserint, ad Episcopum deferre studeant.

Cum verò contigerit, dictos Vicarios ad reuisionem Ecclesiarum suæ regionis excurrere vel ordinarij officij sui obligatione, vel mandato speciali, tum eis non liceat quidquam, ne minimum quidem pecuniæ, aut ab Ecclesijs, aut ab earum Camerarijs exigere, seu petere, nec sponte oblatum accipere: si contrafecerint, eos declaramus ex nunc pœnas iuris à sacro Concilio Tridentino indictas incurrisse; ut satis facere eiusdem dispositioni non omittant. Victualia modestè exhibeantur, ut nihil inter Ecclesiasticos appareat indecorum, nihil superfluum; omnia moderationis Ecclesiasticæ lege temperata.

Declaramus autem Decreta hæcenus edita non afficere, aut ledere iura Capitulorum Ecclesiarum Cathedralium fundata in privilegijs, & indultis Apostolicis.

DE MONIALIBVS.

MONIALIVM, quarum dicata DEO Virginitas diligenti Episcoporum vigilantia custodienda est, ingressum ad Monasteria, disciplinam, vitam regularem, & pietatem, tanquam certissima regularis

laris perfectionis fundamenta attentè inspicere , attentius promouere , & summa solitudine tueri , ac defendere Episcopali solertia conuenit . Nos uerò ex alieno sumenda potius , quàm depromenda de nostro in medium hoc de genere proponemus : ita tulerunt res , quæ modò nostræ sunt , officio , & obligatione : quod tamen captum est , auctore DEO , & duce , longius etiam eodem fauente DEO ad perfectum aliquando adducetur .

Tria sunt , quibus præcipue monastica disciplina status conseruatur , & augetur ; sufficiens communis victus ; deuota regulæ obseruantia ; pia Sacramentorum frequentia : ad quæ si accedat pastoris uigilantia , DEO fauente sperandum est , profici uel plurimum posse : quia tamen aliqua antecedunt , ut receptio , habitus , & professio ; quædam uerò etiam subsequuntur ; de singulis statuere non modo utile , sed necessarium existimamus .

Primo igitur querant , & inuestigent Episcopi , quot sint redditus Monasteriorum , uel quæ elemosynarum quantitas ; & in sibi subiectis ordinaria , in alijs Apostolica auctoritate sibi Pontificia Constitutione attributa adhibitis superioribus Regularibus præstuant numerum Monialium , quæ in monasterio ali possint ; si plures sint , quàm ali commode possint , decedentibus aliquibus non sufficiatur alia , nisi redigatur numerus eò , ut adequatis possit facultatibus sustentari . quod districtè præcipimus obseruandum ; ne premat egestas , & rei necessaria inopia pereant omnia . interim uerò curetur , ut ipsis Monialibus , uel ipsarum

sarum industria, vel publicis, & priuatis eleemosynis subueniatur, dispositis etiam per Ecclesias capsulis, in quas charitatis subsidia conferantur.

Quia verò Monasteria, quæ opibus olim affluebant, ætiorum, seu procuratorum negligentia, siue potentiorum usurpatione collabi ita solent, ut egere incipiant; & ad pastorem pertinet sollicitudinem, quæ cadere ceperunt, auctoritate, & subsidio fulcire, ne corruant; omnes, & singulos Episcopos hortamur in Domino, & seriò monemus, ut omni studio curent, quo Monasteriorum terra, redditus, census, & iura recuperentur; agant apud locorum Magistratus, procuratores dicto excitent, Monialium protectores, seu conseruatores incendant, omnia conentur, ne coram DEO negligentia arguantur, & socordie apud homines: quod si idem sit numerus re imminuta, qui integra fuit, nec restitutionis spes ostendatur, cogitent Episcopi de numero paulatim minuendo per obitum Monialium factò Abbatissis, seu Priorissis graui præcepto, ne de receptione alicuius ad Monachatum aut tractent, aut deliberent se inconsulto: nisi enim præsentiremedio occurratur, erit magnopere timendum, ne multorum annorum ære alieno, quod necessitate contrahitur, vniuersus Monialium status opprimatur; quem consultius minui ex parte aliqua, quàm totum extinguere, permittendum. Qua ratione si augeantur Monasteria legatis pijs, & nouis redditibus, æquum est, seruatis, quæ seruanda sunt, reliquis, numerum etiam Monialium augeri.

Communis debet ijs esse victus, quarum cõmunis est domus,

P

& vestitus,

¶ vestitus, & regula, neque enim illa, quæ ad substantiam regularis vitæ pertinent, relaxari, aut mutari possunt. Idcirco; sicubi fieri solitum est; partitiones de redditibus Monasterij tam tritici, quàm vini; quæ fiebant inter Moniales, ut quæque portionem haberet, & inde sibi victum sufficeret; damnamus, & abolemus; & sub interminatione diuini iudicij, & pœna excommunicationis in singulas consentientes, in vniuersitatem verò interdicti ingressus Ecclesiæ inhibemus, ne in posterum fiant, aut fieri per ipsarum Monialium Præfektas, Abbatissas, seu Priorissas permittantur. ipsis verò Abbatissis, seu Priorissis sub pœna priuationis ab officio præcipimus, ut, quod contra præsentis Constitutionis tenorem viderint, vel cognouerint, attentari, aut fieri, Episcopo statim significant, quo abusus veteres tandem aliquando tollantur.

Quia in vnaquaque re dantur certi gradus, per quos ad maiora aspiratur, & ascenditur, atque hunc ordinem non in humanis tantum, sed in spiritualibus, & diuinis etiam inueniri nemo negat: ita, ubi corruptela vetus radices egit, quas si statim euellere vi conemur, corruptum antequam sanetur, etiam ipsum ruet; curandum, ut remedia huius generis omnia in rationem quandam temperentur, ut si minus celeriter, tutò certe sanare veterem morbum valeamus. Decernimus igitur in Monasterijs Monialium: ubi iam certus hac de re ordo, & cum ratione consentiens statutus non est: Moniali aliqua cuiuscunque religionis, & ordinis sit, decedente post harum Constitutionum promulgationem, & sanctæ Sedis Apostolicæ.

stolica confirmationem, statim Abbatissam, seu Priorissam cum sua Vicaria, vel ea impedita, cum alia Moniali, ex maturioribus etate, & prudentia debere thalamum, & omnia, quae in eo sunt, cuiuscunque generis, & qualitatis nomine Monasterij facto diligenti inventario in tenutam, & possessionem accipere, eaq; referre omnia in commune Monasterij vestiarium, illata pecunia in commune Monasterij scrinium. Thalami etiam clauēs apud se retinere pro munere officij sui, ac de his omnibus quamprimum per literas Episcopum admonere, si quid hoc de genere praecipere voluerit; non obstante Monialis ipsius, dum viueret, electione discipulae, & eiusdem destinatione etiam cum Abbatissa, seu Priorissa, aut Capituli Monialium licentia ad futuram thalami, & rerum successionem. quae omnia tanquam iuri, rationi, & ipsis regulae substantialibus contraria nulla declaramus, & quatenus opus sit, annullamus, & cassamus, declarantes neque Abbatissam, neque Priorissam, neque Moniales cuiuscunque pactiois, conuentionis, & concordij vigore ad huiusmodi executionem obligatas fuisse, aut obligari potuisse, cum ex altera parte subsit certissima obligatio non conueniendi, seu conuenta non seruandi.

Abbatissas, seu Priorissas, & earum Vicarias tanquam Monasterij Praefectas, serio monemus, ut inter suas Moniales crebro agant hac de re, ut omnes discant nihil possidere se proprie; usum habere in vita; in morte nullum dispositionis actum habere, aut habere posse, etiam consentiente Praefecta; cuius partes sunt dispensare, non dissipare; haec est enim dissi-

patio regula, quæ nec in vita, nec in morte proprietatem Regularibus reliquit; & si quando à Moniali agrotante fuerint requisitæ, ut alij vel supellectilem dent, vel thalamum, piè instruant hoc non licere; ægræ partes esse, si quid in vita commisit, lachrymis, dolore, & pœnitentiæ sacramento expiare, non superaddere noua piacula, quibus scœdius anima ad tremendum DEI iudicium exitura deturpetur. si qua licentiam testandi, aut quoquo modo disponendi, aut aliquam eligendi, seu nominandi, quæ succedat, de factò dederit, declaramus eam ab officio ipso factò priuatam, & depositam, eandemq; in perpetuum declaramus ad idem officium, & alia quæcunque in eadem Religione obtinenda, inhabilem.

Has verò Constitutiones, cum primum à sancta Sede confirmationem acceperint, præcipimus, ubi Monasteria reformatà non sunt, Abbatissis, seu Priorissis, & Monialibus, in linguam Italicam versas à Vicarijs, seu specialibus Nuncijs Episcoporum (ubi disciplina Monastica reformationem nondum accepit) legi, declarari, & intimari, ac de huiusmodi intimatione in actis Cancellariæ Episcopalis scriptionem fieri diligentem.

In Monasterijs, à quibus proprietas exulat, & omnis affectio corrupta, seruetur illa rerum omnium communio, quæ nihil habet, & cui nihil deest; quæ in egestate rerum copiam habet, & nihil omnino habet: si quid enim est, hoc habet usu, non affectu, quæ quidem diues inopia in omnium Monialium domos, & vitam pastoralis prudentia, & vigilantia inuehenda est.

Communis

Communis esse debet Monialium mensa, ad quam omnes exceptis agrotantibus conuenire debent, ac tenentur; pactio- nes, siue consuetudines, quæ corruptelæ sunt, ut tantum pecunie detur ei, quæ ad mensam communem non accedit, reij- cimus, & nullas dicimus; & quæ vel obseruauerint, vel ut obseruentur, insteterint; mensis vnius voce in Capitulo priuamus, aut alia pœna, quæ Abbatissæ, vel Priorissæ loci, aut Vicariæ; si principales impeditæ fuerint; conueniens videbitur, plecti mandamus.

In mensa communi non desit spiritualis aliqua lectio, quæ corporales cibi suauiter condiantur: debent enim, quæ DEO viuunt, spiritu magis viuere, ut licet necessitati corporis seruiant; plus tamen animo semper tributum velint. Liber verò ad lectionem mensæ adhibendus à Confessario probetur.

Silentium, obedientia, humilitas, charitas, ac reliquæ Christianæ virtutes inter Regulares personas gemmarum clarissimarum loco sint, quibus præcipue Monialium domus, & familia exornetur.

Quæ à regula nomen ducunt, eam, cui se professione solenni adstrinxerunt, nosse regulam debent. Episcoporum igitur diligentia efficere debet, ut Regula inter Moniales (ubi hætenus omissa fuit) lingua Italica ab aliqua ex Monialibus, quæ lectioni obeunda aptior fuerit, & ab Abbatissâ, seu Priorissâ deputabitur, frequenter legatur, atque illa quidem in duas distinguatur partes, ita ut quotidie legatur aliquid post Conuentualis Missæ officium vel in choro,
vel

vel alibi, ubi commodius possit, de tribus, quæ emittuntur in professione, votis, ut sapissime inculcentur, & auctore D E O aliquando hæreant; alia verò per ordinem, ut quolibet festo die legantur quatuor, aut quinque capita, & à fine ad principium redeatur, nunquam verò intermittatur. Inter legendum Abbatissa, seu Priorissa Moniales moneat, & redarguat, si quid minus seruetur, aut negligatur: excitet verò ad correctionem, & ad futura gloriæ cupiditatem, igniculos addens, & semina Christianæ pietatis. si quid pænæ à regula ob quodcunque commissum, aut omissum statutum est, hoc Præfecta exequatur; si fuerit oppositum impedimentum, confessarium consulat, Episcopum moneat.

Statis horis tam matutinis, quàm diurnis, & vespertinis Præfectæ curent, ut omnes Moniales in Ecclesiam ad laudes D E O persoluendas conueniant, & in ea non nugis, & collocationibus operam dent: nulla verò Monialis quocunque prætextu excusetur à choro, nisi vel ægritudinis causa, vel ægotantium custodia, vel iusti impedimenti excusatione; quam Præfectarum munus erit cognoscere, & si legitima fuerit, etiam admittere. Quæ in chorum non venerint, pænâ regulæ, aut alia etiam grauiori pro culpæ modo, à Præfecta plectantur, ac, si contumacius perseuerarint, Episcopo significetur, ut medicinam conficiat ipsi ægritudini accommodandam.

Admoneantur Sanctimoniales, ut saltem semel singulis mensibus confessionem peccatorum faciant, & sacrosanctam Eucharistiam suscipiant, ut eo se saluari præsidio muniant
ad

ad omnes oppugnationes Dæmonis fortiter superandas. Quod festis sollemnioribus anni, item Beatæ MARIÆ Virginis, & Sanctorum Apostolorum omittere non debebunt. His attribuaturs Confessarius etate, & prudentia maturus, vitæ, moribus, & doctrina probatus: qui etiam pro opportunitate norit aliquid è sacris scripturis depromere ad spiritualem ipsarum iucunditatem, & perfectæ vitæ progressionem: præter ordinarium alius extraordinarius ab Episcopo eisdem bis, aut ter in anno offeratur, qui omnium confessiones audire debeat.

Seniorum Monialium partes sunt, iuniores ad Sacramentorum frequentiam, & omnes alios pietatis, & deuotionis actus inuitare verbo, exemplo, charitate; ut ad iuniorum modestiam, ac religionem pertinet, omnia, quæ in regula sunt, præcepta obseruare, ad ea se assiduè exercere, & nihil omittere illorum, quæ ad regularis perfectionis implementum spectare aliqua ratione possunt.

At verò non exigua est educationis vis, qua sit habitus difficilè mobilis, & par naturæ habilitas quedam: quo uno præcipuè nititur morum, & vitæ bene agendæ fundamentum. hoc attendant Episcopi; sicubi adhuc non est instituta ratio virginum ad Sanctimonialium perfectionem traducendarum; & omnino prospiciant, ut quamprimum in singulis Monasterijs instituatur Nouitiatus, in quem tam præsentis puellæ; quæ degunt in Monasterijs apud seniores, ibiq; in probatione morantur; quàm omnes, quæ in futurum ad monasticam vitam aspirabunt, recipiantur. Quæ illò vel suo dissensu, vel parentum, aut propinquorum impedimento diuertere noluerint, dimitti.

mitti à Monasterio volumus, nec ei suffragetur superiorum
temporum abusus, aut pactio, siue concordium cum Monaste-
rio, aut Monasterij Praefectis aliàs initum; quàm pactiōem,
seu conuentionem iniri non potuisse declaramus contra commu-
ne bonum Monasterij: initam verò non tenere, nec quem-
quam obligare. In primis verò abolemus, & extinguimus
in omnibus Prouincia Aquileiensis Monasterijs Monialium
discipularum nomen, & usum, quo solebant Moniales puel-
lam tam ex consanguineis, quàm ex alienis recipere in discipu-
lam, illamque educare, & usque ad professionem in Mo-
nastica disciplina in proprio thalamo exercere. Inde
enim; ut est sexus, & seculi infelicitas; parum boni orie-
batur, utinam nihil vel mali, vel scandali: in primis ve-
rò educationis dissimilitudo, & educantium diuersitas nihil
hactenus effecit, in quo non incompositio quaedam, & disso-
nantia videretur, uniformi aliquando ratione, & discipli-
na temperanda: quod Nouitiatus unico remedio fauente
DEO fieri poterit.

A tempore Nouitiatus è septis Monasterij exire Nouitijs
nullatenus permittatur. In Nouitiatum nulla recipiatur sine
habitu regulari. Ad habitum nulla nisi maior duodecim anno-
rum. at verò antequam inducatur in Monasterium, de libe-
ro eius consensu interrogata ab Episcopo, vel Vicario generali,
aut aliquo ab eis deputato, inducetur in Ecclesiam interiorē,
ubi sacro audito, & accepta sanctissima Communione de
Confessarij, aut alterius manu, iuxta morem locorum assu-
met ab eodem habitum regularem, & in Nouitiatum recipie-
tur,

tur, ac finito tempore Nouitiatus, & probationis; quod minus non sit anno; si decimum sextum ætatis annum impleuerit; quod scripto authentico constare debebit; & interrogata ab Episcopo, vel Vicario eius generali de pio illius consensu, & libera voluntate certum testimonium dederit, ad professionem recipi liceat. Optamus autem, ut vetus Monialium solenniter velandarum mos obliuione, ac desuetudine penè antiquatus ad usum pristinum instituto, & ritu proprio reuocetur; modo intra Monasterium fiat.

Nouitium visitet singulis mensibus Abbatissa, seu Priorissa cum Vicaria, & significet Episcopo statum illius, & puellarum disciplinam, & Præfectæ diligentiam.

Usu penè locorum omnium receptum est, ut puellæ, quæ disciplinæ, & educationis locum alibi non inueniunt, in Monasteria consentientibus Episcopis recipiantur, & ibi pietatem discant, & moribus penè Ecclesiasticis instituuntur; ut, quò se contulerint, vel nuptui etiam traditæ fuerint, domos, familias, filios pietatis, ac Religionis tacitis quasi documentis: quod à pio vitæ exemplo colligitur: imbuant, & erudiant; quod ad gloriam DEI, & salutem animarum pertinere nemo negarit. Ne tamen, quod passim fit ad commune bonum, cōmunem afferat, & insignem Regularibus domibus iacturam, decernimus, (quod multis iam locis factum audiuius, probauimus, ac imitari affectamus) quamprimum Monasterijs Monialium, quæ puellarum educandarum studium non refugiunt, aliquam in ipso Monasterio partem aptari à Monialium cellis separata, in quam recipiantur puellæ educandæ, & ibidem erudiantur.

Q

Sit

Sit autem una omnium magistra, cuius dicto puellæ omnes pareant, à qua una omnes addiscenda addiscant. primum doceantur doctrinam Christianam, Officium Beatæ MARIÆ Virginis, septem Psalmos pœnitentiales, Coronam, & Rosarium; ac etiam pingere, & alia facere, quæ ad sexum muliebre honestandum, & familias industria tuendas pertinere possunt. Hæ verò si semel ante finitum educationis tempus exiuerint, vel educatæ fuerint à Monasterio spem deponant restitutionis.

Salarium pro qualibet puella assignatum totum Abbatissæ, vel Priorissæ soluatur, unde victus puellis, magistræ verò aliquid commodi ultra victum propter docendi laborem supeditetur.

Alium educandarum puellarum modum abolemus, ac tolimus, ut iam illa, quæ mercimoni, & irreligiosi lucri cupiditatem non olent modo, sed verè habent, à Sanctimonialium domo, quæ proprium non in re modo, sed in ipsa voluntate abnegarunt, longissime arceantur.

Clausuram Monialium; si Episcopis subsint; ordinaria, minus Apostolica auctoritate iuxta Tridentini Concilij decretum ab ipsis reuideri, vel Apostolica delegata auctoritate, vel ordinaria conuenit, & reformari: in primis circa viridaria, & hortos inspicienda muri altitudo, arborum à muris distantia, in ipsis septorum muris foramina tam intus, quàm extra, ut diligentissime Virginum DEO dicatarum conseruationi prospiciatur. Portas ingressus in Monasterium benemuniendas, nunquam nisi ex causa necessaria aperiendas præcipiant.

cipliant. Parlatoriū verò interior porta sera, & uecte præsertim claudatur: clauis ab Abbatissa, seu Priorissa, aut Vicaria seruetur. in Parlatorio à parte Monialium nihil omnino sit, quo porta interius obserari possit. si fuerit aliquid cum Moniali à quoquam agendum, petat ipsa Monialis à Præfecta Monasterij licentiam, & clauem: expedita colloquutione, obserata porta clauem restituat: in quo statuimus obseruari, ut patres, & matres etiam sine licentia (quoad fratres verò decernimus seruandum, quod est Episcoporum diligentia habetenus constitutum) possint suas uel filias, uel sorores alloqui: si alius extra hos fuerit, qui alloqui Monialem uelit, licentiam in scriptis obtineat ab Episcopo. hi tamen non permittantur alloqui sine licentia Abbatissæ, siue Priorissæ, & præsentia auditricis. ubi verò ordo iam institutus est prædicto exactior, ille ibi seruetur.

Fœminis, quæ meretricium exercuerunt, aut quarum honestas in dubium reuocata aliquando fuit, cum Monialibus tractare, loqui, negocium habere nullatenus concedatur, etiam si causa prætendatur honesta; de qua tamen bene suspicari tutum omnino non est.

Episcopi ingressum nulli concedant, nisi ex causa necessaria, & in scriptis; ipsi verò nunquam ingrediantur, nisi ex causa necessaria, & obseruent Constitutionem Gregorij XIII. latam die xxij. Decembris. M. D. LXXXI. ut censuras Pontificias declinent.

Liber conficiatur in quolibet Monasterio, in cuius parte scribantur omnia nomina, & cognomina, & patria Monialium

viuentium. Sit pars libri attributa ſcriptioni Monialium morientium: tertia pars contineat nomina Nouitiarum cum die, mēſe, & anno receptionis: quarta pars habeat profeſſiones cum die, mēſe, & anno, & profeſſarum nominibus, cognominibus, & patria.

Præter hunc librum habeatur item liber puellarum, quæ educantur: ſcribantur in eo in prima facie pagine nomina, cognomina, & patria puellarum educandarum cum die, mēſe, & anno ingreſſus, & cum assignata quantitate pecuniæ, aut illius ſpeciei, quæ fuit attributa pro cuiuslibet victu: ex altera parte ſcribantur quæcunque exhibita ex attributis pro victu.

Uterque liber ſit apud Præſectam Monaſterij, ſive Abbatiffam, ſive Prioriffam, & diligenter cuſtodiat, & Epifcopo, quandocunque voluerit, ac requiſierit, ſit in promptu. appareat verò, ut in reliquis, in his etiam diligentia illarum, quæ præſecturæ munus ſuſceptum habent, ut laudem mereantur, & præmium in Cælo benè geſtæ prouinciæ.

Multo verò plura ſtatuenda pro bono Sanctimonialium ſtatu viderentur, niſi cogitandum eſſet de Domini ſententiâ, qui cum multa Apoſtolos docere, & præcipere eiſdem haberet, illa reticuit, quæ portare tunc non poſſent, in aliud tempus extrahenda, cum habiliores ad intelligendum facti eſſent. Nos verò ſi de Monialium domibus in Prouincia bene conſtitutis cogitamus, hæc, quæ iecimus fundamenta, illò pertinebunt, ut, quod præſentibus decretis faciendum putauimus, iam factum laudemus: ſi verò illarum rationem habemus, quæ principia, & baſes,

¶ bases, quibus sustententur, adhuc non habent, satis multa statuimus, ut quæ modo portare non possint, inculcare superuacaneum videatur. Quod de reliquis etiam ad gubernium Ecclesiasticum pertinentibus eodem consilio decreuisse, & statuisse nos per DEI gratiam non pœnitebit.

Presbyteros seculares, ac regulares sine expressa licentia Episcoporum decernimus non permittendos, ut in Ecclesijs Monialium Episcopis subiectarum celebrent.

Ac ut laudamus, quod multis iam factum locis audiimus, ita, ubi non est institutum, decernimus instituendum; ut musicas laicorum, seu Clericorum in Monialium Ecclesijs Episcopi non permittant, nisi licentia præcedente.

Extremum hoc Episcopos monemus, accuratè prospiciendum, ut incongruæ cuidam rei, quæ inter Monialium Conuersas passim viget, occurrant, nec permittant illas à Monasterijs suæ Diœcesis ad colligendas eleemosynas extra Diœcesim discedere sine litteris commendatitijs; ut cognoscantur, unde veniant, & quò, cuiusve rei causa proficiantur; aut ad eleemosynarum collectiones, cum aliunde venerint, non admittant, nisi præfatas commendatitias attulerint; nec adhuc permittantur eleemosynas colligere, nisi domum ante, in quam diuerterint, & in qua permaneant, ipsi notam fecerint.

Suprascriptas Constitutiones in Prouinciali Synodo prima Aquileiensi promulgatas, & receptas de consilio, & consensu Reuerendiss. DD. Coepiscoporum nostrorum decernimus in Synodo prima Diœcesana à singulis Episcopis promulgari, & executioni mādari, quatenus Episcopalis sollicitudo cōficere poterit.

Si qua

Si qua autem super illis, aut illarum aliqua circa veram intelligentiam dubitatio emerferit, illius nobis declarationem usque ad futuram Synodum Prouincialem item de consensu eorundem Reuerendissimorum DD. Coepiscoporum reseruamus. Præfatarum Verò Constitutionum dispositionem sanctæ Sedis iudicio subiicimus, & confirmationem, & approbationem ab eadem petendam, & impetrandam huius sanctæ Synodi Aquileiensis nomine decernimus omni meliori modo ad laudem Omnipotentis DEI. Amen.

Ego Franciscus Patriarcha Aquileiensis definiens subscribo.

Ego Georgius Episcopus Petinensis definiens subscribo.

Ego Cæsar Episcopus Parentinus definiens subscripsi.

Ego Michael Episcopus Vicentinus definiens subscripsi.

Ego Iacobus Episcopus Feltrensis definiens subscripsi.

Ego Claudius Episcopus Polensis definiens subscripsi.

Ego M. Antonius Episcopus Cenetensis definiens subscripsi.

Ego

Ego Albertus Episcopus Famagustanus, Coadiutor Veronæ definiens subscripsi.

Ego Marcus Episcopus Paduanus definiens subscripsi.

Ego Philippus Episcopus Comensis definiens subscripsi.

Ego Aloysius Episcopus Tarvisinus definiens subscripsi.

Ego Franciscus de Prampero Canonicus Vtinenſis, ac Procurator ſpecialis Reuerendiſſimi D. Ioannis Ingenerij Episcopi Iuſtinopolitani eius nomine interfui, ac ſubſcripſi, & omnia, & ſingula in hac ſancta Synodo acta, & publicata, eius, & Eccleſiæ ſuæ nomine recipio.

Ego Horatius Buſinus I. V. D. & Presbyter, ac ciuis Aemonienſis Procurator ſpecialis Reuerendiſſimi D. Antonij Saraceni Episcopi Aemonienſis nomine eius interfui, & ſubſcripſi, & omnia, ac ſingula in hac ſancta Synodo acta, edita, & publicata, eius, & Eccleſiæ ſuæ nomine recipio.

Ego Valerius Trapola à Collibus I. V. D. & Vicarius generalis Reuerendiſſimi Domini, D. Matthæi Sanuti
Episcopi

Episcopi Concordiæ, eiusq; in hoc specialis Procura-
tor eius nomine interfui, & subscripsi, & omnia, &
singula in hac sancta Synodo decreta, atque acta, edi-
ta, & publicata, eius, & Ecclesiæ suæ nomine re-
cipio.

Ego Gasparus Pinellus Doctor sacrae Theologiæ Reue-
rendissimiq; Domini Episcopi Bellunensis Procura-
tor specialis, eius nomine interfui, & subscripsi, &
omnia, ac singula in hac sancta Synodo acta, edita, &
publicata, eius, & Ecclesiæ suæ nomine recipio.

*Finis Concilij Provincialis Aquileiensis Primi, habiti in Ciui-
tate Vtini die 20. Octobris. 1596.*



EX CONCILIO

Lateranensi sub Leone X.

LEO EPISCOPVS

SERVVS SERVORVM DEI,

AD PERPETVAM REI MEMORIAM

sacro approbante Concilio.



POSTOLICI regiminis sollicitudo nos assidue pulsatur, ut medendis animarum languoribus, quarum nos ex alto omnipotens author curam habere voluit; ijs potissimum, qui instantius fideles nunc urgere cernuntur, salutifero olei, & vini medicamine ad instar Samaritani in Euangelio sollicitam operam impendamus, ne nobis illud Hieremie obijciatur: nunquid resina non est in Galaad, aut medicus non est tibi? cum itaque diebus nostris (quod dolenter referimus) zizania seminator, antiquus humani generis hostis, nonnullos perniciosissimos errores a fidelibus semper explosos, in agro Domini supereminare, & augere sit ausus, de natura praesertim animae rationalis; quod videlicet mortalis sit, aut unica in cunctis hominibus; & nonnulli temerè philosophantes, secundum saltem philosophiam verum id esse asseuerent, contra huiusmodi pestem opportuna remedia adhibere cupientes, hoc sacro appro-

R bante

bante Concilio damnamus, & reprobamus omnes asserentes, animam intellectuam mortalem esse, aut unicam in cunctis hominibus, & hac in dubium vertentes, cum illa non solum verè per se, & essentialiter humani corporis forma existat, sicut in Canone felicitis recordationis Clementis Papæ Quinti prædecessoris nostri in generali Viennensi Concilio edito continetur, verum & immortalis, & pro corporum, quibus infunditur, multitudine singulariter multiplicabilis, & multiplicata, & multiplicanda sit. quod manifeste constat ex Evangelio, cum Dominus ait: Animam autem occidere non possunt: & alibi: qui odit animam suam in hoc mundo, in vitam æternam custodit eam. & cum æterna præmia, & æterna supplicia pro merito vitæ iudicandis repromittit: aliàs incarnatio, & alia CHRISTI mysteria nobis minimè profuissent, nec resurrectio expectanda foret, ac sancti, & iusti miserabiles essent (iuxta Apostolum) cunctis hominibus; cumq; verum vero minimè contradicat, omnem assertionem veritati illuminatæ fidei contrariam, omnino falsam esse diffinimus, & ut aliter dogmatizare non liceat, districtius inhibemus; omnesq; huiusmodi erroris assertionibus inhærentes, veluti damnatissimas hæreses seminantes, per omnia, ut detestabiles, & abominabiles hæreticos, & infideles, Catholicam fidem labefactantes vitandos, & puniendos fore decernimus. Insuper omnibus, & singulis philosophis in universitatibus studiorum generalium, & alibi publice legentibus, districtè præcipiendo mandamus, ut cum philosophorum principia, aut conclusiones, in quibus à recta fide deviare noscuntur, auditoribus

auditoribus suis legerint, seu explanauerint; quale hoc est de
 animæ mortalitate, aut unitate, & mundi æternitate, ac alia
 huiusmodi; teneantur eisdem Veritatem religionis Christianæ
 omni conatu manifestam facere, & persuadendo pro posse
 docere, ac omni studio huiusmodi philosophorum argumentis;
 cum omnia solubilia existant; pro viribus excludere, atque
 resolvere: & cum non sufficiat aliquando tribulorum radices
 præscindere, nisi, & ne iterum pullulent, funditus euellere,
 ac eorum semina, originalesque causas, unde facile oriuntur,
 remouere: cum præcipuè humanæ philosophiæ studia diuturnio-
 ra; quam DEVS secundum Verbum Apostoli euacuauit,
 & stultam fecit; absque diuinæ sapientiæ condimento, & quæ
 sine reuelatæ Veritatis lumine in errorem quandoque magis
 inducunt, quàm in Veritatis elucidationem: ad tollendam
 omnem in præmissis errandi occasionem, hac salutarî Constitu-
 tione ordinamus, & statuimus, ne quisquam de cætero in sa-
 cris ordinibus constitutus, secularis, vel regularis, aut alias ad
 illos à iure arctatus, in studijs generalibus, vel alibi publicè au-
 diendo, philosophiæ, aut poësis studijs ultra quinquennium
 post grammaticam, & dialecticam, sine aliquo studio Theolo-
 giæ, aut iuris Pontificij incumbat: Verum dicto exacto quin-
 quennio, si illis studijs insudare voluerit, liberum sit ei, dum
 tamen simul, aut seorsum, aut Theologiæ, aut sacris Canonibus
 operam nauauerit, ut in his sanctis, & utilibus professioni-
 bus Sacerdotes Domini inueniant, unde infectas philosophiæ,
 & poësis radices purgare, & sanare valeant: & hos Cano-
 nes per ordinarios locorum; ubi generalia studia vigent,

et rectores vniuersitatis eorundem studiorum singulis annis in principio studij, in virtute sanctæ obedientie publicari mandamus, nulli ergo omnino hominum liceat hanc paginam nostre damnationis, reprobationis, diffinitionis, inhibitionis, decreti, ordinationis, statuti, & mandati infringere, vel ei ausu temerario contraire. Si quis hoc attentare præsumpserit, indignationem omnipotentis DEI, & beatorum Petri, & Pauli Apostolorum eius se nouerit incursum. Datum Romæ in publica sessione in Lateranensi sacrosancta basilica solenniter celebrata, anno incarnationis Dominicæ 1513. quartodecimo Kalendas Ianuarij Pontificatus nostri anno primo.



INDEX



INDEX

Rubricarum.

D E fide profitenda.	2
De fide tuenda.	4
De prædicatione verbi Dei.	7
De diuinis officijs.	10
De Residentia Episcoporum.	17
De Residentia Curatorum.	21
De Residentia Canonicorum, & beneficiarum, qui re- sidendi obligatione tenentur.	23
De Episcopis.	24
De Parochis.	26
De dignitatibus, Canonicatibus, & beneficijs simpli- cibus.	29
De vita, & honestate Clericorum.	31
De Seminario Clericorum.	37
De Visitatione.	41
De festorum dierum sanctificatione.	45
De Reliquijs Sanctorum.	47

De



De Ecclesijs, & pio in eis versandi modo, Altaribus, & Sacristijs.	49
De bonis, & iuribus Ecclesiarum tuendis.	52
De Vicarijs foraneis.	54
De Monialibus.	56

*Superiora omnia Synodi huius Prouincialis Decreta recognita,
& approbata fuerunt à sacra Congregatione
Concilij Tridentini.*

HIERONYMVS CARD. MATTHAEIVS.

In Ciuitate Vtini die 28. Octob. 1596. comparuit coram Reuerendiss. D. Patriarcha Aquileiæ &c. Metropolitano Reuerendus Presbyter D. Michael Passera Canonicus Tergestinus, & specialis Nuncius pro Reuerendiss. D. Episcopo Tergestino ad proponendas excusationes eiusdem Reuerendissimi D. Episcopi in Synodo Prouinciali Aquileiensi: vt patet mandato sui Procuratorij suo die 26. Octob. eiusdem anni manu D. Georgij Piccardi Notarij Tergestini.

Die 2. Nouemb. 1596. coram eodem Reuerendiss. D. Patriarcha Metropolitano comparuit Reueren. & Excell. D. Iosephus Roboretus Cathedralis Ecclesiæ Tridentinæ Canonicus, & Episcopatus Tridentini pro Illustriss. & Reuerendiss. D. D. Ludouico S. R. E. Cardinali Madruccio dictæ Ecclesiæ Episcopo Vicarius generalis, & ab eodem Illustriss. D. Card. vt patet litteris D. S. Illustrissimæ datis Romæ die 19. Octob. 1596. manu propria subscriptis, & solito sigillo obsignatis: specialis Nuncius destinatus ad Synodum Prouincialem Aquileiensem.

F I N I S.







V T I N I,
Ex Typographia Io. Baptistæ Natolini.
M. D. XCVIII.



INSTITUTION
THE TYPOGRAPHIC INSTITUTE
M D XCVIII
6424





Rest. Libro Antico
Cav. G. DI GIACOMO
Tel. 71550 - PESCARA

1987

